



# THE UNIVERSITY OF CHICAGO PRESS

50 EAST LEXINGTON AVENUE, NEW YORK, N.Y. 10017-2473

300 NORTH ZEEB ROAD, ANN ARBOR, MI 48106-1500

100 Brook Hill Drive, West Nyack, N.Y. 10994-2133

233 Spring Street, New York, N.Y. 10013-1578

100 Philip Drive, Assinippi Park, North Andover, MA 01857

100 Brook Hill Drive, West Nyack, N.Y. 10994-2133

100 Philip Drive, Assinippi Park, North Andover, MA 01857

100 Brook Hill Drive, West Nyack, N.Y. 10994-2133

100 Philip Drive, Assinippi Park, North Andover, MA 01857

100 Brook Hill Drive, West Nyack, N.Y. 10994-2133

100 Philip Drive, Assinippi Park, North Andover, MA 01857

100 Brook Hill Drive, West Nyack, N.Y. 10994-2133

100 Philip Drive, Assinippi Park, North Andover, MA 01857

100 Brook Hill Drive, West Nyack, N.Y. 10994-2133

100 Philip Drive, Assinippi Park, North Andover, MA 01857

100 Brook Hill Drive, West Nyack, N.Y. 10994-2133

100 Philip Drive, Assinippi Park, North Andover, MA 01857

100 Brook Hill Drive, West Nyack, N.Y. 10994-2133

100 Philip Drive, Assinippi Park, North Andover, MA 01857

100 Brook Hill Drive, West Nyack, N.Y. 10994-2133

100 Philip Drive, Assinippi Park, North Andover, MA 01857

100 Brook Hill Drive, West Nyack, N.Y. 10994-2133

100 Philip Drive, Assinippi Park, North Andover, MA 01857

100 Brook Hill Drive, West Nyack, N.Y. 10994-2133

100 Philip Drive, Assinippi Park, North Andover, MA 01857

100 Brook Hill Drive, West Nyack, N.Y. 10994-2133

100 Philip Drive, Assinippi Park, North Andover, MA 01857

100 Brook Hill Drive, West Nyack, N.Y. 10994-2133

100 Philip Drive, Assinippi Park, North Andover, MA 01857

100 Brook Hill Drive, West Nyack, N.Y. 10994-2133

100 Philip Drive, Assinippi Park, North Andover, MA 01857

100 Brook Hill Drive, West Nyack, N.Y. 10994-2133

100 Philip Drive, Assinippi Park, North Andover, MA 01857

100 Brook Hill Drive, West Nyack, N.Y. 10994-2133

100 Philip Drive, Assinippi Park, North Andover, MA 01857

100 Brook Hill Drive, West Nyack, N.Y. 10994-2133

100 Philip Drive, Assinippi Park, North Andover, MA 01857

欽定平定陝甘新疆回匪方略卷一百四十九 丁卯年

二月十二日 丙申 德勒克多爾濟錦丕勒多爾濟

麟興奏言哈密失守逆回復犯巴里坤所有鄰

近烏里雅蘇台迤西所屬札薩克圖汗部落操

防更屬緊急 臣等當卽熟商恐德德庫鄂博一

帶防軍五百名不足堵禦將派防察汗烏蘇之

三音諾彥部落兵壯五百名亦札調德德庫鄂

博一帶分紮現奉

特旨令李雲麟酌留三音諾彥盟兵一千名專防烏城  
所需餉銀准由烏城操防經費項下支給又准  
李雲麟咨商指令此項盟兵專防吉慶淖爾 臣  
等卽飭該盟長添得力公一員統帶仍令原派  
札薩克巴達爾經管速往相機操防統計分防  
兵壯二千名應給利器認真訓練烏城庫儲軍

火無幾半不堪用請

旨飭下山西撫臣趕造烏槍二千桿隨帶什件並火藥

烘藥解送綏遠城由臣等委員領取至防兵餉

項前經戶部籌撥並准李雲麟統籌撥給刻下

未見解到應請

飭下戶部卽行籌撥銀五六萬兩趕先催解歸化城亦

由臣等委員領取其餉銀未到以前在蒙古捐

輪牲畜項下通融折放俟捐輸有成再行覈銷  
奏入

上命軍機大臣傳諭德勒克多爾濟錦丕勒多爾濟麟  
興趙長齡曰哈密失守後逆回復犯巴里坤所有烏  
城迤西之札薩克圖汗部落操防緊要德勒克多爾  
濟等以德德庫鄂博一帶防兵尙單將派防察汗烏  
蘇之三音諾彥蒙兵調往該處駐紮著該將軍等認

眞操練嚴防回逆東竄毋稍疏虞李雲麟酌留之三  
音諾彥盟兵該將軍等已添派大員統帶前往吉慶  
淖爾一帶巡防統計防兵二千烏城庫儲軍火不敷  
應用著趙長齡趕緊製造烏槍二千桿隨帶什物並  
火藥二萬斤烘藥五百斤解赴綏遠由德勒克多爾  
濟等迎提以備操演訓練之用所請飭令戶部先籌  
撥銀五六萬兩趕解歸化城委員領取專供防堵經

費著戶部酌度籌撥以濟要需此項餉銀未到以前  
准由蒙古捐輸牲畜項下通融折放該將軍等卽咨  
明李雲麟辦理

十三日 丁酉 穆圖善奏言 臣 自正月初一初二等

日勦賊獲勝後馬楊股匪勢漸窮蹙現在均聚  
於半箇城及鹽固一帶初八初九等日馬生彥  
楊文治隨同前經投誠之馬萬選郝壯圖王三



春等親來臣營俯伏投誠情詞極爲懇切楊文治並將抗不歸順之小頭目數人殺斃眾情始皆翕服該回酋復稱情願帶領馬隊數百人隨同大兵勦賊贖罪臣卽當面勒限嚴飭掃數呈繳馬匹軍械再行擇地安插該回酋等均感激涕零叩頭而去約計數日內卽有覆信到營臣愚以爲大兵若直擣半箇城無論山路險峻糧

道維艱且恐竄匪愈驅愈東轉與涇慶一帶賊  
匪聯絡陝疆必倍形喫緊該回等經此次痛創  
易於就我範圍果能於日內呈繳馬匹軍械則  
撫局一定所有擇地安插一切事宜擬知照前  
督<sub>臣</sub>楊岳斌委員妥爲辦理<sub>臣</sub>卽可統帶所部  
隊伍直趨涇慶截擊竄匪顧全陝疆刻下慶郡  
固守無援岌岌可危而<sub>臣</sub>軍又進止兩難再四

思維惟有權宜辦理查楊文治係陝西回會人  
素獷悍爲同類所畏憚擬卽檄飭隨帶數騎星  
馳前赴慶郡開導陝回投誠藉以表其向化之  
心俾暫時羈縻城圍可以稍鬆臣一面飛咨楊  
岳斌設法抽撥一軍來甯安堡駐紮並派委員  
辦理安插事宜一面委員先行馳赴花定甯條  
梁一帶籌辦糧米臣卽陸續拔營東進趨赴慶

陽迅解城圍斷不敢藉詞延宕自外

生成奏入

上命軍機大臣傳諭穆圖善楊岳斌喬松年曰穆圖善  
奏回日馬生彥楊文治悔罪投誠情詞懇切並情願  
帶領馬隊數百隨同勦賊贖罪現在如果真心悔罪  
日內呈繳馬匹軍械自應乘機收撫予以自新所有  
擇地安插事宜卽著楊岳斌委員妥爲辦理慶郡困

守無援殊形危殆穆圖善以楊文治係陝西回酋爲  
同類所畏憚擬卽飭令隨帶數騎前赴慶郡開導陝  
回俾各悔罪輸誠藉以暫解城圍穆圖善一軍現旣  
進止兩難自不得不暫示羈縻爲一時權宜之計惟  
楊文治是否可用總當持以慎重謀定後動毋爲該  
逆所紿涇慶竄匪逼近陝疆應如何調撥兵勇嚴密  
堵擊以杜該匪東竄之處著喬松年穆圖善會商辦

理穆圖善軍糧缺乏擬派員先行馳赴花定甯條梁一帶籌辦糧米著楊岳斌穆圖善妥爲籌畫俾該將軍得以拔營前進迅解慶郡之圍

十四日戊戌榮全李雲麟奏言臣榮全接奉

諭旨令與李雲麟分設防守臣雲麟在科日久熟悉該

處情形擬卽仍駐科城同奎昌等辦理一切防

守事件臣榮全卽帶領伊犁官兵等前往烏里

雅蘇台會同該處將軍等挑選精壯蒙古官兵  
相勘地勢嚴加防守奏入得

旨卽著會同德勒克多爾濟等將防守事宜悉心籌辦  
毋得徒託空言致滋貽誤

同日喬松年奏言 臣 恭奉

上諭以回逆竄擾陝境飭將近日軍情據實覆奏查回  
逆竄陝情形以長武邠州一路爲最急而三原

醴泉富平咸陽一帶亦復不少至前竄同州之  
回本係零股早經折回現在同州已無賊蹤其  
竄至三原咸陽之賊勢欲渡渭與捻逆相合節  
經譚玉龍劉厚基等分投迎擊先後陣斃數百  
人賊不得渡退至涇陽劉厚基又與劉効忠分  
路追擊賊現向北狂竄臣已飭其盡力擊勦以  
清腹地之患惟鄜州宜君又有回蹤而邠長一



帶情形緊急 臣前請

飭庫克吉泰德興阿兩軍趕往邠長以當一面如此軍  
能往邠長則劉厚基一軍便可向鄜州進剿此  
時捻逆旣經擊敗庫克吉泰等更可專力勦回  
以顧西路仍懇

天恩飭催迅速前進如將長武之回擊退卽駐紮涇州  
以通陝甘兩省之路再雷正綰被圍月餘卒能

擊破重圍此次勦賊頗爲奮勇其被賊擁去放回臣實未聞此說不敢代爲掩飾

喬松年又奏言臣疊據雷正綰營務處副將黃

有才以糧餉兩竭請轉飭籌撥又據譚玉龍劉効忠洪殿元等均稟忍飢待餉困苦不支情詞皆極苦惻查平固慶涇五十餘營月須餉銀十四五萬兩近督臣楊岳斌奏請各省協餉由荆

子關徑解漢中令陳丕業總司轉運湖北藩司  
何璟接奉行知業將浙江江甯湖北湖南及江  
海關等處報解銀十九萬二千餘兩儘數改解  
漢中是平固慶涇無餉可指慶陽現正危急儻  
軍士因飢生變非獨陝省受累卽甘事愈難收  
拾顛懇

天恩迅飭湖北督撫轉飭何璟陳丕業仍將前項報解

銀十九萬餘兩交林壽圖酌量支發暫解目前之急奏入

上命軍機大臣傳諭譚廷襄曾國荃喬松年曰庫克吉泰一軍著喬松年催令徑赴長武涇州一帶擊勦毋任甘回續行東竄三原咸陽之賊既經喬松年派兵擊退著卽飭譚玉龍劉厚基等分路儘力追勦務將回匪殄盡以清腹地雷正綰已在邱家寨獲勝仍著

喬松年飭令各軍將士與雷正綰聯絡聲勢以期互相援應陝省援兵雲集需餉浩繁雷正綰與譚玉龍均皆缺餉所有湖北糧臺報解漢中銀十九萬餘兩著譚廷襄會國荃飭令何璟陳丕業仍將此款解交林壽圖酌量支放

十五日己亥李雲麟奏言臣於正月初八日由烏

隴古河撤回行抵查罕同古地方疊據訥爾濟

何瑄來咨並該城守備趙萬海等面陳巴城接  
仗及回逆復來各情形請 臣與棍噶札拉叅趕  
緊赴援查棍噶札拉叅所帶蒙兵一千五百名  
較爲得力然烏科兩城倚爲屏障西陲賊勢狹  
狷屢經奉

旨先顧北路完善之區

臣

昨抵烏隴古河迤西有庫爾

喀喇烏蘇境內土爾扈特王貝勒等派員前來

言該旗爲回逆所逼率衆北移且喀喇沙爾居住之士爾扈特數十旗亦爲回逆所逼漸次北來請定在何地居住等情臣思兩處土爾扈特人數衆多若悉衆北移則烏科勢不能容因諭令不得逾霍博賽里之東又哈薩克數十萬衆時圖東犯凡此兩路皆賴額魯特蒙兵鎮壓其閒若將此軍移援巴城儻西路有警則烏科兩

城何以禦之正在焦急聞適奉

諭旨李雲麟有幫辦之責現在西路情形如此亦當思  
良策援救不得膜視臣查現有張和所部勇丁前來  
當卽札諭暫紮紅柳峽立爲一營就近防守巴  
城以待大軍奏入

上命軍機大臣傳諭李雲麟曰前因哈密回匪西撲巴  
城情形緊急諭令李雲麟催令棍噶札拉叅整齊蒙



兵馳援巴城茲據李雲麟奏稱撥勇前往駐防一摺  
烏科兩城防務喫重棍噶札拉叅所部蒙兵勢難移  
援西路該參贊現派張和所部勇丁在紅柳峽立營  
就近防守著卽飭令趕緊馳赴巴城援應速解城圍  
不得但顧北路本境稍涉遷延觀望其土爾扈特各  
旗北徙人衆卽著照李雲麟所指地方令其游牧妥  
爲安插哈薩克人數衆多時思東犯李雲麟當訓練

額魯特蒙兵嚴加防範毋稍疏忽

十六日庚子喬松年奏言劉厚基等軍於涇陽追

賊獲勝後卽躡蹤追剿逆回現已北竄該軍復  
趕往追躡忽接三水縣稟報有另股逆回數千  
由三水東竄前股已至三原滋擾臣當卽飛飭  
劉厚基會同劉劾忠邱時成等軍回軍截擊並  
派副將洪殿元何玲必兩軍趕往會擊正在調

派閒復疊據稟報甘省大股回逆數萬勾結土匪潰勇同時竄至鄜州境內段登雲一軍不能抵禦該逆已深入滋擾中部宜君邊境皆見賊蹤臣前請庫克吉泰等進扼邠涇臣便可專顧鄜州一路此時庫克吉泰等尙未赴邠而鄜州之賊業經深入已有緩不濟急之勢庫克吉泰德興阿現已行抵同州如由同州取道蒲城宜

君卽可直達鄜境臣已飛速請其不必來省卽  
往鄜州赴援立救危急仍懇

天恩飭催趕緊前進如西路一股擊退則劉厚基等軍  
卽可移往鄜州協剿

喬松年又奏言陝省兵弱財殫諸事不能舉辦  
若不亟籌鉅款力爲補救則州縣漸次糜爛而  
西征之軍不能安駐陝邊其害將分於晉豫矣

是以必注全力於陝晉豫乃可安堵無患臣原  
欲就地籌餉而未到省之先賊已入境接印之  
後軍情日急實屬無從措手計惟有移東南之  
餉治西北之軍左宗棠在南養兵之餉可以許  
其提移來陝方能舉辦各事伏覩

諭旨已催其速行啟程左宗棠聲威素著如能早到攜  
銀一二十萬兩帶兵數營不必卽行追賊但駐

西安則士氣民心均可爲之一振徐圖規畫自  
可漸臻敕定若仍有兵而無餉則智勇亦無可  
施仍難奏效奏入

上命軍機大臣傳諭左宗棠庫克吉泰喬松年曰喬松  
年奏另股回匪由三水東竄前股已至三原滋擾喬  
松年已飭劉厚基會同劉効忠等合擊復有大股逆  
回數萬勾結土匪潰勇同時竄至鄜州境內段登雲

一軍不能抵禦該逆已深入滋擾中部宜君邊境皆見賊蹤庫克吉泰德興阿已抵同州著卽帶兵趕赴鄜州毋庸再行進省致多紆折並著喬松年飭令劉厚基等軍迅將西路一股擊退移軍往鄜州協勦以厚兵力陝省旣患兵弱尤患財殫左宗棠現駐漢口慎重籌畫未便輕進朝廷亦深知其苦心惟現在陝省萬分緊急若非該大臣就現有兵力寬籌餉項迅

赴西安調度恐軍心民心日形渙散設如喬松年所  
慮該大臣將來挽救更多棘手該大臣務當先其所  
急迅往鎮壓並以屏蔽晉豫斷不令遽行入甘致礙  
該大臣種種布置鮑超一軍現已留鄂剿賊湘淮諸  
軍亦俱到鄂後路尙可無虞該大臣卽酌度援應以  
紓廩念

十九日 癸卯 庫克吉泰喬松年奏言 臣松年前以



鄜州危急請

飭臣庫克吉泰先剿鄜州之賊臣庫克吉泰時已行抵

臨潼距省僅數十里並以副都統全福等馬隊

剿擒之師業經馳過省西未便折回當即趕赴

省城與臣松年面商剿回剿擒同是擊賊自可

先剿擒匪不必再行折回鄜州轉多紆折商議

已定臣庫克吉泰即日由省親赴蓋郡督率馬

三國志卷之四十六 二十六  
隊會同劉松山追勦其鄜州一路自應另行抽  
兵往堵 臣松年查劉厚基一軍正追賊於富平  
耀州之間據報賊已北竄 臣卽飭其躡蹤趕勦  
卽馳向鄜州以顧北路

庫克吉泰喬松年又奏言 臣庫克吉泰現帶馬  
隊千餘必須有步隊相輔 臣松年再四籌畫各  
軍皆居要地一時實難抽調惟有副將王其發

吳得勝兩營本係隨同黃鼎勦擒紮在前敵此時卽將該兩營就近撥歸調遣以資得力奏入

上命軍機大臣傳諭庫克吉泰喬松年曰庫克吉泰一

軍業已行抵西安所派馬隊已赴蓋鄆距鄜州路遠未便再行折回著庫克吉泰卽日出省親赴蓋鄆會同劉松山追勦擒逆痛加殲戮鄜州一路喬松年已派劉厚基一軍由富平耀州之閒馳赴該處防勦惟

陝境內地回匪尙未肅清而甘回大股數萬復勾結土匪潰勇同時竄至鄜州段登雲一軍不能抵禦該逆已深入中部宜君邊境劉厚基兵力頗單恐未足敷勦辦庫克吉泰一軍未便專顧捻匪致令此路空虛著庫克吉泰喬松年斟酌情形如北路情形緊急仍著該將軍懍遵前諭折赴鄜州將該處回匪擊退卽赴涇邠一帶堵勦不得藉口勦捻致令顧此失彼

另片奏現撥副將王其發吳得勝兩營步隊歸該將軍調遣著卽照所擬辦理德興阿諒已就痊著卽赴營迅圖會勦

同日署察哈爾都統裕瑞奏言各處營驛馬匹雖多由張家口外一帶採買然均在夏秋之交水草茂盛馬商輻輳之時過時則馬商星散難以購買兼之近年經費支絀庫存之銀僅有六

千餘兩若按市價買馬三千匹約須用價三萬餘金一時實難措此鉅款臣查上年奏報官羣馬匹臆分數日時商都太僕寺各牧羣尙有三四分臆之馬一千匹又查從前軍務需馬察哈爾各旗各牧馬羣情殷報效捐輸馬匹者頗不乏人臣所屬口外蒙古游牧中若普勸捐輸照案請獎自必踴躍恐後計亦可得馬一千匹尙

欠馬一千匹 臣卽遵

旨移咨福興桂成或買或捐體察該處地方情形酌辦  
以期分擊易舉所擬調撥官羣之馬一箇月可  
集普勸捐輸之馬兩箇月可集屆時親加查驗  
務在精益求精以利戰陣之用吉林礮手六起  
臣與福興桂成備辦之馬亦按六起解京以便  
沿途供應惟由歸化城進殺虎口赴京道路直

捷較之進張家口赴京道路窻遠恐延時日可  
否於購妥時卽由福興桂成詳加驗別委員徑  
行解交吉林營總驗收不致臨時耽誤所有撥  
用官羣馬一千匹擬請

飭下左宗棠按歷年採買戰馬市價合銀若干兩委員  
解送 臣 衙門飭交各羣總管買補足額以備調  
撥奏入



上命軍機大臣傳諭左宗棠福興桂成裕瑞曰裕瑞奏  
遵旨採辦馬匹擬於官羣內選馬一千匹由蒙古各  
旗捐馬一千匹再行移咨福興等或買或捐採辦一  
千匹分起解京等語官羣馬匹臚分不齊設使勉強  
湊數必至貽誤事機著裕瑞詳加選擇務須臚分一  
律肥壯方堪應用蒙古各旗捐輸之馬亦須認真挑  
選不得以疲羸充數此項馬匹俟吉林礮手行過京

師卽著分起解交該營總帶往左宗棠軍營毋許延  
誤所短之馬著福興桂成趕辦臆壯戰馬一千匹無  
論或捐或買總期迅速辦理至由歸化城進殺虎口  
解交該營自比張家口較爲便捷卽著福興等購辦  
齊全時自行驗明解交吉林營總驗收毋庸轉由裕  
瑞點驗以免紆折至官羣馬匹亦關緊要著左宗棠  
將馬價解交察哈爾由裕瑞買馬一千匹以補官羣

之額左宗棠著仍遵前旨一面先期赴陝不必坐候  
新籌馬隊以致久延

二十四日戊申伊勒屯何瑄奏言據東山拏獲哈

密賊營漢回供稱自哈密失陷烏魯木齊等處  
漢回及多蘭回賊共四千餘名現均得財陸續  
偷走前在肅州探信之賊回哈聲言肅州被圍  
甚急安沙駐紮兵勇防堵目下有先取安沙又

有先取巴里坤之說 臣等以爲哈密賊勢少分  
攻取甚易乃於正月二十四日准李雲麟咨烏  
科兩城蒙兵散盡棍噶札拉叅所帶蒙兵雖較  
爲得力烏科兩城倚爲屏障宜先顧北路完善  
之區此外僅有新招孔才民勇一營尙未訓練  
成軍先援巴城委實無兵可撥復准棍噶札拉  
叅咨兵馬器械均已齊備如果赴援進剿必須

與李雲麟商議方可進兵 臣等竊計李雲麟坐視不救實有所怯又復不令棍噶札拉叅赴援不過以招集蒙兵規復烏城爲名虛糜帑餉實非爲

國爲民惟有仰懇

天恩俯念巴城軍民苦志堅守於今三年

簡派委員協同棍噶札拉叅急赴巴城救援疏通哈密

餉道以救闔郡生命 臣等再派員赴博里岡急  
調孔才等所帶民勇先行赴巴救援仍請

旨飭催成祿分兵出關星夜赴哈以攻哈密之東文麟  
刻卽赴任則新疆幸甚奏入

上命軍機大臣傳諭李雲麟伊勒屯成祿何瑄曰前據  
李雲麟奏烏科兩城防務喫重棍噶札拉奈所部蒙  
兵勢難移援西路現派張和所部勇丁在紅柳峽立

營就近防守當經諭令李雲麟飭令張和趕緊馳赴巴城援應速解城圍不得但顧北路本境現在巴城受困日深亟應派兵援救保全闔郡生靈棍噶札拉叅所帶蒙兵如可援應巴城著李雲麟與之會商妥籌赴援不得藉詞延宕儻巴城有失惟李雲麟是問伊勒屯何瑄已調孔才等所招民勇赴巴著就現有兵力設法固守以待援軍不得稍涉疏懈伊勒屯等

摺內所稱肅州被圍甚急賊供安沙駐紮兵勇防堵  
目下有先取安沙又有先取巴里坤之說近日肅州  
軍情若何安沙是否有賊股滋擾此項兵勇能否先  
赴救援著成祿迅卽查明具奏仍遵前旨迅克肅州  
以圖出關會師攻勦文麟已否至安西防堵並著催  
令該員刻卽赴任勿任逗留



欽定平定陝甘新疆回匪方略卷一百五十 丁卯年

二月二十七日

辛亥

楊岳斌奏言 臣前因病勢增

劇曾於去年十二月奏請

賞假調理詎意一月以來百藥罔效諸證全然未減正

月初二日家人羅宏珍到甘得悉八旬父母病

皆垂危 臣疾苦之餘忽聞此信病勢益增然當

此軍務重大不敢愛惜微軀仍力疾籌度乃一

事甫經著想怔忡卽不可當日在病中欲求調  
度不致舛錯自問更不敢自信新任督臣左宗  
棠尙無到甘確期而臣病綦篤晷刻難支正值  
甘事喫緊之時豈堪再誤甯夏將軍臣穆圖善  
不日進省其勇於任事精於戰陣百倍於臣且  
素爲諸回所畏服紳民所愛戴若以之暫署督  
篆免臣負病貽誤實於軍務大有裨益可否

飭下穆圖善馳赴省城暫署總督印務如蒙  
恩准則事勢不致決裂上可紓

朝廷西顧之憂下可救水火不遺之衆軍務幸甚

甘民幸甚

楊岳斌又奏言臣病乃多年積勞所成今諸證  
全行舉發實非一時醫藥所能愈平生賦性迂  
拙從不敢以生死置懷惟

朝廷高厚之恩與父母鞠育之德涓埃未報厚日  
實難現今父母病危臣病又深顧當此臥牀待  
盡不能辦公臣職已忝若復不克一見病親之  
面子職亦慚是於事

君事親之道兩有虧缺亦復何以爲心我

皇上孝治天下伏懇

恩施格外垂憐臣病

准令回籍調理臣疾獲痊則犬馬有生之年皆可勉爲

報

恩之日卽或沈疴不起而故山骸骨亦銜感

聖主鴻慈臣魂魄有知當必求所補報伏枕涕泣不知所云

楊岳斌又奏言上年九月內洮州都司丁永安令所部衆回在城內高阜築堡二處明謂禦賊

明史紀事本末卷之三十三  
三  
暗禦官兵十月初閒適有回子馬隊至狄河勾  
結回匪竄至長喇嘛川千家寨一帶副將周潮  
旺往勦未能得手收隊回城十四日該回即於  
四更時自堡內撲出官軍迎勦斃賊百餘仍追  
賊進堡城外喇嘛川等處回匪猝至堡內回匪  
追出內外夾攻周潮旺敗退陣亡勇丁百餘人  
退至岷州丁永安復誘殺舊洮城都司雷興隆

副將馮光明教授劉升嶽及城內漢民百餘家  
此時洮州新舊兩城太平寨千家寨汪家觜喇  
嘛川回匪連接駐紮狄河竄匪亦在洮州盤踞  
臣查副將周潮旺及各營營官既有防守之責  
乃事前不能豫制臨事又復敗退貽誤實非淺  
鮮相應請

旨將周潮旺及該營營官副將魏紹珍參將田大勝都

司張廷秀一併革職留營立功自贖丁永安本  
係回員生謀倡亂罪大惡極請

旨將丁永安先行革職俟擒獲就地正法署洮州同知  
熊其光並不居城託故避居卓泥地方城中漢  
回交涉事件概置不管以致營勇飢困回黨生  
心似此恇怯不職藐玩誤公亟應從嚴懲辦請  
旨將熊其光卽行革職發往黑龍江充當苦差被害之



副將馮光明教授劉升嶽都司雷興隆皆義不  
從賊致遭戕害請

旨飭部從優議卹以慰忠魂奏入

上命軍機大臣傳諭穆圖善楊岳斌曰楊岳斌奏病勢  
甚篤請派員暫署督篆並懇回籍調理各摺片情詞  
懇切覽奏具悉若再勉強挽留朝廷亦有所不忍惟  
穆圖善勤辦東路回匪並安撫已降之衆在在均關

緊要一時能否遽赴省垣尙須斟酌情形悉心籌辦  
不致顧此失彼方爲妥善楊岳斌俟穆圖善到省接  
署督篆後將一切情形詳細告知再議起程勿得遽  
行回籍致誤公事穆圖善西赴蘭州後其東路防務  
關繫緊要馬生彥等甫經投誠尤當妥爲駕馭應派  
何人駐紮卽著該將軍酌量辦理毋得稍涉疏懈楊  
岳斌又奏洮州回匪叛據城池一摺回弁丁永安乘

機復叛據城抗拒實屬罪不容誅洮岷協都司丁永  
安著先行革職於擒獲後卽在軍前正法以昭炯戒  
副將周潮旺等帶兵防守致有失事厥咎甚重副將  
周潮旺魏紹珍參將田大勝都司張廷秀均著卽行  
革職留營効力立功贖罪儻再不知愧奮卽著按照  
軍律懲辦署洮州同知試用府經歷熊其光託故避  
居屢催不赴情尤可惡著卽革職發往黑龍江充當

苦差被害之洮岷協副將馮光明洮州教授劉升嶽  
舊洮營都司雷興隆均著交部從優議卹洮州在河  
狄之西該處回氛遍地勢悍人多其應如何進勦之  
處著穆圖善於抵省後妥籌勦辦用副委任

上又命軍機大臣傳諭左宗棠曰前據左宗棠奏抵甘  
肅時請暫留楊岳斌在甘辦理本日據楊岳斌奏稱  
八旬父母患病沈重而該督病亦增劇請飭穆圖善

暫署督篆覽其情詞懇切實不忍再行挽留因令穆  
圖善馳赴蘭州暫署督篆以便楊岳斌交替回籍惟  
穆圖善西赴省垣東路防務恐無人認真堵禦該大  
臣到陝後尙須經理關中回擒各匪方能赴任則東  
路防務實爲陝省門戶要區左宗棠此時計可啟程  
入關著於馳抵西安後斟酌情形相機辦理免致掣

肘

楊岳斌又奏言曹克忠所部各營上年擊敗鴛  
鴛鴛三岔河牛營子大股回逆平毀華家嶺牛  
營溝逆巢收復洮州廳城經臣併請

獎勵當蒙

恩允查各將士進復洮城冰天雪地冒險衝寒實屬不  
避艱苦而鴛鴛鴛華家嶺等處之捷尤屬奮勇  
用命今洮回復叛凡疏於防範各員臣已請

聞

旨革職發遣其疊次出力弁勇未便沒其微勞仍擬擇  
尤酌保以期賞罰分明奏入報

同日吉林將軍富明阿副都統富爾琮奏言礮  
手一項皆係民戶若以整裝官兵之項募而遠  
征勢難響應幸阿勒楚喀副都統德英生長斯  
土於礮手性情熟習抑且何路山屯最大居民

最多有無應募得力可靠者既能周知而協佐防驍等官內何員賢幹尤屬屈指可數茲奉

諭旨所有挑選事宜卽恭錄飛咨該副都統或在阿勒

楚喀辦理或赴各處親加選募抑或交卸來省

專司其事以期妥協俟該副都統咨覆臣等再

督同辦理並已先行分飭地方各員一體欽遵

幫辦惟採辦鞍韉三千盤所費甚鉅庫存實無



此款惟有仰懇

天恩飭部先行籌撥再遵

飭佐領喜昌於假滿後統帶新募馬隊仍赴左宗棠軍

營聽候差委查吉林出征存營各官冊內僅有

鑲紅旗滿洲協領喜昌該員現在湖北軍營曾

否告假回旗臣等未准行知無憑查覈此次奉

旨飭催假滿赴營之佐領喜昌是否卽係現在湖北軍

營之協領喜昌應請

旨飭下兵部查明咨覆以憑遵辦奏入

上命軍機大臣傳諭富明阿富爾菴德英曰吉林挑募  
礮手赴左宗棠軍營前經諭令德英專司其事現據  
富明阿奏稱德英熟悉挑募事宜卽著該副都統酌  
量情形迅速籌辦此事總須挑選材力精壯技藝嫻  
熟之人雇募足額不得以老弱充數仍著富明阿富

爾菴揀派委員幫同辦理所需管帶勇丁之協佐防  
驍等官卽由德英選派以期得力其採辦鞍靴及軍  
械整裝等項需銀七萬兩並著照左宗棠所奏由部  
庫迅撥吉林應用仍由山西應解左宗棠甘餉項下  
撥還戶部協領喜昌卽係湖北軍營告假回旗之員  
著富明阿於該員回籍後迅卽飭令管帶新募礮手  
前赴左宗棠軍營聽候調遣

二十八日

壬子

喬松年奏言甘省回逆分股擾陝

經

臣

派令劉厚基劉效忠邱時成洪殿元何玲

必等軍先後趕往追勦劉厚基馳抵三原該逆

竄向富平該提督復跟蹤追至該逆遂以全股

盤踞耀州之柳林地方希圖抗拒並分股擾及

同官縣境該縣猝未及防致被逆匪闖入當日

卽經該縣將賊擊出而賊仍在四鄉劉厚基等

聞信卽馳至柳林直攻賊壘該逆見我軍一至  
卽拋棄輜重紛紛奪路北竄其擾及同官之賊  
聞柳林之賊敗遁一併向北狂奔劉厚基等由  
同官宜君一路跟追該逆未敢片刻停留連夜  
竄出陝境其時有另股回逆由甘省正甯竄至  
乾州醴泉一帶意欲東趨劉効忠一軍當卽趕  
往迎剿行至橋底地方與賊相遇我軍奮力截

擊逆勢不支悉向西北羅村趙村一帶狂竄該  
總兵疾馳百餘里亦追出陝境惟又有一股自  
靈臺竄來賊勢甚衆直赴鳳翔其游騎已至岐  
山扶風現飭譚玉龍秦國輔兩軍由興平武功  
趕往堵剿此軍本防渭河旣須南防擒賊又須  
北防回逆深慮兵單現又抽調劉効忠邱時成  
洪殿元馬隊及何玲必步隊前往助剿猶慮不

足制勝至邠邠等處軍情已悉而悉安所屬膚  
施安塞甘泉等縣又報見有回逆臣已咨明延  
綏鎮總兵陶茂森帶兵出擊察看回逆股數甚  
多仍必續竄入境劉厚基一軍原擬馳往鄜州  
今鄜州無賊祇可分駐於宜君耀州之間以資  
控制何處有警卽向何處開拔庶可兼顧奏入

上命軍機大臣傳諭喬松年曰甘省回逆分股擾陝經

喬松年派令劉厚基等馳往勦辦柳林同官之賊向北狂奔竄出陝境乾州醴泉另股賊匪亦經劉効忠擊敗出境又有一股自靈臺竄赴鳳翔游騎已至岐山扶風該撫現飭譚玉龍等前往勦辦酈州已無賊蹤令劉厚基一軍分駐宜君等處所籌尙妥著卽督飭譚玉龍等認真迎勦鳳翔一股劉厚基隨機策應以資得力柳林同官乾州醴泉之賊雖出陝境未受



痛創該匪股究向何路竄去摺內未據聲明嗣後奏報務將賊由何處竄入何路竄去賊首何人賊數多少詳查具奏不准疏略含糊致干咎戾摺內所稱察看回逆股數甚多仍必續竄入境著督飭地方文武軍練確探嚴備毋令肆擾

喬松年又奏言此次逆回竄入陝境宜君同官耀州三原等處同時告急惟劉厚基率軍與之

縱橫角逐 臣 前慮該提督兵力甚單是以請調

庫克吉泰等軍迅赴北路今庫克吉泰已改道

勦擒而劉厚基竟能晝夜窮追不使喘息將宜

君同官等處踞賊悉行擊退雖因賊衆兵單未

能痛殲醜類而其往來馳勦實屬奮勉出力不

辭勞瘁該逆未卽勦滅 臣 未敢遽爲請獎應將

該提督勞績由 臣 先行存記一俟再有卓著戰

功一併奏懇

恩施以昭激勸奏入報

聞

同日成祿文麟奏言哈密爲新疆南北兩路總  
匯之區地方遼闊要隘頗多今該城新克諸形  
糜爛必得設法整飭廣爲招徠尤須重兵鎮守  
用資彈壓現雖有巴里坤暨安西等處兵勇前

往屯紮仍覺單弱况伯錫爾屢次請兵自當由  
口內帶隊往應以慰人望而壯聲威 臣等會同

商酌卽帶 臣文麟添設威儀營一軍迅速出關

暫資鎮撫擬再續行招募以厚兵力惟 臣文麟

營內軍裝尙未齊備行糧更屬維艱 臣成祿

思騰挪數千兩代爲籌辦奈各省協餉未到自

顧不遑除咨明督 臣並移知現署甘涼安肅道

黎獻轉飭西路所屬各地方官就地籌捐軍餉  
銀五六千兩並供支口糧草料車輛等項以應  
出關要需俟至關外再由 臣 文麟飭令安西等  
處設法籌備並知照伯錫爾在於星星峽境界  
接替供支節節轉籌前進庶不致有裹足之虞  
臣 文麟趕緊料理帶隊赴任不敢稍涉因循俟  
到哈密會同伯錫爾悉心布置仰副

聖主委任之意

文麟又奏言十一月初十日接據哈密回王伯錫爾文開哈密駐紮各處兵勇三千有餘支發尙堪粗備若大兵出關應支更繁實難應付懇請轉催甘涼所撥餉銀敦煌所撥糧石隨帶前來備支等情臣思哈密防守兵勇及將來成祿各軍到境糧餉一切應支甚繁若僅由該回王

籌備誠恐力有未逮合無仰懇

天恩飭下山西撫臣由司庫存儲無論何款內籌撥軍

餉銀十萬兩委員迅解烏里雅蘇台轉運哈密  
或恐一時籌運不及並請

飭令烏里雅蘇台將軍並統兵大臣李雲麟將庫存轉  
運新疆協餉內先行提撥四五萬兩一面由臣  
派員前往領取俟所請山西之餉解到該城以

便歸款庶通融辦理不致遲誤至哈密素本缺糧向由奇台敦煌等處採辦今該城新克地方人民尙未復業就現時之糧似不足應用 臣咨明陝甘督 臣 迅飭敦煌縣先於倉儲項下指撥倉斗小麥五萬石迅卽輓運以顧軍食

文麟又奏言

臣

派隊會同成祿所部已革沙州

營參將趙德正一營並黎獻所部馬隊前往南



山扁渡口勦賊行至甘州附近之南山豐化堡  
陡遇賊匪卽經我軍截堵擊斃馬賊三名步賊  
十餘名該逆向東南逃竄嗣於八月間臣復派  
全隊赴肅州助勦因高臺毗連肅州兼近南山  
賊匪往來無常將派往之隊留紮高臺五十里  
之黑泉驛藉資防勦旋於八月二十三日並十  
月初九等日由肅州出竄之匪兩次滋擾高臺

鄉莊並圍撲黑泉營均經我軍奮力擊退茲於  
本月初二日接據代理高臺縣知縣秦惠鈞飛  
稟十一月二十四日突有東路竄來回匪馬步  
數千餘衆由撫彝南邊威狄堡擾至縣屬南鄉  
三清渠一帶勢甚猖獗等情 臣 卽飭秦惠鈞妥  
爲布置防範旋據稟報該逆馬步賊匪於二十  
五日卯刻直撲東關正在危急之際幸勇目魏

忠義等由黑泉聞信卽帶馬步各隊亦於是刻  
趕到會同該縣城所紮兵勇奮力向前接仗連  
戰三日三夜殺斃賊匪頗多該逆見勢不敵始  
於二十九日陸續西竄此次接仗共計傷亡勇  
丁三十餘名現飭秦惠鈞等督率防守保衛地  
方查威儀營兵力過單軍械等物不敷應用而  
軍餉又復不繼尙能勉持大局該弁勇節次出

力未便壅於

上聞

文麟又奏言臣正在甘州守催黎獻籌捐款項  
料理赴任適於二十一日接准提臣成祿咨送  
摺稿前來知哈密逃逆蘇皮蓋勾結吐魯番纏  
頭四千名漢回三千餘名竟於本月初九日復  
將哈密攻陷回王逃走該城漢回羣起從逆臣

聞悉之下焦灼萬狀必應趕緊前往當經設法  
摒擋三千金又經黎獻在於甘州商民捐項內  
撥給市錢六千串藉資籌備惟軍器帳房號衣  
等項刻雖製備齊全容俟稍有端倪卽行帶隊  
出關進紮安西一帶督飭協同防堵一面續募  
勁旅布置營務以待成祿出關再與會圖進取  
值此軍務喫緊亟當圖效斷不敢稍有遷延自

取咎戾奏入

上命軍機大臣傳諭成祿文麟趙長齡曰哈密失陷前經成祿楊岳斌等疊次奏報成祿等此次所奏籌辦招徠鎮撫等事尙係未經失陷以前情形文麟現擬製辦軍裝行糧進紮安西卽著趕緊布置起程惟目前哈密賊匪分撲巴里坤甚急若待成祿出關會同進取誠恐巴城有失則哈匪之勢更張况昨據伊勒

屯等奏據獲賊供稱哈城賊匪均得財偷走其勢稍分攻取甚易文麟當迅帶所部乘此機會攻取哈密其原派駐守哈密之兵勇三千名是否潰散並可沿途招集以厚兵力巴里坤被圍已諭令李雲麟派蒙兵星速往援若文麟兵至哈城則賊匪前後受敵似可得手成祿久攻肅州不下殊屬疲緩務須立圖攻拔趕緊出關不得再事遷延致負委任哈密回王伯

錫爾避往何處著文麟探明所向仍與聯絡聲勢會  
籌辦法文麟出關後軍餉極爲緊要著趙長齡飭藩  
司無論何款迅撥銀十萬兩解交烏里雅蘇台以備  
文麟派員迎提如一時籌運不及卽咨行德勒克多  
爾濟李雲麟等先在新疆協餉內提撥四五萬兩以  
應急需俟晉餉解到劃出歸款其指撥倉穀籌捐軍  
餉等事並著文麟咨明該地方官辦理南山高臺等



處竄匪疊經威儀營勇擊剿獲勝出方弁勇著文麟  
暫行存記仍飭該營勇等加意防剿

中國書畫圖目

四

一

欽定平定陝甘新疆回匪方略卷一百五十一

中興書院藏書

三月初二日丙辰成祿奏言上年十一月

中興書院藏書

股賊匪圍攻高臺縣城甚急臣派王蘭譜等帶

隊會同黃祖淦之軍分道赴援此股賊匪係肅

逆勾來西甯援賊馬步不下萬人一聞官兵救

應卽撤高臺之圍悉衆西趨與我軍相遇鎮夷

倉卒接仗因北路邊牆一帶悉係砂磧我軍均

三國志卷之二十一  
一  
係步隊不能遠及該匪旁竄毛目沿山而西直  
撲金塔時謝長青一營在彼留紮督率民團竭  
力防守凡三晝夜斃賊頗多圍撲愈猛謝長青  
出城迎敵身受重傷該逆兇斂更張孤城垂陷  
王蘭譜等知該逆竄由北路勢必繞圍金塔卽  
商同黃祖淦仍由東道撤回徑赴金塔救援臣  
亦派竇型督同馬天祥等星馳往援三路夾擊

逆衆大敗金塔之圍始解該逆敗北後遂分股  
散布九蓮寺兩山口祁家溝等處占踞民堡數  
十處賊卡如林負隅抗拒約計盤踞地方縱橫  
百里以致各路梗塞我軍糧草火藥漑難轉運  
王蘭譜因率衆追勦骸中槍傷臣復飭寶型督  
同馬天祥挑選各營精銳會合黃祖淦四營於  
除夕元旦乘賊無備奮力掩襲攻破賊壘二十

餘處殺賊千餘名逆勢漸怯卽由郝家溝等處退至兩山口麴聚十餘營初四日竇型卽督率馬天祥等由北路黑水溝兜抄該逆後路令黃祖淦督率譚鷗匡茂通等由謝家屯莊西路進擊並傳令謝長青挑選奮勇由金塔東路進擊九蓮寺逆衆之頭營定以信礮爲號同時殺入逆衆登時潰亂守備楊永先奮進賊營槍傷逆

首江湖馬三逆衆搶獲馬三盡棄輜重望南路  
狂奔我軍跟蹤追剿兩晝夜喘息未定直追至  
金佛寺口且戰且逐共斃賊匪五千餘人救出  
難民婦女二千餘名奪獲糧石器械駝馬無算  
該匪技窮勢蹙遂由金佛寺紅崖子一帶由東  
路四竄先是該逆知援賊已到料我軍分隊迎  
擊留營單薄卽分股四竄擾近二墩臨水等處

意在截我糧道 臣親督在營將士嚴加防範正

月初六日肅城首逆僞元帥馬文象探明援賊已爲我軍擊敗大隊追勦遠出親領悍賊千人

直前逼撲衛隊營盤 臣當飭楊永魁督率奮勇

百餘名隨帶火器衝圍入營助力堅守該逆填越重壕放火延燒二層木柵楊永魁見勢危急開放洋槍擊中僞元帥馬文象立時殞命賊衆



搶屍紛紛潰亂適寶型在南山追勦敗匪聞肅  
逆圍營恐有疏失卽帶楊永先師玉春等先行  
輕騎馳回楊永魁卽出營夾擊肅逆自相踐踏  
死者無數先後斃賊約共五六百人當此軍聲  
大振賊膽盡落堅城不難攻拔更聞楊岳斌派  
王仁和帶領數營前來接替此軍若到愈增聲  
勢則肅州之克更有把握所有此次尤爲出力

員弁先行開列奏請

恩施陣亡員弁並懇

飭部從優議卹

成祿又奏言上年冬閒回逆兩次圍攻高臺在  
城文武協力同心登陴固守自去春臣進規肅  
州各營糧草專恃該委員房廷華該署縣秦惠  
鈞等極力勸辦源源接濟藉資飽騰而軍火一

切尤賴該員等設法轉運得無貽誤實屬著有  
微勞自應量予獎敘所有署高臺營千總王有  
知縣秦惠鈞典史張鐘知州房廷華一併奏懇  
恩施奏入

上命軍機大臣傳諭成祿曰肅州踞匪勾來西甯援賊  
萬餘人圍攻高臺成祿派王蘭譜黃祖淦等軍馳援  
獲勝賊西撲金塔成祿復派竇型等與王蘭譜等會

勦逆衆大敗分股散布九蓮寺等處復經竇型等奮  
力攻襲共斃賊五千餘人救出難民婦女二千餘名  
肅州踞賊探知官軍遠勦親率悍賊撲營楊永魁開  
槍將僞帥馬文象擊斃竇型旋師夾擊共斃賊五六  
百人當此餉缺逆熾之時均能奮勉力勦尙屬可嘉  
目前肅逆援絕膽寒亟宜乘此聲威立圖攻拔著成  
喉激勵將士勉益加勉以期迅奏膚功同膺懋賞成

祿前奏請獎金塔等處守城出力員弁曾諭令准其  
擇尤保奏現在肅郡剋期可拔所有此次出力各員  
併前次請獎官紳均著成祿暫行存記俟肅郡克復  
後彙案保奏陣亡之從九品張際午儘先守備羅德  
揚繼續千總胡正照經制外委趙文海均著交部從  
優議卹以慰忠魂另片奏高臺縣印委等官守城運  
餉均無貽誤請予獎敘等語著一併俟肅州克復彙

案保奏

初三日丁巳左宗棠奏言臣所謂各營於本月上

中兩旬陸續到鄂臣逐加點驗舊部尙多卽分

撥車礮酌增槍隊編爲前中後三路十五營臣

自統親兵營十哨及先鋒後勁新前新左四營

旗馬隊五起以利分布二十日令總兵劉端寬

周紹濂率前路中路十營啟行二十四日臣率

總兵楊和貴後路五營馬步各營旗繼進擬由  
雲夢德安隨州以達襄陽其劉典所募之四營  
亦已到鄂 臣 飭暫駐漢口俟劉典率親軍左右  
兩營及後營到鄂隨同前進中書吳士邁之宗  
岳兩營甘肅臬司張岳齡之平江三營廣東提  
督高連陞之米勇八營則尙無來鄂消息前奉

諭旨務須保固同朝等處兼顧山西勿爲回氛肆擾 臣

維防河之要必先由潼關堯勦而西而臣軍不能速進鮑超所部馬步全軍原擬由荆子關入秦臣奉

諭後比卽恭錄咨行並緘商於入荆子關過龍駒寨後取道劉先坪出大峪口以達潼關頃得其覆緘以荆子關一路山徑崎嶇難以整隊過行改由宛洛以入潼關本月十五日已由樊城啟行臣



軍到襄樊時鮑超全軍必已由潼關入秦如同  
朝有警自可渡渭援剿 臣軍行過龍駒寨時亦  
當相機兼顧竊計解凍以後河防宜易爲力也  
奏入

上命軍機大臣傳諭左宗棠曰陝省拾回合擾亟須知  
兵大員前往調度該督聲威素著一經入秦坐鎮自  
可騰出陝省兵力併入前敵以利攻剿所有置造軍

械及練兵籌餉各事宜卽可於到秦後統籌全局次第經理庶將來肅清兩省計出萬全現在該督旣已西行秦中自可無虞鮑超一軍著仍遵前旨留於鄂豫將任賴逆股剿滅再行移師入關

初九日 癸亥 喬松年奏言查管帶義字營記名總

兵段登雲帶領三營向駐鄜州相近之河上塬防堵回匪日前回匪從慶陽甯州竄鄜不能堵

遏尾追其後中途遇賊接仗失利損失勇丁四百餘人該總兵折入鄜州爲防守之計頃據鄜州稟報段登雲回鄜州後該營勇丁譚潰乘勢打開監獄放出監犯多名並擄去庫銀七百餘兩經該州再三勸慰始行歸營臣聞信之下不勝駭異查段登雲既不能力禦賊氛復不能嚴束各勇致令譚潰滋事貽害地方實堪痛恨現

已札飭劉厚基自帶兩營趕往鄜州將滋事勇  
丁查出嚴辦並將所餘勇丁應撤應留分別辦  
理段登雲雖無縱兵爲變情事然約束不嚴實  
屬無能應請

旨將記名總兵段登雲卽行革職毋庸留營以示懲儆  
署鄜州直隸州知州田景瀛於監庫不能嚴防  
被劫亦難辭疏失之咎應請一併革職暫行留

任責令緝拏監犯現在甘省大股回逆紛紛東  
竄勢將盡趨陝境而擒逆竄踞扶岐之交已與  
回匪前股勾合陝省僅此兵力莫名焦灼臣接  
督臣左宗棠來信已飭鮑超一軍來陝惟盼該  
軍早抵陝境可以合力痛勦免致勾合爲患奏  
入

上命軍機大臣傳諭左宗棠喬松年曰甘省大股回逆

勢將盡與捨合左宗棠現已起程著卽兼程前進與  
喬松年會商勦辦段登雲所部勇丁在鄜州劫獄擄  
庫該總兵旣不能禦賊又約束無方著卽革職不准  
留營以示懲儆署鄜州知州田景瀛疏於防範著一  
併革職暫行留任陝省軍政久弛左宗棠喬松年當  
申明紀律嚴定賞罰以挽積習所有滋事勇丁卽嚴  
拏懲辦將此軍勇丁應留應撤酌量妥辦毋令從逆

生事鮑超一軍前已諭留鄂皖勦擒左宗棠帶兵入關後騰出陝省兵力合併郭寶昌劉松山兩軍計數目前分布該大臣當遵前旨坐鎮關中妥籌勦辦陝省探報多有爲從逆之潰勇所誤該大臣等宜詳慎審察

十三日丁卯李雲麟奏言臣前招集民勇分立三營防堵巴里坤一營令勇目孔才管帶一營令

勇目張和管帶均令各集舊部飭參將富貴另募一營選擇精銳立爲臣親兵營卽派該參將管帶以資鈐束諭令勤加操練冀成勁旅臣卽旋科隨令富貴出駐察罕同古料理屯田詎料臣行後該勇丁潛行逃回搶奪蒙古牲畜孔才出營查辦續有未經收錄勇目潛回孔才營中煽惑衆勇謂裁汰勇丁皆係富貴之意遂於正



月二十一日聚衆圍富貴營盤將官厰所存駝  
馬牛羊並札哈沁游牧附近牲畜一併搶去其  
時科城附近各游牧皆驚慌欲逃

臣

聞信卽商

同奎昌明瑤親赴該處相機查辦隨於初三日  
率遊擊訥謨津等由科起行及行至該處此項  
潰勇仍挾孔才爲首赴奇古逸北漢三臺一帶  
盤踞

臣

當將現獲該營勇丁數人梟示並將被

難蒙古百餘戶酌給牲畜以安人心一面馳函  
邀棍噶札拉叅面議此項民勇曾經與賊接仗  
出力若遽發兵進剿則恐鋌而走險若置而不  
顧則蒙古游牧不安因議定將該呼圖克圖所  
帶蒙兵三營留一營在烏隴古河偕同土爾扈  
特親王車林拉布坦新近派就之兵防哈薩克  
之東侵該呼圖克圖率親兵一千移紮察罕同

古迤西數十里之布爾滾河以固科城門戶若  
回逆有北犯之信及變勇復來搶掠相機堵剿  
並飛咨烏城將軍等一體嚴防此項民勇變亂  
總由臣布置不善之故俟將遺失軍器牲畜等  
項查清後另行具摺請罪奏入

上命軍機大臣傳諭李雲麟奎昌明瑤成祿伊勒屯何  
瑄曰李雲麟所募勇丁三營分防巴里坤因參將富

貴營中被裁之勇潛與孔才營中勇丁勾結圍攻富  
貴營盤於察罕同古並將官廠及札哈沁游牧附近  
牲畜搶劫李雲麟現派蒙兵分紮烏隴古河等處著  
與奎昌明瑤相機堵剿並知照烏里雅蘇台一體嚴  
防以固北路門戶前據伊勒屯何瑄奏調孔才所部  
勇丁赴援巴里坤並稱李雲麟扣除勇營鹽菜銀兩  
以致勇丁意存劫奪牲畜是李雲麟之措置乖方早

兆釁端此時該勇旣經潰變伊勒屯等亦當慎加防  
範不可稍涉大意能將此項潰勇酌量招集妥爲駕  
馭更可免意外之虞關外敦煌安西等州縣並著成  
祿分兵往守以防潰勇東竄一面迅克肅州統兵出  
關進剿毋稍遷延

同日穆圖善奏言 臣前飭回目馬生彥楊文治  
等趕緊呈繳馬匹軍械派遊擊銜馬萬選等前

赴半箇城一帶會同該回等造具戶口清冊呈  
送來營以憑點驗並飭令楊文治馳赴慶陽開  
導回衆旋於二月初五至十五等日該回等陸續  
呈繳馬二百餘匹刀矛八百餘件槍礮二百  
餘件據稱不敢隱匿當卽分撥各營令其靜候  
安插惟戶口清冊尙未造齊楊文治亦未回營  
正在催辦閒連奉

諭旨飭令赴援慶涇謹擬於三月十二日督率步隊二十一營馬隊七營又効勇營馬隊五十名分作四起由甯安堡石空寺堡等處陸續拔營取道延鄜直趨慶郡兼顧陝疆惟大兵遄征種種掣肘有不能不縷陳於

聖主之前者 臣軍日支糧米以包頭磴口採買爲大宗刻下兩處積欠糧價銀約計在三四十萬兩之

數勢難再行賒欠向來秋冬轉運專恃阿拉善  
及蒙古各旗籌辦駝隻春夏半由水運茲 臣遠  
赴慶陽卽有清水河碾運之倉穀而花定迤南  
山路險峻駝行不便不免有停兵待糧之患必  
須發給現銀俾作衣履鹽菜等費合無籲懇

天恩飭下陝西撫 臣於該省北山產糧各州縣額徵糧  
石內援照奏准動撥額糧成案由 臣隨時酌量



提用以期稍濟軍食此項糧石請卽在陝省應  
解臣大營月餉內折銀抵扣並請

飭下山西撫臣將清水河倉穀暫時停運仍按月籌撥

餉銀以資接濟至陝回不難收撫而難於安插  
甘回未離故土是以反正較易陝回則田園廬  
墓蕩然無存顛沛流離鋌而走險其心未嘗一  
日忘故土也此時在甘省暫行擇地安插亦不

過略示羈縻無論其繫念故鄉時懷缺望卽甘  
省土地磽薄物產無多驟添數萬生齒亦無以  
善其後況客民與土著情意難洽偶有蠻觸之  
爭動逞豺狼之性勢所不免臣愚昧之見將來  
必使之仍歸陝西本籍桀驁者令其隨營効力  
立功自贖馴謹老弱者各安耕鑿如此因勢利  
導庶足以上紓

皇上西顧之憂無如陝省漢紳視回如仇動謂收撫之  
事必不可行殊不知回種幾徧天下誅不勝誅  
勦撫兼施計莫善於此否則相持日久餉竭兵  
疲大局何堪設想臣見聞所及謹據實密陳伏  
候

聖裁再前督臣楊岳斌屢以病重爲言臣大兵去後鎮  
撫無人設有疏虞所關匪細請

飭督 臣

左宗棠速赴新任以重巖疆而持危局

穆圖善又奏言 臣 此次移兵東進所有留駐甯

夏府之選鋒三營直晉官兵應需餉銀必須豫

爲籌畫方免譁潰之虞查山西省應解 臣 軍月

餉現由 臣 奏請停運倉穀按照舊章全數解銀

每月計四萬餘兩應請

旨飭下山西撫 臣 按月分撥銀一萬兩委解甯夏其餘

銀三萬餘兩仍解 臣行營至直晉官軍餉銀該省久未撥解兵丁困苦異常請

旨飭催晉省迅速籌撥尤恐遠道轉輸一時不能接濟所有甯夏府屬各州縣額徵糧石擬請按照 臣前次奏准成案由護理甯夏將軍金順酌量情形隨時提用以濟軍食而維衆心奏入

上命軍機大臣傳諭左宗棠穆圖善楊岳斌喬松年趙

長齡曰回目馬生彥等呈繳馬匹軍械爲數不多雖  
據聲稱不敢藏匿究亦難於輕信著穆圖善再行酌  
量情形妥籌辦理務使勿墮詭計以靖地方慶陽被  
圍甚急穆圖善所帶馬步兵力不爲不厚卽著於行  
抵該處後奮力攻勦不許稍有遷延其甯安堡地方  
關繫緊要並著楊岳斌抽撥一軍前往駐紮派委妥  
員點驗降回戶口辦理安插事宜穆圖善所陳陝回

不難收撫而難安插甘回未離故土反正較易陝回  
則田園廬墓無存在甘擇地安插究屬時懷缺望各  
等語甚爲有見陝回人數尙多被勦竄甘而地方瘠  
苦覓食無資其懷思故土亦屬至情雖從前不無罪  
戾而盡數勦除亦非仁者之用心甘省土地磽瘠斷  
難久容而陝省漢民積釁已深又恐不能相安左宗  
棠向來善於謀畫著卽察看民情地勢妥爲經理或

令壯勇者隨營老弱者給以耕種俾得生聚安樂同  
爲率土良民喬松年身任地方亦著悉心諮訪認真  
辦理穆圖善移軍東向採糧較難陝省北山各州縣  
額徵糧石著喬松年飭令聽候該將軍酌量提用卽  
在陝省應解穆圖善月餉內折銀抵扣山西清水河  
倉穀卽可暫時停運著趙長齡仍按月撥解銀四萬  
兩以一萬兩解交甯夏三萬兩解赴穆圖善行營直



晉官兵月餉該省久未撥解並著趙長齡迅籌撥解  
儻一時不能接濟卽著於甯夏所屬各州縣額徵糧  
石內提用以應急需而贍軍食

穆圖善又奏言甯夏回民花翎遊擊銜馬萬選  
赫壯圖自就撫以來隨營効力一載有餘前經  
臣派委查辦陝回馬生彥楊文治等投誠事宜  
並前往鹽固一帶安插該回等股衆近復飭令

馳赴半箇城督造戶口清冊實屬不避艱險奮  
勉異常又甯夏回民遊擊銜王三春候選遊擊  
馬耀邦都司銜赫忠美藍翎千總馬敬六品藍  
翎赫忠義馬明起靈州回民五品軍功談生彰  
等隨營帶隊打仗奮勉臣未便沒其微勞謹據  
實聲明籲懇

天恩准予獎敘所有馬萬選赫壯圖二員擬請

賞加副將銜王三春馬耀邦赫忠美三員擬請

賞戴花翎馬敬談生彰二員擬請

賞給四品頂戴花翎赫忠義馬明起二員擬請

賞給五品頂戴花翎以昭激勸而策將來奏入

上從之



欽定平定陝甘新疆回匪方略卷一百五十二 丁卯年

三月十五日 己巳 庫克吉泰德興阿喬松年奏言

擒匪勾結鳳翔回逆併力抗拒官軍劉松山等  
軍過河擊賊於羅渠鎮譚玉龍等軍扼賊於扶  
風先後均有斬擒賊匪仍欲渡過渭南回竄因  
爲劉松山等追軍所阻遂於三月初二日全股  
向東北狂奔由菊村鎮杏林鎮竄往醴泉一路

其行甚疾鳳翔回逆亦分股同時東竄其時郭  
寶昌一軍正由三原向咸陽進發中途適遇東  
趨回逆當將該逆擊敗生擒十餘名陣斬百餘  
名臣松年已飭該軍徑赴醴泉迎頭截剿臣庫  
克吉泰等督飭馬隊與劉松山黃鼎譚玉龍等  
軍分道跟追亦均拔隊前進俾可與郭寶昌之  
軍前後夾擊惟該逆此次東趨據獲賊供稱回

衆會商欲以擒逆竄擾同朝回逆撲犯省城使  
官軍不能分應其兇狡情形尤堪髮指且甘回  
股數衆多皆欲乘虛東竄現竄鳳翔爲首者卽  
向在甘省張家川之李得倉一股臣松年接雷  
正緒來信又有回首何學德郭阿渾等股均將  
下竄等語查陝省現有之兵全力勦擒尙嫌單  
薄若甘回傾巢大至則是腹背受敵更難兼顧

除函致山西臬司陳湜嚴防黃河外臣等惟當  
激勵諸軍迅速併力奮擊總期竭力支持惟盼  
左宗棠鮑超早來甘省方可大張撻伐以冀廓  
清奏入

上命軍機大臣傳諭左宗棠穆圖善庫克吉泰德興阿  
楊岳斌趙長齡喬松年陳湜曰擒股爲劉松山等追  
軍所阻全股向東北狂奔竄往醴泉一路鳳翔回逆



亦同時東竄據獲賊供稱該逆會商欲以擒逆竄回  
朝回逆犯省城使官軍首尾不能相顧甘回何學德  
等股均將下竄陝省情形甚爲喫重著庫克吉泰德  
興阿喬松年督飭劉松山等會師進擊勿任勾合分  
擾兼顧省城門戶甘回股數衆多皆欲乘虛東犯著  
穆圖善楊岳斌督飭雷正綰等認真截剿牽掣賊衆  
毋任併力下注左宗棠現已帶重兵入關計日可到

西安卽遵前旨在省坐鎮酌度何路喫緊迅卽添兵  
前往節節掃蕩務當統籌全局妥爲調度以紓朝廷  
西顧之憂晉省完善之區該逆久生窺伺著趙長齡  
督飭陳湜悉力嚴防不可稍涉大意

同日何瑄奏言自去年哈密復失巴城糧道斷  
絕闔郡軍民咸受饑困迨至今春餓斃者不可  
勝數四鄉戶民被賊數次蹂躪無力耕作大兵

出關無期數萬生靈奄奄待斃 臣晝夜焦急寤寐難安不得已倡率署鎮西廳薩明等共同商議在於通城儘力勸捐共捐銀二千數百兩辦買口糧招集勇丁力圖攻克哈密以通糧道而救闔郡之命軍民間知莫不踴躍樂從當卽派委鄒鳳賢等專司募勇勸捐之責旬日之間報募壯勇八百名又調集張和練勇五百名東山

纏頭六百名在本標四營挑選精壯官兵六百  
名本城四門團勇五百名四鄉戶勇三百名隨  
派千總芮林趙萬海統領各營官兵鄒鳳賢並  
勇目張和等管帶民戶各勇均於二月十九日  
自巴里坤起程進勦一面飛調孔才所部勇丁  
趕緊赴坤作爲後路接應守城之事派委遊擊  
陳升恆等帶領本城官兵東西偵探以期有備

無患合再仰懇

天恩飭催成祿趕緊分兵出關西進共挽大局則新疆  
幸甚奏入

上命軍機大臣傳諭伊勒屯何瑄曰哈密自去年復失  
後巴城糧道斷絕此次該總兵等勸捐招募勇丁合  
之官兵練勇共計三千餘名派委千總芮林等管帶  
於二月十九日起程進剿救援哈城卽以疏通巴境

糧道辦理尙爲奮勉惟須申明紀律穩慎進兵免致  
見賊潰退其孔才所部勇丁前經與參將富貴營中  
裁勇勾結圍攻營盤何瑄現調令赴坤作爲後路接  
應該大臣等當妥爲駕馭以免意外之虞至巴城城  
守緊要賊氛密邇伊勒屯何瑄尤當加意布置慎固  
封圍毋致顧此失彼變生肘腋是爲至要

十七日 辛未 李雲麟奏言溯自去年六月初旬 臣

奉

命辦理軍務其時伊塔告陷西陲大局瓦解 臣極思力

圖報稱挽回大局因有調集蒙兵先進奇古以  
圖三路會剿之請卒之所謂烏城蒙兵先潰一  
事決裂百事皆乖布置失當其罪一當烏城蒙  
兵潰後內地大兵未能卽到則蒙兵之萬難復  
用可知此時若將烏科兩城所調蒙兵全行散

去尙可節省餉糈乃執迷不悟仍欲借科城之  
兵進剿並欲將烏城之兵已散者仍復調回卒  
之費盡心力不但烏城兵未能復用卽科城之  
兵若非棍噶札拉叅開導亦幾至更生他變見  
機不明其罪二至於奇古民勇地方失陷三年  
之久該勇等與賊爲鄰互相爭奪皆身經戰陣  
習於驕恣較之蒙兵尤難駕馭且蒙兵皆戀游



牧室家聚之甚難散之尙易此項民勇已無身  
家能集而不能散當蒙兵旣潰大兵不能卽到  
之日此項民勇旣不可用亦當早思良策設法  
遣散尙可弭患無形乃未慮及此猶欲借其人  
力保障地方卒至狼子野心獠犬反噬搶奪官  
廩牲畜騷動蒙古游牧其罪三各省解到新疆  
餉銀等款共銀二十五萬有奇除現存及分撥

各城採買駝馬有款可抵外調集蒙兵民勇共  
用過十餘萬兩此項銀兩若全數存留足支烏  
科兩城數年防守經費之用今一事無成餉項  
虛糜其罪四西陲多警

朝廷以臣爲稍知行陣任以軍事自應慎重將事  
庶免疏虞乃冒昧自任見利不見害如催調蒙  
兵一事前者既有潰散情事該將軍亦奏明萬

不堪用竟使漠北縱橫數千里之地游牧百餘  
旗之衆疲於奔命半年之久倒斃駝馬不計其  
數紛紜騷動幾誤大局其罪五有此五罪無論  
訕謗沸騰卽內反於心亦無辭以自解再四思  
維惟有仰懇

天恩將臣明正其罪稍可以振

朝廷之紀綱於各路軍情不無所補

李雲麟又奏言再科城蒙兵自臣劾廣鳳之後  
該城人心俱懷畏憚故能調齊今兵散勇叛人  
皆議乎其後謂科境紛擾不安皆因臣所致此  
科城事不能復辦者一也烏城蒙兵自錦丕勒  
多爾濟任事後竭力調齊無如一潰再潰紛紛  
調派游牧不安自今各部落皆怨臣作俑於始  
此烏城事不能復辦者二也烏科兩城之事既

不能辦又不能進勦前後奏調咨調隨營辦事  
人員皆畏避求去勢難勉強若再有事亦無人  
可以差委此不可爲者三也 臣先奉

旨幫辦新疆軍務忝膺闕外之寄今蒙兵潰民勇叛再  
欲強調必誤大局若不復徵催則手無一兵久  
居此名有損

朝廷之體制此不可居者四也或以爲 臣現署塔

城參贊可以調度塔城之兵殊不知塔城滿漢官兵僅存數十員名其額魯特蒙兵惟與棍噶札拉叅生死相從他人皆不能駕馭阿隆阿本任游牧領隊所言亦無人信從今塔境未復此項蒙兵既留爲科城防兵糧餉一切俱有定章卽可由科城一手經理但能得棍噶札拉叅之心則此項蒙兵必能得力臣雖有參贊之名尊

而不親且與該兵等言語不通無從管束此不可居者五也有此五不可臣卽欲圖功補過亦非力所能爲本日請罪一疏語出至誠儻荷恩施加以典刑死且不朽奏入

上命軍機大臣傳諭李雲麟曰李雲麟自幫辦北路軍務以來歷次條奏軍情朝廷深恐輕率僨事訓誡再三乃該署參贊銳意邀功調集蒙兵民勇先後潰散

遺失軍裝駝馬不可勝計今覽李雲麟所奏是該署  
參贊亦知罪無可追卽於軍前明正典刑亦屬情罪  
允當惟念新疆軍務辦理本形棘手李雲麟冒昧從  
事與畏葸取巧者不同其罪雖可誅而其心尙可諒  
况能服罪輸情不敢欺飾自當量子區別本日已交  
部嚴加議處所請治罪之處著暫行寬免該署參贊  
惟當感激法外之仁於烏科兩城防守事宜會同德



勒克多爾濟等和衷商酌妥爲布置毋使稍有疏失  
遇有緊要事件虛心體察不可徒事矜夸致負厚恩  
儻稍有貽誤決不再爲寬貸也懍之慎之

李雲麟又奏言 臣 前奏棍噶札拉叅親率千人

移紮布爾滾河仍留五百人駐防烏隴古河茲  
接該喇嘛來函五百人留防烏隴古河未免太  
單現在科城南路旣防回逆北竄又防變勇滋

擾情形喫重西路哈薩克一時未敢東犯已將  
西路之事囑土爾扈特親王等嚴密防守隨將  
該喇嘛所統之蒙兵三營一併於月內陸續移  
赴布爾滾河以固科城門戶奏入報

聞

同日伊勒屯奏言自上年十一月間賊匪盤踞  
哈密巴城受困臣飭令署鎮西廳同知薩明向

鋪商勸捐銀錢糧石多練民勇專候援兵一至  
併力規復哈密乃二月以來本處米糧愈加缺  
乏若再坐守闔城軍民實有餓斃之憂不得已  
會同總兵何瑄各派兵勇進攻哈密疏通糧道  
挑派佐領達三布等帶領弁兵一百五十員名  
會同綠營官兵六百名民勇二千餘名東山纏  
頭六百餘名於二月十九日起程進攻哈密仍

請

旨飭催成祿無分星夜分兵倍道出關以圖進取再巴  
城需餉孔亟儻哈密克復一切善後事宜需費  
更多現在進剿哈密之官兵民勇口糧皆屬衆  
商鋪戶捐辦業已搜羅一空仰懇

天恩飭催巴城軍餉趕緊撥解以濟要需奏入

上命軍機大臣傳諭李雲麟成祿伊勒屯何瑄曰伊勒

屯奏整飭兵勇進攻哈密疏通糧道與前次何瑄奏  
報相符卽著該領隊大臣會同何瑄嚴飭帶兵各員  
統帶官兵民勇等進剿哈密踞匪疏通糧道其孔才  
所部勇丁仍著妥爲駕馭毋稍疏虞巴城防守事宜  
並著加意布置關外兵勇無多不敷分布前據成祿  
奏報已將高臺賊匪奮力剿退卽著乘勝攻拔肅州  
迅速帶兵出關以圖進取毋再遲延貽誤該城需餉

甚急前經李雲麟奏請於議定征兵月餉銀九萬五千兩內以一萬七千五百兩作爲北路月餉下餘七萬七千五百兩分撥關內大軍及巴里坤應用業經降旨交戶部議奏卽著該部迅爲籌撥並著李雲麟於新疆北路軍餉內先行籌款就近撥解巴城以濟飢軍

二十一日乙亥林壽圖奏言甘回竄擾鳳翔汧隴

等處現在醴泉武功乾州永壽一帶皆阻賊蹤

餉道梗塞臣之轉運分局又設在乾州城內四

門日受攻撲情形甚緊黃鼎等各軍卽不能遠

援扶風亦須急向乾州進剿蓋乾州獲勝則扶

風自解勢固必然想撫臣自有調遣臣前因東

南協餉改道奏請至二月止截清支發辦理報

銷昨奉新任督臣左宗棠札飭知陳丕業帶往

漢中二十二萬餘兩外此後悉解西安交臣酌

量經理擬俟餉到仍權衡緩急統籌兼顧左宗

棠至陝如尙令臣暫辦糧臺卽截清界限將楊

岳斌任內臣所經手數目另行銷算逐款造報

林壽圖又奏言據雷正綰飭派遊擊余萬明等

來臣糧臺稱欲赴漢中招募六營請撥銀六千

兩以備經費披閱來文知督臣楊岳斌業經批



准未可挽回查五年十二月雷正綰曾派遊擊  
郭紹棠等來陝捏稱咸陽興平等處有多隆阿  
舊部千餘人願往招徠投營效力經 臣 札飭各  
縣訪查均無老勇迨後所募無幾皆係市井無  
賴之徒近日竄陝各回半雜潰勇其效略可觀  
矣 臣 旣不能勸止聞左宗棠已自漢口督師西  
進入關有日面告余萬明均須清查籍貫挑選

精壯不必拘定六營之數稍涉遷就計其成軍  
之時新任督臣當已至陝應請就近點驗庶昭  
覈實奏入

上命軍機大臣傳諭左宗棠喬松年曰甘回竄擾鳳翔  
慶涇餉道梗阻林壽圖所設轉運分局在乾州城內  
現在乾州被賊攻撲情形甚緊著喬松年迅卽派兵  
援乾速解城圍左宗棠到陝後布置調遣各事宜自

必與喬松年妥爲籌辦惟陝省良奸混跡雷正綰營  
募勇素多冒濫該提督現派遊擊余萬明等赴漢中  
招募六營新勇著喬松年飭令確查精選並著左宗  
棠格外留心免爲所誤

二十三日丁丑德勒克多爾濟錦丕勒多爾濟麟

興奏言接奉

諭旨御史慶福奏敬陳管見六條飭臣等妥議具奏查

該御史所陳添設蒙兵一節當此西疆不靖自  
應迅速籌辦前次業已飭調札薩克圖汗三音  
諾彥兩部落共兵一千名派令公札薩克管帶  
前赴純德庫鄂博一帶防守各旗游牧邊界復  
嚴催三音諾彥部落兵一千名派德車克淖爾  
防守此外無庸另行添設惟每歲需餉前經奏  
請撥銀五六萬兩若按照該御史所指之數復

請撥給未免重複現在應無庸置議如有短欠  
隨時再行奏撥庶不致有虛糜修理軍器一節  
查烏庫所存軍火本不堪用除將前次修理可  
用軍火奏撥巴里坤等處外其餘應修理者臣  
等已飭酌覈修理復因操練防兵軍火不敷前  
經奏請由晉省調取一俟齊備再將動用存儲  
數目造冊咨報收復難民一節查烏科二城現

在難民爲數較多若如該御史所陳設立留養局發給口糧烏科二城無此鉅款可籌惟此次難民困苦無告實堪憫惻惟有仰懇

天恩飭下戶部專撥賑濟銀五六萬兩解至綏遠城由

臣等揀派委員前往各處按名發給路費令其徑赴歸綏一帶自謀生計清理庶獄一節查烏里雅蘇台現在監禁者僅有十三犯臣等自應

督催承辦司員趕緊清理至律例不全 臣等當  
派員赴部承領如有不齊之案卽飭各盟長鈔  
呈以備查覈除莠安良一節查烏里雅蘇台等  
處如遇蒙民逃犯均照例嚴飭各該盟出派承  
緝弁兵給限查拏報部其駐班副將軍係輪流  
辦理四部落公務之員例駐三月無專管地方  
之責未便因此罰以連班自應仍照定例責成

各該盟長徑飭所屬派出承緝弁兵給限查拏  
如有搶劫賊盜卽按照近年章程處置勿稍姑  
容有干商民事件仍由 臣 等給予例限飭拏總  
期早結以符定制而昭區別儻理藩院承辦司  
員督催不力定必隨案指名嚴叅開墾荒田一  
節查烏里雅蘇台地方極寒布置開墾諸多不  
易 臣 等曷敢輕率舉辦且所屬三音諾彥札薩



克圖汗兩部落地面遼闊其土性未能深悉當  
卽劄飭西兩盟除察拜答禮克舊田共有若干  
畝外其餘各旗有無可墾之田招民播種有無  
關礙詳查聲明一俟呈覆再行酌覈具奏

德勒克多爾濟錫丕勒多爾濟麟興又奏言新  
疆自遭兵燹以來所有失業難民逃至烏里雅  
蘇台迤西接壤之札薩克圖汗部落各旗屯住

雖經前任將軍等屢次派員往查捐資撫散而  
陸續避難者現又不絕有增無減臣等詳細商  
酌此項無業遊民良莠不齊其中或有奸細溷  
迹來探虛實勾結逆回陰謀竄擾蒙古地方均  
不可測正在稽查酌辦聞准李雲麟咨開烏城  
所屬札薩克圖汗南境各旗均與奇古等處接  
壤夙有避難民人雜處誠恐日後爲奸細托足

之地難於稽查現因民勇託詞搶劫牲畜應將  
蒙古游牧舊住避難之人全行驅逐出境不准  
容留以杜奸細溷迹儻該民人不聽驅逐卽細  
交查辦如此則奸宄不能入境回匪難民皆不  
敢來蒙古游牧自可無事此保全北路之良策  
勝於多添防兵務卽一體派員前赴南路各旗  
稽查督辦並將如何驅逐情形切實呈報各等

情臣等晝夜焦籌若照該大臣所咨派員驅逐果能淨盡固無後虞然操之太急又恐立起風波如不乘早收拾愈集愈多將來蔓延難圖誠爲可慮臣等雖前奏蒙兵難恃征勦今不能不用以安防外杜逆回東竄內鎮難民滋擾無如頻催三音諾彥札薩克圖汗兩部落官兵趕赴防所多以無牲畜口食爲辭臣等再四熟商烏

里雅蘇台逼近賊蹤逆回難民均應防範當飭所屬附近有容留難民各旗務將已在該游牧屯住難民善言開導隨時遣散或捐給口食令其各投生業不可藉滋事端亦不可驅逐太急迫之與賊入夥勾結方爲萬全儻不能立時散盡當派委員查清難民現在究竟共有多少趕緊呈報以憑酌辦嗣後如有陸續逃難者萬不

可復令其擅入游牧如此則舊居者漸可使散  
而新來者不致續集除由臣等咨札各處查辦  
外應請

旨飭下李雲麟仍卽嚴密杜遏勿容復集生事其該大  
臣所指有難民棲止地方應如何就近設法酌  
辦之處卽徑行酌量一體施行奏入

上命軍機大臣傳諭李雲麟德勒克多爾濟錦丕勒多

爾濟麟興曰新疆自遭兵燹以來難民逃至烏城迤西接壤之札薩克圖汗部落者紛紛不絕李雲麟意欲飭令各旗驅逐不准交通買賣雖係爲豫防奸細起見惟該難民生路已絕勢必激而爲匪辦理殊屬非是德勒克多爾濟等欲由部發銀五六萬兩給予路費令其徑赴歸綏自謀生計是又以鄰爲壑必至滋蔓內地所籌均未周妥辦理難民之法總以安插

得所毋令聚衆滋事爲要該將軍等現在飭查西兩  
盟拜答禮克等處有無閒田卽著迅速查明如可令  
難民開墾使其自謀生計當可相安無事屆時卽由  
部發銀撥給籽種亦不至虛糜帑項如各該處並無  
閒田可種卽著李雲麟德勒克多爾濟等會商另籌  
辦法務須計出萬全毋得冒昧從事該將軍等所稱  
飭催前派各部落蒙兵布置防守毋庸另行添設蒙



兵及修理軍器辦理案件仍責成該盟長給限嚴緝  
各條均著照所擬行但當實事求是不得空言塞責  
以副委任

二十五日己卯庫克吉泰德興阿喬松年奏言賊

蹤東竄大股麕聚乾州前股已至醴泉郭寶昌  
一軍先向醴泉進發臣等督飭馬隊與劉松山

黃鼎等亦卽拔隊馳進商定於乾州會齊合剿

其譚玉龍劉忠秦國輔等軍則由扶風緊躡追擊扼賊後路郭寶昌甫到醴泉探知回逆二千餘人在傅家莊徐家堡一帶分踞我軍併力齊進四面轟擊立將該莊擊破賊匪逃竄復敢勾結後股悍賊蜂擁來援我軍直前迎戰立將賊擊敗抵乾州後復遇悍賊千餘人來撲我軍追殺十餘里適馬隊各軍與劉松山黃鼎等軍

亦均趕到當卽分路齊進劉松山安住等各以馬隊奮擊其附近村寨之賊不意我軍猝至紛紛潰遁我軍後路步隊亦卽趕到合擊將左邊堡內踞賊百餘名悉行殲斃餘賊拋棄羸馬軍械遁回臨平其譚玉龍等追躡之師由扶風節節追擊該逆屢以尾隊悍賊來撲並敢於夜間潛襲劉效忠洪殿元營壘均經我軍奮勇擊退

斃賊多名仍卽相機向東進追此時馬隊各軍  
與劉松山由南路進兵郭寶昌一軍由東路進  
兵譚玉龍等追軍由西路進兵以期三面合攻  
直擣臨平賊巢惟現據邠州探報又有甘省涇  
河川竄來回逆數千已至長武縣之亭口地方  
難保不並竄乾州臣等惟當督催各軍合力進  
剿冀得迅速掃蕩奏入

上命軍機大臣傳諭庫克吉泰德興阿喬松年曰回逆  
屬聚乾州臨平鎮一帶前股竄至醴泉經郭寶昌率  
兵迎勦將回匪所踞之傅家莊攻破並將後股援賊  
擊敗追至乾州續獲勝仗劉松山黃鼎等軍亦均至  
乾攻破賊堡譚玉龍劉效忠等軍分路進逼以期三  
面合攻直擣臨平此時賊匪不患其合而患其分該  
逆旣屬聚一處卽著喬松年商同庫克吉泰等督飭

諸軍合力攻拔賊巢將該逆就地聚殲並分派各軍  
嚴扼紛竄其由甘省續竄長武回匪並著喬松年分  
兵迎剿嚴密堵截以固腹地



欽定平定陝甘新疆回匪方略卷一百五十二

庚辰年

三月二十六日 庚辰 庫克吉泰德興阿喬松年奏

言三月十七日探聞回逆大股由乾州一帶繞  
出官軍之後分股東竄已及興平 臣 德興阿當

帶馬步親兵馳往堵剿馳抵距咸陽二十五里  
之花家寨地方瞥見馬賊千餘當卽督率兵勇  
奮擊立斃悍賊數名該逆向西南竄逸我軍追

殺數里始行撤隊共計斃賊百餘名當復添派  
妥弁四出哨探十八日探報馬賊由興平一路  
分股竄來距城不遠臣德興阿趕緊馳往兜剿  
該逆猝不及防我軍奮勇衝殺賊勢披靡向東  
北敗竄我軍躡尾緊追十餘里始撤隊入城約  
殺賊數十名救出難民千餘名我軍惟委驍騎  
校托勒敏身受重傷弁勇陣亡數名詎該逆大



股分爲五股復由西南循渭而來馬賊萬餘步  
賊無數由咸陽北塬東竄馬步相閒絡繹不絕  
我軍列隊城西臣庫克吉泰登城守禦督飭文  
武員弁開放槍礮轟斃賊匪甚多該逆見我軍  
陣勢甚整城防甚嚴不敢撲犯城垣繞向東北  
而去惟臣等所部馬隊悉數派赴劉松山軍中  
現有馬步親軍僅數百名以之當數萬悍賊旣

須迎勦又固城防實屬衆寡懸殊力有未逮已  
飛飭劉松山郭寶昌安住全福等馬步各隊迅  
速據渭截勦兼以回顧省垣臣等仍視賊所向  
督飭各軍相機進勦奏入

上命軍機大臣傳諭庫克吉泰德興阿喬松年趙長齡  
陳湜曰回捻大股由乾州竄及興平經德興阿督率  
馬步各軍堵勦斬獲甚多其馬賊由興平一路分竄

咸陽又經官軍衝殺該逆遂率大股擾至咸陽北塬  
因城防嚴密繞向東北而去此次官軍雖獲勝捷究  
未大挫兇鋒庫克吉泰等所部馬隊已派赴劉松山  
軍中所存馬步各軍不敷剿截卽著飛飭劉松山等  
軍迅據渭河杜賊分竄陝垣城大兵單著喬松年密  
籌防守毋稍疏虞庫克吉泰等仍當懷遵昨日諭旨  
商同喬松年嚴檄譚玉龍黃鼎各軍覘賊所向跟蹤

窮追並合力攻拔賊巢以期盡殲醜類

二十七日辛巳楊岳斌奏言狄河回逆負嶠肆擾

久爲甘省心腹之憂臣於正月十二日分檄提

督王得勝彭楚漢總兵李助發等各領部勇滾

營前進嗣據彭楚漢稟稱二月初一日帶隊行

至馬坡地方適賊之大股屯踞羊寨並分股盤

踞羊寨附近之侯溝莊民堡內外當令本營馬

步隊及守備王正耀總兵易朝貴二營進擊羊寨副將張萬美葛東庭二營進擊侯溝莊並調本地團丁數百名抄賊歸路布置既定彭楚漢率隊直抵羊寨該匪列陣抗拒我軍奮勇爭先當斃悍逆一百餘名賊黨棄械狂奔我軍追逐二十餘里截殺無算時張萬美葛東庭隊伍亦抵侯溝莊賊見官軍驟至悉數奔入堡內憑牆

固守我軍猛力進攻登時破堡而入斃賊尤多  
敗匪逃竄又經團丁抄截是役共計斃賊七百  
餘名奪獲羸馬八百餘匹糧食數百石二月十  
六日據總兵李助發來稟十二日帶隊行至紅  
土窰地方探聞前途李家堡賊勢甚重卽派吉  
前吉後二營西出紅土窰十餘里駐紮派賢右  
吉左吉右三營站隊適有馬步賊匪千餘蜂擁

而來我軍衝擊槍斃逆匪數百名該逆抵死不  
退後路援賊愈來愈衆約有萬餘名之多李助  
發立即添調發字四營由南北山兩路包抄詎  
該逆亦由兩山迎拒彼此鏖戰互有傷亡適值  
狂風大作賊趁順風施放槍子紛如雨下衝入  
我軍後隊只得分路歸營惟賢字右營營官參  
將鍾欽安督隊後殿帶傷落馬被賊衆圍裏叢

刺隨卽陣亡李助發歸營查點陣亡弁勇二百  
餘名衝散者三百餘名遺失槍矛數百件賊匪  
旋於十三日向東北回竄等情稟報前來 臣思  
李助發上年駐軍靜甯先於四月間被賊截營  
身受重傷五月間又接仗失利兩次戰歿將士  
不少拋棄器械甚多 臣 因其時進剿東南逆匪  
正在喫緊未便嚴叅僅摘去頂戴稍示薄懲乃



現值會攻狄河之際又復輕敵喪師貽誤戎機  
厥咎甚重相應請

旨將河州鎮總兵李助發卽行革職永不敘用以爲勦  
賊不力者戒參將鍾欽安力戰陣亡深堪憫惻  
籲懇

恩施飭部從優議卹奏入

上諭內閣曰甘肅狄道河州回逆負隅肆擾經楊岳斌

派兵分路進剿總兵彭楚漢等在羊寨等處疊獲勝  
仗斃賊甚多而總兵李助發所部在李家堡地方與  
賊接仗鏖戰多時賊援麴集遂至敗挫李助發前因  
剿賊不能得力曾經摘去頂戴以示薄懲此次帶隊  
又不穩慎進取致損軍威實屬咎有應得甘肅河州  
鎮總兵李助發著卽行革職永不敘用陣亡之參將  
鍾欽安著交部從優議卹

楊岳斌又奏言臣邇來病勢增劇昨得李助發  
敗信吐血諸證十倍於前若再以病軀戀棧貽  
誤戎機獲咎愈重惟有仰懇

天恩飭催左宗棠曹克忠迅速來甘並

飭穆圖善卽日赴省暫接篆務不勝急切屏營之至

楊岳斌又奏言接准穆圖善來咨擬卽遵

旨陸續移營前赴慶陽請臣迅派委員前往辦理安插

降回事宜並設法抽撥一軍來甯安堡駐紮以  
資鎮撫等情臣閱悉之餘不勝惶遽在穆圖善  
恪遵

諭旨固不容稍緩師行臣受

恩深重亦惟有遇事欽遵何敢曉瀆第當此兵力萬難  
遽分臣若不言厥咎益重不得不爲我

皇上縷晰陳之本年正月閒臣已檄調各軍分路進取

狄河惟賊徑叢歧征兵固因分而愈單防兵亦  
因調而愈少省城重地尙苦無軍駐守臣曾函  
商穆圖善袖調數營來省以固根本尙未接覆  
乃統領李助發忽於紅土窰地方勦賊失利遂  
致逆醜益張大股數萬分擾通渭縣屬一帶南  
路糧運又爲之不通臣力疾圖維已愧無從展  
布然猶幸北路尙有穆圖善一軍控制得宜稍

免顧慮今併穆圖善而去之旣恐甯靈鹽固袤  
延數百里甯甫經收撫之回無人鎮壓更難保西  
甯米拉溝等處回匪不乘隙復逞奸謀是臣派  
攻狄河之師將前後受敵非惟半途鬆勁且有  
決裂之憂事機一誤收拾愈難此勦辦狄河逆  
匪穆圖善一軍未可輕言東去也陝回馬生彥  
楊文治等股雖經乞撫軍械馬匹究未踴躍呈

交穆圖善欲臣抽撥一軍駐紮甯安堡正爲防

範該回反側便於創懲臣現在旣無可調之軍

而穆圖善遠赴慶陽回目楊文治等所部降衆

人數過多且與鹽固諸回聲氣相通設一旦乘

虛起事不特撫局無成卽甯郡已定之降回亦

不免聞風震動况安插事宜穆圖善咨臣派員

原擬會同辦理若穆圖善率隊東趨臣所派委

員無所稟承自與該回格格不入並將無從著  
手此籌辦撫案勢難中止必須穆圖善始終其  
事又未可輕言東去者也慶涇爲陝西門戶爲  
甘省東路咽喉雷正綰張在山等軍不爲不厚  
臣於攻取狄河並扼紮南路等處雖兵力萬難  
分布獨不調動雷張各營正爲保全慶涇力顧  
陝疆現在慶郡告警自有雷正綰張在山就近



回顧較之遠調穆圖善利便實多喬松年等籲  
請援師固係爲陝甘兩省起見但於甘省南北  
各路並臣現在布置情形似未備悉臣通籌全  
局雷正綰張在山兩軍尙不獨當東路一面卽  
或賊匪紛乘有陝軍互相掎角亦不難會合夾  
攻若令穆圖善移師赴慶固於彼處之兵愈添  
愈重而於甘省目下勦撫兩局誠恐立形敗壞

臣  
仰沐

聖恩慶陽爲統轄之地亦豈不力籌顧濟但事處萬難  
實不能專顧一隅致誤通省大局合無仰懇

天恩飭下穆圖善暫緩督師東行俟兵力可騰撫案定  
局再行請

旨遵辦奏入

上命軍機大臣傳諭穆圖善楊岳斌曰左宗棠督兵由

湖北入秦不能越陝西而至甘省昨據該大臣奏稱  
湖北軍情緊急不得不稍緩前進曹克忠病勢沈重  
前已降旨准其開缺回籍授高連陞爲甘肅提督俟  
高連陞到營自當催令先行赴甘防勦前諭穆圖善  
赴蘭州暫署督篆尙未據該將軍覆奏現在已否移  
軍赴慶能否進省接署督篆卽著妥速籌議具奏穆  
圖善未到省以前楊岳斌責無旁貸總當力圖振作

以支危局毋稍推諉又據楊岳斌奏稱現在勦辦狄  
河逆匪穆圖善一軍若一輕撤必至前後受敵決裂  
堪虞且楊文治等降衆過多恐一旦乘虛起事不特  
撫局無成卽甯郡已定之降回亦不免聞風震動安  
插事宜將無從著手等語自係實在情形著穆圖善  
斟酌目下軍情與楊岳斌妥籌辦法務須處處兼顧  
不得稍有疏失慶陽地方亦關緊要穆圖善楊岳斌

卽督飭雷正綰張在山就近率隊援剿毋誤戎機

二十八日壬午玉通奏言西甯回務准前護督臣

恩麟奏請改剿歸撫委派道員雅爾佳納等前來查辦而漢回互相搆怨終未帖服復准督臣

楊岳斌委派知府鍾瑛副將馬世勛參將孟柏林來甯同辦撫局乃該委員等意見不合未能實力奉行反致衆回疑懼藉口逞兇讎殺劫掠

十一月朔河州回逆馬占鰲糾衆撲八碾伯直  
抵西甯恣行搶劫村舍爲墟孟柏林近在比鄰  
不聞率勇拯援反令騷擾居民揆搶財物糧石

臣當卽照會丹金札布等持 臣諭帖譬曉禍福

勿更殃及無辜幸該逆亦遂約衆回巢 臣刻下

率同文武督飭漢民紳商暨回民總約馬桂源  
揀派曉事回目設立總局協力查拏用儆兇頑

所慮西甯東連河狄北接甘涼悉爲逆回淵藪  
一旦事起倉卒本處兵勇固不足恃枵腹從軍  
更難得力合無仰懇

天恩飭下山西撫臣卽飭藩司在解甘協餉內抽撥銀  
五萬兩派員運至西甯聊濟眉急奏入

上命軍機大臣傳諭玉通趙長齡曰西甯漢回運至不  
靖疊經玉通設法解散總未安輯南川漢團與回民

甫經和息而河州回逆馬占鰲又復糾衆撲入碾伯  
擾及西甯大肆焚掠雖經丹金札布等曉諭退去難  
保不復圖竄擾玉通現飭漢民紳商及回目馬桂源  
設立總局協同防守務當妥爲彈壓漢團人等固不  
得有意尋釁致令回民疑懼亦不可偏聽回民之詞  
復墮詭計參將孟柏林辦撫旣無成效且有騷擾情  
事著玉通咨令楊岳斌將該員撤回叅辦西甯餉項



支絀情形甚迫著趙長齡卽飭藩司在協甘餉內撥銀五萬兩迅派委員徑解西甯以資接濟毋稍遲誤

二十九日癸未趙長齡奏言晉省地廣兵單全憑

一線黃河爲之阻隔黃河無船不能飛渡是提船東泊實爲防河第一要著溯查同治元年陝回滋事以來邠陽韓城二縣沿河村民設船甚多豫備臨難逃徙該處辦團紳士主持其事不

令船泊東岸致被逃將宋憬詩搶船詐渡貽害  
山西經前撫臣英桂將前任邵陽縣知縣方鼎  
錄紳士王鳳翔奏叅在案誠恐陝省沿河各縣  
仍有紳士主持不令提船東泊疊經飛飭確查  
茲准太原鎮總兵蔣臨照咨稱韓城縣所屬之  
砂仁溝有空船多隻仍在西岸停泊不肯移泊  
東岸請咨陝省轉飭遵辦臣查晉省完善之地

各逆垂涎已久設被乘閒搶渡如宋憬詩故事  
所關實非淺鮮應請

飭下陝西撫臣嚴飭郃陽韓城及沿河各縣務令將沿

河商民船隻一律提泊東岸儻各該縣並不實

力遵辦致被回匪搶船渡河竄擾完善臣由

查明賊匪由何處渡越將該地方官從嚴叅辦

以爲貽害鄰封者戒奏入

上命軍機大臣傳諭趙長齡喬松年曰陝省回捻勢欲  
東趨而韓城縣屬之砂仁溝有空船多隻不肯移泊  
東岸從前宋憬詩由西岸搶船東渡竄入晉省曾將  
把持船隻之紳士王鳳翔徇縱之縣令方鼎錄等嚴  
行懲辦此次防務更爲緊要若再聽該處商民把持  
阻撓必致貽誤大局著喬松年嚴檄韓城縣令及沿  
河一帶地方迅將該處船隻悉數提泊東岸儻有抗

違立即嚴行查辦先將船隻焚燬並著陳湜派兵一體嚴查遵辦毋稍姑容

同日協辦大學士兩江總督一等毅勇侯曾國藩奏言查協甘餉銀除江海關月撥銀一萬兩外臣於四年五月奏定每月協濟三萬兩自五月起至十月止按月均交楊岳斌提餉委員轉解十一月以後李鴻章議定以二萬兩解楊岳

三國志卷之四十一 二二  
斌軍營以一萬兩解穆圖善軍營按月解至五  
年六月止均未短少五年六月以後清水潭決  
口江北釐課大減李鴻章奏明協甘之款先儘  
收數分作三股以兩股撥陝甘督臣軍營以一  
股撥甯夏軍營約計每月尙有二萬兩統計四  
年五月以後解過銀六十餘萬兩 臣此次回任  
後覈計應發餉項不敷甚鉅本難兼顧外省協

餉惟協助甘肅軍需萬無推諉之理 臣仍照原  
奏每月三萬兩之議按月籌解卽指定之江北  
釐金或月收不及三萬亦當以他款補足以期  
有言必踐若欲於協甘之外添協陝餉實屬無  
此餘力惟陝甘軍務本屬相聯一氣軍務旣須  
通籌協餉亦可融解擬於每月協甘之三萬兩  
內以二萬兩解甘肅軍營以一萬兩解陝西軍

聞

營仍俟籌解兩三月後察看兩省軍務孰緩孰急再行定議奏入報

四月初二日乙酉庫克吉泰德興阿喬松年奏言

劉松山安住黃鼎郭寶昌各軍自進逼賊巢後卽直趨董村進戰該逆不料大軍驟至驚惶無策我軍乘勢齊進登時將董村奪回該逆復敢



糾合大股馬步來撲亦經我軍奮力截殺郭寶  
昌復率軍搶過山溝衝擊賊仍敗回臨平老巢  
劉松山安住郭寶昌等商定直擣臨平分三路  
進取劉松山進左路郭寶昌孫立士進右路李  
祥和黃鼎進中路安住全福及順字各營馬隊  
爲左右包抄行抵賊巢二里許該逆卽以騎賊  
數千排列而步隊悉伏寨中死拒我軍三路前

進勇氣百倍鏖戰數時擊斃悍賊甚多賊勢不  
支紛紛棄巢敗退我軍乘勢追殺立將臨平辛  
店南齊堡上渠堡回寨數十處悉行攻破斃回  
約近千名救出難民數千奪獲羸馬三百餘匹  
其譚玉龍劉效忠秦國輔等軍連日節節東追  
埽平後路菊村一帶賊巢斃賊亦近千名直追  
至武功興平等處疊獲勝仗所有盤踞後路之

賊悉經該軍擊退此次賊勢狻獷賊馬約在萬  
匹以外賊衆約有四五萬人劉松山等均能努  
力進戰直搗賊巢實屬卓著勞績現在賊之大  
股被勦東竄已過咸陽勢將由三原東窺同朝  
尤宜迅籌截擊臣等商令安任全福所部馬隊  
會同劉松山黃鼎等截勦東北郭寶昌孫立士  
等徑趨三原或迎頭扼截或緊躡跟追或攔腰

抄擊隨時相度賊情設法進取以期迅爲掃蕩  
其晉省河防 臣松年現已函致山西臬司陳湜  
妥爲防範俾免疏虞奏入

上命軍機大臣傳諭庫克吉泰德興阿喬松年趙長齡  
陳湜曰劉松山等軍奪回董村後復會同郭寶昌等  
進攻臨平賊寨立將辛店等回寨數十處攻破斬獲  
甚多譚玉龍等節節東追掃平菊村一帶賊巢辦理

均極奮勉現在賊股竄過咸陽勢將由三原東窺同  
朝著庫克吉泰德興阿喬松年分飭各軍迅圖截剿  
仍須步步爲營穩紮穩進不可稍涉大意該逆不得  
逞志於秦必將竄擾晉省完善之地著趙長齡督飭  
陳湜認真防範勿稍疏懈

喬松年又奏言甘省竄來逆回在邠長一帶時  
思東竄必須派兵赴西路攔擊

臣已檄飭譚玉

聞

龍劉效忠秦國輔等軍前往長武之亭口扼紮  
先清邠長回逆以扼其東竄之路奏入報

欽定平定陝甘新疆回匪方略卷一百五十四 丁卯年

四月初三日 丙戌 楊岳斌奏言華亭逆回自八月

下旬突竄涇平之間疊經雷正綰率總兵沈大興隨機堵擊時有斬獲八月三十日總兵劉效忠已革提督周顯承合軍於花頭鎮接仗得獲小捷九月初一日復於崑峴鎮接仗生擒僞帥馬全芝殺賊二百餘名該逆被挫不能由涇州

東竄陝疆遂於九月初五十七等日向涇州北  
原一帶奔竄又爲提督張在山等截擊於西峯  
荔家堡等處逆衆遂趨向鎮原甯州九月二十  
二日沈大興攻勦紅河川賊巢營勇傷亡頗衆  
二十六日譚玉龍進軍平子鎮營勇滋擾特甚  
正在攻打民堡適逆回擁至全軍盡覆該將收  
集敗勇退紮店頭堡由是賊遂蔓延勢復東竄



臣聞信之餘當經飛咨雷正綰並飭張在山周  
顯承劉效忠仍前極力堵截勿稍鬆勁提督王  
得勝彭楚漢李助發各軍前經派令由蕭城規  
剿逆回李得倉等股該逆被剿退竄靜甯以北  
與固原連界之區屢經乞撫呈繳馬匹器械多  
件臣現飭令各軍相機辦理如稍有不實卽行  
痛剿南路秦階各處現已安謐鞏昌自總兵陳

德隆駐紮後逆蹤不復窺伺惟於通渭馬營時相游弋已經總兵張志心等擊退省東金縣甘草店一帶河狄逆回閒出焚掠十月初五日經副將葛東庭出隊截擊小有斬擒十六十七等日提督羅進賢楊明海統帶各營往剿復有擒獲逆蹤退去西路逆回馬瑞興楊文植等在平番古浪之閒屢逼涼州總兵楊占鼈王仁和自

四月以至七月幾於無日不戰疊經獲勝該逆  
既經疊挫又因提督梅開泰各軍由省渡河而  
西穆軍已至中衛遂退回裴家營鎮虜堡各處  
西路稍通惟該逆屢請投誠仍不時分股出擾  
殊難憑信臣現已派令楊占鼇梅開泰王仁和  
會師先攻裴家營次及鎮虜堡並商請穆圖善  
由中衛進軍夾擊肅州鎮總兵黃祖淦與成祿

合攻肅州黃軍屢次架梯扒城皆苦城堅礮多  
每爲所阻臣擬俟裴家營一帶得手後卽行派  
兵齊攻肅城至臣現任省垣居中調度附省左  
近雖時有賊匪窺伺皆隨擊隨退城內人心尙  
稱安帖惟糧食異常短絀已飛飭涼州鎮總兵  
楊占鼐及迤西各州縣迅速轉運以充軍食而  
救飢民奏入報

楊岳斌又奏言前因肅州攻剿喫緊派令總兵  
王仁和帶領六營赴肅騰出提督成祿一軍迅  
速出關嗣臣屢接成祿來咨每以該提督應先  
攻克肅城然後出關始無後顧之患查肅州葺  
爾一城本非大股賊衆成祿旣以攻克肅城自  
任其所部馬步本有十六七營黃祖淦原已募

有數營後又統黎獻所部四旗合計馬步共十二營似此兩軍之衆已過萬人實已足敷剿辦况後路甘州一帶尙有黎獻舊部六旗涼州一帶尙有楊占鼇原募十一營亦頗足以助聲援本年正月十二日 臣分檄各軍進攻近省河狄之賊路雜軍分已形單薄李助發一軍旣於紅土窰失利又值鹽固靜會諸逆擾及通渭馬營

兼窺秦安秦州完善之地南路防軍僅止陳德隆數營萬萬不敷分布以致王得勝傅先宗兩軍派令由渭源進取者深恐賊繞其後斷絕糧源仍徘徊於秦安甯遠不敢長驅直進現正會合陳隆德圖勦竄賊其能否得手尙未可知彭楚漢一軍本由河干鎮進勦河狄近因各軍未克齊進勢成孤注亦難深入至省城附近如七

里河金縣等處各要隘亦正苦無營欲守則成  
飢困之勢欲戰則無可調之師今成祿旣暫難  
出關合無仰懇

天恩卽以肅州勦匪事宜

飭下成祿與黃祖淦專意攻取黎獻移交王仁和之六  
旗勇丁另擇統帶防勦該郡逆賊如此一轉移  
閒尙可稍資展布惟王仁和之軍本係遵



旨派撥赴肅可否改調之處仍俟

命下再行轉飭遵照再肅州鎮總兵員缺前經臣奏請

以王仁和接署此次王仁和如蒙

恩准調還所有肅州鎮篆查黃祖淦現已病痊臣擬仍

委黃祖淦暫署以一事權奏入

上命軍機大臣傳諭楊岳斌成祿曰甘省河狄一帶回  
氛逼近省垣李助發一軍在紅土窰失利鹽固靜會

諸逆擾及通渭馬營等處南路防軍不敷分布省城  
附近要隘無營可紮勢甚空虛王仁和一軍本由楊  
岳斌派往肅州替出成祿所部迅速出關現在成祿  
圍攻肅城卽日可拔出關旣須暫緩著該提督卽與  
黃祖淦專意攻取其王仁和六營改調回省以固本  
根肅州鎮總兵員缺卽著黃祖淦暫署俾專責成所  
有黎獻移交王仁和之六旗勇丁並著成祿另行派

員統帶防勦甘州一帶逆匪楊岳斌俟王仁和一軍  
回省後卽行相機分布將近省回逆勦除疏通糧路  
毋稍延緩

初四日 丁亥 庫克吉泰德興阿喬松年奏言咸陽

一城爲省垣要路該逆欲圖占踞經 臣 等督帶

親軍馬步兵勇儘力擊退縣城得以保全城守  
事宜亦均妥貼而省城兵力太單東關地方向

經逆回竄擾此時商賈輻輳最爲緊要臣等當  
卽帶領親軍於二十日趕緊馳回省城將親軍  
數百人紮營東關以資保衛仍隨時酌度軍情  
緩急何路喫重卽親身星馳督勦或分路前進  
或合力同往容臨時酌量辦理劉松山鏖戰數  
旬郭寶昌以少勝衆所部各軍均屬異常出力  
其省垣防守事宜由臣喬松年督飭文武加意

聞

嚴防不敢稍有疏虞奏入報

初五日戊子何瑄奏言臣前以巴城糧道久塞派

兵攻取哈密茲統領遊擊芮林等於二月二十  
五日行抵哈密卽與賊匪接仗我兵奮勇爭先  
賊衆披靡殺斃賊匪數百名餘匪竄至四五堡  
隨卽克復哈密城池奪獲槍礮旗幟帳房鉛丸

甚多又因札薩克郡王伯錫爾於本年正月被  
賊殺害當卽挑派馬隊一千名前往四五堡跟  
蹤追剿 臣復商同伊勒屯各派委員前赴哈密  
查看該城現在情形並查明伯錫爾因何被害  
緣由去後據芮林稟稱二月二十八日行至距  
五堡二十里地方遇賊騎二百餘名見我兵勢  
重退至五堡城中堅守不出我兵四面環擊立

卽攻拔殺斃賊匪數百名奪獲軍械旗幟亦復  
不少 臣復飭派團總郭鳳賢勇目張和等帶領  
壯勇一千數百名往紮四五堡以杜賊蹤伏思  
哈密爲咽喉重地自去歲六月內克復後因無  
大員鎮撫良莠未分患根未除以致得而復失  
此次仰仗

天威一鼓而下所有除莠安良及防守事宜在在均關

緊要兼之回王被害回子散漫無主若非大員  
認真查辦不足以資鎮撫合再仰懇

天恩飭催哈密辦事大臣文麟景廉無分星夜倍道出  
關赴任以資彈壓並催成祿火速帶兵赴哈先  
保完善之區再巴城糧餉俱缺去年七月閒奉  
旨令楊岳斌飭令安西等州縣趕緊籌撥倉糧遵卽派  
員前往催運旋據安西州來文已行令敦煌縣



撥給京石米麥三千石令巴城自行雇腳挽運  
比委員前往該縣又以未奉陝甘督臣文檄藉  
詞推諉查該處至省道路梗塞文報不通若必  
俟總督文檄未免耽誤三軍枵腹關繫匪輕今  
哈城新克兵勇需糧尤亟應請

旨飭下成祿就近檄催敦煌縣除去歲撥給三千石外  
再爲籌撥京石糧一萬五千石責令該縣趕緊

解運以資巴哈兩城兵勇食用並請

飭催綏遠城將軍卽將前奉

諭旨撥巴里坤軍餉銀十萬兩趕緊撥給委員文楨兼  
程押運來坤以濟要需所有此次打仗出力人  
員並捐輸銀錢各紳商及回子伯克並去歲哈  
密失陷陣亡官兵民勇容俟 臣查明再爲奏請  
獎卹奏入

上命軍機大臣傳諭穆圖善福興桂成楊岳斌李雲麟  
成祿文麟景廉伊勒屯何瑄曰哈密旣經收復地方  
關繫緊要文麟景廉皆係該城辦事大臣若再託故  
遷延不卽赴任萬一再有變故卽係該員等貽誤著  
穆圖善成祿迅催該二員星夜兼程赴哈將防守及  
善後事宜認真經理儻敢規避不前定當從重治罪  
並著成祿迅拔肅城刻卽帶兵赴哈布置西征事宜

毋失機會成祿等未到以前仍著伊勒屯何瑄隨時  
防範以杜賊匪回竄巴城糧食短缺前已諭令楊岳  
斌飭安西敦煌等處籌撥倉糧運解何以何瑄屢次  
催提該縣等竟以未奉總督文檄爲詞借端推諉著  
楊岳斌嚴飭該州縣等趕緊撥解不得再有延誤並  
著成祿就近檄催敦煌縣籌撥京石糧一萬五千石  
解送伊勒屯何瑄軍營以贍兵食綏遠城前次指撥

巴里坤餉銀十萬兩卽著福興桂成迅就現有之項  
儘數撥解如綏城解到之款不敷應用李雲麟存留  
榮全餉銀著酌量撥給伊勒屯何瑄以濟要需至札  
薩克郡王伯錫爾被害情形有無子嗣著伊勒屯何  
瑄確查具奏

上諭內閣曰逆匪竄踞哈密地方經總兵何瑄派令遊  
擊芮林等馳往該城於二月二十五日遇賊接仗官

軍四面環攻殺斃賊匪數百名奪獲軍械甚夥立將  
城池收復巴里坤鎮總兵何瑄調度有方深堪嘉尙  
著加恩以提督記名簡放其在事出力人員著准其  
擇尤酌保障亡官兵民勇並著查明請卹

同日裕瑞奏言前奉

諭旨令籌備左宗棠軍營戰馬當經通飭所屬一體欽  
遵茲據口外蒙古暨口內駐防官員兵丁等先

後報捐馬一千五百餘匹皆稱世受

國恩情殷報效等情具呈前來臣查時值青黃不  
接購馬不易之際該官兵等一聞

恩命卽能踴躍輸將洵屬急公好義現經報捐積有成  
數應請懇

恩賞收所捐之馬臣裕瑞會同臣玉亮先後按照冊報  
逐一親加查驗認真選擇稍有口老不堪乘騎

者立即飭令更換隨時烙印均交商都牧羣總  
管另羣妥爲牧放其牧羣應撥戰馬一千匹另  
委委員出口選擇以昭覈實總期口輕壯實以  
供戰征要需吉林征兵一有到京信息即便計  
程解往如嗣後續有報捐者再行具奏此項捐  
輸馬匹臣按照現時購買價值援引成案分別  
擬請鼓勵另行開單奏請



恩施奏入得

旨此項捐輸馬匹著卽賞收並著裕瑞等覈實估計分

別請獎

初九日 壬辰 李雲麟奏言准禮部咨稱棍噶儿泣

叅呼圖克圖究係何時

賞給名號應俟查覆到日再行鑄造印信等因查棍噶

札拉叅係同治四年在塔城勦辦回匪哈薩克

疊次出力經理藩院奏明奉

旨賞給呼圖克圖名號該喇嘛所統厄魯特蒙兵保護  
烏科兩城最稱得力且目下餉糈不足由各部  
落捐輸羊隻接濟軍食亦必須該喇嘛協同  
辦方能有濟惟有懇

恩飭下禮部迅將前項印信鑄出頒發該喇嘛祇領應  
用庶辦理一切呼應較靈實於北路防務有裨

聞

奏入報

同日署西安將軍右翼副都統穆隆阿奏言三  
月十八九等日回捻大股由興平武功一帶繞  
從咸陽城北直趨涇陽三原等處刻下探得賊  
蹤東竄同州朝邑一帶查該逆如東搶渡黃則  
晉省大爲喫緊應請

飭下山西撫臣責令沿河一帶嚴密防範以杜賊匪偷  
渡奏入得

旨昨已諭令趙長齡督同陳湜等認真防守矣

初十日巳癸穆圖善奏言臣於二月間奏明回衆

呈繳馬匹軍械已有成數遵

旨移師前赴慶陽正在陸續拔隊聞適奉

諭旨楊岳斌奏病勢甚篤請派員暫署督篆等因查慶

陽地當要隘毗連陝疆現據回日楊文治親往  
慶陽開導陝回均各哀泣求撫願歸原籍並齎  
到回日于彥祿等公稟一紙是慶陽情形已鬆  
而省垣重地關繫西北大局若竟無人鎮撫誠  
恐別有疏虞 臣擬三月二十八日親率馬隊馳  
赴蘭州遵

旨接署督篆查看各路情形妥籌勦撫惟馬生彥楊文

治等甫經就撫反側未安該回等所住半箇城  
地方爲四達通衢尤宜嚴加防範現已飛咨總  
兵胡世英統帶所部十營暫在甯條梁一帶擇  
要分紮兼顧陝甘兩省毗境所有甯安堡駐紮  
之馬步各隊仍責成提督黃金山等嚴密防守  
俾免疏失惟甘省軍務孔棘刻下賊氛徧地東  
則涇慶邠長西則涇州河狄西北則肅州甘州

疊遭蹂躪省垣四面受敵糧路不通其勢岌岌  
直同孤注臣擬於赴省後就原有兵力妥籌布  
置一面札飭靈州回紳副將銜馬朝清會同前  
任商州直隸州曹熙前往河狄洮州開導回匪  
投誠一面批飭陝回干彥祿等趕緊呈繳馬匹  
軍械靜候

恩旨則兩地回匪即可暫時羈縻仍擬將靈州報捐糧

石酌量撥解省城並設法招徠米商以濟兵民  
口食 臣將省垣防務布置就緒卽行督帶兵勇  
馳赴慶陽一帶籌辦勦撫旣可疏通糧道又可  
保全陝疆惟陝回之在甘省者歸思綦切非令  
其仍歸故土各安生業終恐不能紓

聖主西顧之憂可否請

旨飭下陝西撫 臣 仰體



皇上只分良莠不分漢回之意開導漢民將陝回之在  
甘者仍准安插原籍俾無失所則陝回安而甘  
回自安矣奏入

上命軍機大臣傳諭穆圖善左宗棠喬松年曰蘭州爲  
根本重地四面賊氛楊岳斌患病甚篤非得人前往  
鎮撫大局實難維持穆圖善現令總兵胡世英統帶  
所部暫紮甯條梁兼顧陝甘毗境並親率馬隊馳赴

蘭州暫行接署督篆所籌尙合機宜惟馬生彥等甫  
經就撫半箇城地方爲四達通衢甯安堡之防亦關  
緊要該將軍務當督飭黃金山等密籌防守並將馬  
生彥等加意羈縻不可稍有疏失左宗棠入陝後尙  
須勦辦捻股再議西征甘慶涇洮河等處回匪充斥  
穆圖善於省垣布置事宜稍有頭緒仍當相機出省  
悉心調度勦撫兼施毋得株守省垣致多貽誤回目

于彥祿具稟投誠經該署督批令呈繳馬匹軍械卽著妥爲開導俾知反正歸誠其河狄各處亦著飭令曹熙等乘機辦理現時在甘陝回不無懷思故土之意惟與漢民積釁已深日後恐難相容前諭左宗棠察看民情地勢於投誠匪衆妥爲安插該大臣務當體念情形勿拘成見熟籌辦法惟此次與捻逆勾結已經竄陝各回將來勢窮求撫仍不得率行收受喬

松年有地方之責其於陝回應如何安插之處亦著  
隨時諮訪與左宗棠咨商妥辦

十一日甲午伊勒屯奏言據佐領達三布等稟稱

我兵於二月二十五日行抵哈密賊已先期逃  
竄拏獲與賊同謀之纏頭伯克十餘名審訊賊  
蹤據供賊於正月二十一日將回王伯錫爾殺  
害於二月十六日西竄現踞四五堡地方我兵

於三月初一日追至五堡殺賊三四百名餘賊  
一半西竄一半逃至哈密南湖及北山一帶等  
語查此次克復哈密我兵未到之先賊匪已將  
輜重劫掠一空先期西遁現在哈密糧餉空虛  
又無大員鎮撫誠恐大股賊匪復來請

旨飭催成祿星夜帶兵赴哈相機進剿以防餘燼復然

奏入得

旨覽奏收復哈密情形與何瑄前奏大略相同著仍遵  
前旨會同何瑄認真防範以杜賊匪回竄毋稍疏懈  
伊勒屯又奏言上年訥爾濟奏請哈密餉銀十  
萬兩由陝甘總督撥解軍糧十數萬石由安沙  
撥運已奉

諭旨允准前因哈密復失道路不通未准報撥應請  
飭下陝甘總督卽將前項糧餉趕緊撥解以濟急需奏

入得

旨所需糧餉已於本月初五日諭令楊岳斌等分別撥  
解矣





欽定平定陝甘新疆回匪方略卷一百五十五 丁卯年

四月十三日 丙申 喬松年奏言准督 臣 楊岳斌咨

甘省需兵正急請留穆圖善一軍暫駐甘境緩

赴東路等因查 臣 松年前請

飭穆圖善迅援慶陽彼時慶郡被圍甚急是以必須大  
兵援剿現在賊勢東竄慶郡情形較鬆而甘省  
去此勁軍轉形掣肘應懇

天恩准照楊岳斌所請將穆圖善一軍暫留甘境以厚  
兵力督臣左宗棠月內卽可入關如果慶陽實  
在需兵臣當會商左宗棠妥籌調派以顧西路  
之防奏入得

旨前據穆圖善奏該將軍已赴蘭州接署督篆所有慶  
陽一帶防務俟左宗棠入關後仍當隨時會商妥籌  
兼顧

喬松年又奏言前奉

諭旨雷正綰募勇由臣確查精選查雷正綰兵力本單  
獨當一面實不敷用惟增兵必先籌餉雷正綰  
現在所部十餘營餉尙不足再添新勇何以給  
之業經咨商雷正綰請其停止招募此時陝甘  
兩省惟以籌餉爲急餉足方可議增新勇統俟  
左宗棠到後會同通盤籌畫奏入報

聞

喬松年又奏言查邵陽縣紳士編修王鳳翔連  
年帶團勦賊深爲出力此次賊竄邵陽該編修  
力戰陣亡身受刀矛各傷數十處死事甚烈可  
否仰懇

恩施將該編修照翰林院侍講學士例賜卹又署渭南  
縣縣丞李德潤分駐渭水之下邽當賊至時該

縣丞率團抵禦力竭被害應懇

恩飭部從優議卹以慰忠魂奏入得

旨允行

十四日 丁酉 裕瑞奏言前奉

諭旨籌備左宗棠軍營戰馬三千匹已由 臣 等勸諭所

屬官兵先後捐馬一千八百餘匹擬再諭令捐  
輸並由官羣調撥馬一千匹儻屆時捐輸不及

二千匹之數所短無多購辦尙易此項價銀擬  
由臣衙門軍需項下動用現在歸綏一帶防務  
喫緊需用浩繁所撥前項馬價請

旨飭下該將軍勿庸派員批解卽留該處用備操防急  
需奏入得

旨所籌甚顧大局卽由裕瑞趕籌捐辦其綏遠城所備  
馬價銀兩並著咨行福興毋庸批解

十六日 己亥 阿勒楚喀副都統德英奏言前據左

宗棠奏請於吉林招募礮手當卽遵

旨趕緊招募現已招有勇丁三百餘名 臣查看情形雖

應募有人急切難期足數當按各處戶籍酌分  
數日責成地方各官認真選派不准推延惟日  
期太緊誠恐欲速不達弗克一律精壯 臣擬於

四月初十日起程親赴西北各路驛站邊門一

帶廣行招徠以重軍務奏入

上命軍機大臣傳諭左宗棠富明阿德英曰吉林招募  
赴陝勇丁現雖應募有人急切難期足數若促以日  
期誠恐欲速不達卽著富明阿德英嚴飭各該旗民  
地方官就現在情形儘數挑選不必拘定二千五百  
名之數德英現赴西北各路親爲招徠務須揀擇精  
壯飭令迅赴左宗棠軍營俾得實用左宗棠於此項



勇丁到後認真教練以資攻勦

十八日

辛丑

楊岳斌奏言准穆圖善函稱定於三

月十二日親統馬步各隊前赴慶陽解圍其陝

回馬生彥楊文治等股應由 臣分撥數營駐紮

甯安堡藉資彈壓並遴派委員辦理安插事宜

等語查甘省西南北三路勦撫均須重兵前議

進取河狄之時業經檄調提督彭楚漢總兵李

助發等各率所部分路前進而南路爲各軍運糧要路深恐靜會鹽固等處回匪乘閒突出苦無多兵可派僅以總兵陳德隆數營扼紮東南邊中要隘又另抽數營交總兵王仁和統帶西進替換成祿部衆出關此外提督梅開泰所統各營則已派赴西甯一帶勦辦至省城根本之地附近時有寇氛僅有署蘭州道蔣凝學所統

安字一軍臣方慮南路及省城兩處防兵過單  
因檄飭涼州鎮總兵楊占鰲酌撥二三營來省  
並以涇州賊勢已鬆調副將黃有才帶領部衆  
會合陳德隆保全南路兼通糧運乃黃有才之  
軍未至而總兵李助發一軍在紅土窰地方先  
爲賊挫自此逆燄鴟張愈來愈衆彭楚漢等軍  
均爲牽掣尙未能直搗狄道逆巢又據駐紮肅

州總兵黃祖淦稟稱哈密回匪已東竄至玉門  
縣界恐其入關勾連肅匪直犯甘涼楊占熬之  
兵未敢多撥僅止派來一營臣之軍盡於此矣  
再欲分營移紮甯安堡實屬分無可分至收撫  
降回事宜穆圖善自撫甯靈回衆後威信所孚  
諸酋皆無疑慮其委員亦俱熟悉情形辦理漸  
有頭緒當此撫局將成之際一旦遽易生手前

去必至猜隙叢生於大局實多關礙現在慶郡  
踞賊悉數東趨城圍已解涇州亦無賊蹤是東  
路軍情已鬆合無仰懇

天恩仍飭穆圖善暫緩東行將所部各營分布於中衛  
甯安堡之間既於撫局可期順手卽甘涼有警  
亦得藉資勦辦抑或

飭下穆圖善將甯安堡駐紮各營及原辦安插委員毋

庸隨帶前進仍責成分別鎮撫以資熟手而免  
中變統候

聖裁奏入

上命軍機大臣傳諭左宗棠穆圖善楊岳斌曰前因楊  
岳斌奏病體難支准令回籍飭穆圖善馳赴省垣接  
署督篆茲據楊岳斌奏稱慶陽踞賊東趨城圍已解  
涇州亦無賊蹤惟甘省西南北三路勦撫均須重兵

省城存兵無多勢難分顧馬生彥等股甫經就撫甯  
安堡彈壓之兵實無可撥其辦理安插各務若遽易  
生手前去必至猜隙叢生請仍飭穆圖善暫緩東行  
並原辦委員毋庸隨帶前進所奏自係實情穆圖善  
此時計抵蘭垣著將楊岳斌所籌體察現時情形妥  
爲布置河狄等地方應如何防勦安撫之處並須設  
法兼顧以固省垣甘事糜爛已極左宗棠公忠素著

抵陝之後諒必能統顧全局以紓朝廷西顧之憂也

楊岳斌又奏言甘省各軍需食浩繁上年經陝

西撫臣劉蓉奏請由晉蜀兩省按月撥銀二萬

兩解陝採辦米糧轉運甘省以資軍食嗣臣派

員前往漢中府設局買米亦經奏明於川省應

解甘餉內按月撥銀二萬兩徑解漢中均經奉

旨俞允惟陝西現值捻回紛擾由陝赴甘路徑梗塞晉



蜀兩省協款是否按月籌解未接咨報明文卽  
陝省代買之糧亦無轉運實事該省辦理軍務  
自顧不遑於甘省軍糈斷難兼顧現當攻取喫  
緊各軍待哺嗷嗷惟有懇

恩飭下四川山西各督撫將原定每月協陝代甘買糧  
銀二萬兩及上年短解之數一併補足派員徑  
解甘肅秦安糧臺交收毋庸轉解陝臺致滋延

誤其川省月撥成祿軍餉一萬兩漢中米價銀  
二萬兩仍令按月分解以應急需奏入

上從之

十九日壬寅富明阿富爾蘇奏言副都統德英前

奉

諭旨招募勇丁適臣富明阿傷發增劇未克商同籌畫

茲臣傷病稍愈詢悉德英所募爲數寥寥覈計

不足十分之一查旗丁向無糧餉一旦挑派出  
征家口無以養贍且原議自投効之日每日僅  
給京錢二百文本不敷餬口之需德英復拘泥  
左宗棠原議令各該管官出具保結以致招募  
不易現擬此項勇丁每日加給京錢一百文啟  
程赴營時凡有眷口者每月各給家屬養贍銀  
一兩無眷口者不給其民勇無保者責令司事

各官詳加考察果有可用不必拘泥取保卽行  
收錄庶招募不致掣肘此項贍家銀兩仍在本  
勇丁應得鹽糧項下按月坐扣存留糧臺請

飭陝甘總督按年分春秋二季派員解送吉林以備發

放奏入

上命軍機大臣傳諭左宗棠富明阿富爾蓀德英曰吉  
林應募勇丁人數寥寥前據德英陳奏已諭令該將

軍等儘數挑選不必拘定二千五百名之數諒富明  
阿等接奉前旨自必欽遵辦理至德英令各該管官  
出保原屬慎重而富明阿請令司事各員詳加考察  
不必拘泥取保雖係通融辦理冀廣招徠但須細心  
訪查不可以無業游民充數致滋流弊著富明阿富  
爾蓀德英於通融之中仍寓慎重之意所請加給錢  
文及養贍銀兩均照所議行並著富明阿等查明應

給養贍銀兩數目咨明左宗棠按春秋二季撥解毋  
稍延誤

二十三日丙午伊勒屯奏言哈密地方自扎薩克

郡王伯錫爾被賊殺害後無人統轄該處甫經  
收復撫綏彈壓均關緊要相應請

旨飭催文麟赴任以資鎮撫再成祿一軍尙無出關信  
息應請

旨飭催成祿出關乘機進剿奏入

上命軍機大臣傳諭成祿文麟景廉伊勒屯曰哈密甫經收復撫綏彈壓在在均關緊要著文麟景廉懍遵疊次諭旨趕緊出關馳抵任所將應辦事宜極力整頓毋稍遲延成祿被肅州賊匪牽掣竟無出關信息尤屬疲玩著卽振刷精神激勵士卒迅將肅城攻拔以便振旅出關毋得再行遷延致干重咎伊勒屯現

任領隊大臣文麟等未到之前務當盡心防守以固疆圉

二十五日 戊申 左宗棠奏言頃接劉松山等稟報

涇陽之捷知陝捻勾合回逆將東趨同朝 臣原

擬取道荆紫關入陝至是改議由潼關大路冀

可迎頭截勦又據劉松山等稟報小壕大壕之

捷餘賊由西北竄逸似賊渡黃竄晉之謀未息



山西河防僅恃臬司陳湜一軍恐難兼顧臣已  
速飭閩鄉防軍渡河而北接防河津以南替出  
陳湜水陸各營移防河津以北期臻周密臣行  
抵澠池陝州時偵察賊蹤如晉防周密臣取道  
潼關入同朝循河而北督同秦軍節節掃蕩如  
捻回或竟已過河竄晉則全局關繫甚重臣擬  
卽率各軍由茅津渡河先清晉省賊氛然後入

秦專勦回逆

左宗棠又奏言前奉

諭旨命臣兼節制山西防軍嗣准山西撫臣趙長齡緘

商晉防已責成臬司陳湜辦理防務可恃若別

歸節制恐軍情不無觀望囑臣無庸調度誠不

知撫臣意之所在臣查晉省防務僅陳湜一軍

分布河津以南抵渭水入河之處止自龍門以

北將近千里津渡甚多地廣兵單不敷分布現  
在賊已由韓城郃陽北趨臣軍入關在賊之後  
不但勢不相及而晉省北路河防未固卽能痛  
勦亦祇速其東趨於事無益除飭秦軍劉松山  
黃鼎相機繞出賊前遏其北竄飭陳湜俟豫軍  
渡河接防後卽移軍向河津以北節節嚴防爲  
暫顧目前之計因思臣前奏調吉林礮手二千

五百開練馬隊赴秦剿賊此時如已齊備似可  
卽由綏遠城取道入晉助剿若賊未入晉則由  
和林格爾托克托城等處入邊牆抵河曲縣循  
黃河東岸南下亦可壯晉省西北一路聲威將  
來晉防葺事由蒲州西渡入秦道路亦不迂折  
惟所經無驛地方須由晉省籌辦糧食麩料俾  
得遄行伏乞

飭下山西撫臣屆時妥爲照料勿稍推諉又此項破手

需員分統伏懇

聖明簡派曾經戰陣明練耐苦兩員分統西行奏入

上命軍機大臣傳諭左宗棠趙長齡曰前據庫克吉泰等奏劉松山等軍節次獲勝賊勢已窮當諭該將軍等督飭各軍乘勝殄除並防竄晉左宗棠節制晉省呼應始靈著隨時偵察賊蹤會同趙長齡等加意防



挑齊喜昌尙未回吉林著該將軍等先於曾經戰陣  
明練耐苦力能約束者慎選兩員分起管帶入晉此  
項礮手若盡由邊外行走支應甚難自應仍由山海  
關先抵直隸屆時察看山右軍情再定所向非但支  
應較易道途亦爲便捷將來如入晉境著趙長齡飭  
沿途妥速豫備俾利進行喜昌到吉林後卽迅飭前  
往毋許延緩檢回來往同朝晉省岌岌堪虞所有山

西軍務仍歸左宗棠節制以一事權趙長齡務須和衷會籌不可先存意見陳湜有防守黃河之責尤宜激勵所部實力嚴防毋得貽誤

同日李雲麟奏言前因蒙古民勇潰變奉

旨飭臣會同烏科兩城一體嚴防以固北路門戶查前

項勇丁自潰變之後盤踞於科境迤南聚衆將及三千人烏科南境游牧各旗皆恐其乘閒復



聞

來擄掠近聞前項潰勇駐紮鄂倫布拉克迤南  
勇目鄧生玉等與孔才所部互相仇殺所存牲  
畜無多大半逃散已成瓦解之勢不至別生變  
故奏入報

二十七日 庚戌 楊岳斌奏言據丹噶爾同知李海

裕等稟稱本年正月閒貴德廳回民夜聚禮拜

寺商謀不軌經地方官拏獲奸細據供河州洮  
岷回目沙萬全與貴德回族謀攻廳城同知承  
順當卽密調番兵防範回匪乘番兵未到於二  
月十六日二更時突撲廳署將承順及其家屬  
一概戕害並將營員學官拘至逆首法牙古子  
店內勒令書寫漢回通謀官逼民變稟詞通報  
西甯文武各衙門欲脅西甯大臣據稟入奏現

在廳城爲賊霸踞貴德中哨千總乜生春夤夜  
潛逃至丹噶爾請速發兵剿辦等語查西甯各  
處回匪前經辦事大臣玉通堅意主撫臣早知  
其不足恃於春初專派提督鄧全忠梅開泰帶  
領部勇扼紮要隘並派副將孟伯林整飭西甯  
碾伯各路鄉團互相防範乃大兵正擬移營而  
賊匪先已蠢動是其無心就撫已可概見不意

玉通來文仍以主撫查辦爲詞止臣暫緩進兵

臣未敢稍涉欺飾貽害地方除飛飭鄧全忠梅開泰孟伯林等趕緊進剿並確查死事官弁另行奏卹外其餘聽賊指使捏詞稟報之文武官員並此次潛逃出城之千總也生春相應請

旨一併先行革職容臣查訊切實另行擬罪

楊岳斌又奏言甘省餉糧軍火各項萬分缺乏

陝西後路糧臺自上年十月內解到餉銀一次  
迄今五月有餘竟無續撥之款每勇於半年中  
僅支領銀數錢近據各營紛紛泣稟非稱呼謀  
頻仍卽謂殍斃將盡臣與司道等目擊心傷不  
得已上自官署下至商民極力湊借僅得銀四  
千餘兩以之分給將士祇供數日鹽菜之需甘  
事窘迫如此決裂不容轉瞬惟有籲懇

天恩飭下陝西撫臣轉飭林壽圖將陝臺現存餉銀軍

火帳房等項迅速派員探明路徑繞道解甘並

懇

飭下兩湖督臣湖北撫臣督催湖北後路糧臺將餉銀

軍火源源運至漢中分局轉解來甘以救飢軍

而扶危局奏入

上命軍機大臣傳諭譚廷襄楊岳斌曾國荃喬松年玉

通林壽圖曰貴德廳回民突起叛亂將同知承順及家屬殺害踞守廳城覽奏實堪痛恨西甯回民就撫本不足恃玉通主撫而毫無防範以致匪黨益無忌憚此次貴德旣爲賊踞勢難再示羈縻著楊岳斌卽飭提督鄧全忠等督帶所部勇丁聯絡該處鄉團設法進剿迅將貴德廳城攻拔毋任久踞玉通亦當督率兵團嚴密防守毋再輕信奸回詭詞致爲所誤所

有死事員弁著楊岳斌查明請卹千總乜生春潛逃  
出城著先行革職交楊岳斌查辦其餘聽賊指使捏  
詞稟報之文武員弁著一併查明叅辦甘省餉糧軍  
火萬分缺乏陝甘唇齒相依豈容坐視著喬松年督  
飭林壽圖將陝臺現存餉銀軍火帳房等項迅速派  
員探明路徑繞道解甘並著譚廷襄曾國荃督催湖  
北後路糧臺將餉銀軍火源源運至漢中分局轉運



赴甘以濟眉急

楊岳斌又奏言查甘省東路近日賊勢經雷正  
綰等數路夾擊該逆分股竄至甯州鎮原及涇  
州東北一帶而仍以長官焦村等處爲其老巢  
雷正綰與各軍商定二月二十二日分三路直  
取長官二十五日各軍鼓勇前進逆回復糾約  
焦村之賊萬餘彼此援應我軍分投衝殺斃賊

三百餘名生擒二十餘名賊始敗退昨據雷正  
縮來文有長官計日可破之語其平涼隆德亦  
經雷正縮派營駐紮以固城防惟慶陽解圍之  
後逆賊東竄者多而前在靖遠及甯靜各路陝  
回分股一由固原炭山一由華亭馬峽鎮乘隙  
東趨直衝陝境賊馬颯馳此擊彼竄甘東與陝  
疆到處毗連不下千數百里若必處處攔截兵

聞

力實憂不足現已飛咨陝西撫臣卽以甘軍援  
陝之劉效忠洪殿元等軍堵扼邠長一帶仍催  
雷正綰張在山等極力勦辦奏入報

新加坡中華總商會

1111

欽定平定陝甘新疆回匪方略卷一百五十六 丁卯年

五月初二日 甲寅 成祿奏言自本年正月間擊退

援賊逆首傷亡肅逆負嵎死守我軍四面仰攻  
未能得手二月二十三日據玉門縣稟報探得  
哈逆大股約四五千人由安西迤北之黃蘆岡  
長流等處東竄聲稱赴援肅州請速撥兵堵禦  
等語 臣 所部本單分則愈弱不得已飭令寶型

督率三營星馳出關相機迎堵於距關四十里  
之西雙井子安營該逆邊馬已擾及玉門北路  
之黃花營等處竇型選精騎數十令每日易服  
換馬四出哨探復派步隊分紮各山隘口徧插  
旌旗晝則曳柴揚塵夜則多放號火以爲疑兵  
賊果驚疑不決紛紛退散我軍勢弱未敢窮追  
亦卽飭令回營是役不折一矢立退援賊殊出

意料之外臣惟當激勵將士竭力攻城以期早日克復

成祿又奏言前奉

諭旨訥爾濟奏哈密復陷已革哈密副將凌祥首先逃出交部照例治罪等因凌祥於正月二十五日到臣軍營據稟去歲十一月初四日賊竄哈密瞭墩地方回王伯錫爾派凌祥等同往堵禦初八日

行至柳樹泉地方官兵在前纏頭馬隊在後甫  
經接仗後路纏頭忽變直衝前隊以致官兵立  
腳不住紛紛潰散凌祥死戰得脫身受矛傷四  
處乞爲代奏請罪等情 臣 察看凌祥年力正強  
擬暫留軍營帶罪效力仍令聽候部議到日再  
行飭遵奏入

上命軍機大臣傳諭成祿曰哈密回匪由安西東竄玉



門冀援肅州經成祿派令竇型迎擊多設疑兵賊衆  
旋即驚退惟該逆雖經暫遁難保不去而復來仍當  
勤探嚴防不得稍形鬆懈並督兵迅拔肅城速爲出  
關之計毋再稽遲干咎已革副將凌祥前在哈密接  
仗失利本應治罪現據成祿查明該革員於接仗時  
身受矛傷著從寬暫留軍營責令出關效力自贖

同日楊岳斌奏言前奉

諭旨令穆圖善接署督篆仰見

皇上於保全大局之中寓體恤微臣之意現聞哈密逆

回有勾連肅匪欲撲甘涼之說臣自本年正月

以後病勢日增足不出戶業已三月有餘若久

不交卸恐於軍務地方俱多貽誤業已專員往

催穆圖善迅速進省任事儻該將軍遲久不來

卽擬將總督關防派員齎送該將軍行營接收

以一事權奏入得

旨前據穆圖善奏赴省接署督篆當經諭令該將軍布  
置省垣事宜相機勦撫矣穆圖善到後該前督卽將  
一切情形妥爲籌商期無貽誤

初四日丙辰何瑄奏言三月初旬孔才率所部勇

丁到坤當飭局籌給口糧令前往瞭墩駐紮防  
守張和一營駐紮沙棗泉郭鳳賢帶領壯勇駐

紫五堡與張和孔才聲勢相依其餘官兵民勇均駐哈城現在哈密境內漸次肅清兵勇日支口糧麩斤係郡王伯錫爾福晉與衆伯克籌辦茲據郡王福晉等呈稱去歲十一月初五日逆回突犯哈境郡王派副將凌祥統兵勇三千名復派伯克夏時林棉布都拉領回兵五千名迎敵初八日行抵柳樹泉地方遇賊接仗陣亡官

兵民勇並回兵二千餘名夏時林被賊生擒棉  
布都拉回城稟報郡王一面令人持印至巴里  
坤請兵應援一面親率回兵二千名前往決戰  
初九日行抵頭堡遇賊接仗寡不敵衆陣亡回  
兵七百餘名郡王被賊生擒解至哈城監守並  
將印信捺去至本年正月二十一日郡王旋回  
罵賊被害等情查伯錫爾忠勇性成勦洗逆回

疊著勞績茲以哈密復陷罵賊被害死事最爲  
慘烈合無仰懇

天恩飭部從優議卹以慰忠魂

何瑄又奏言巴里坤糧餉向來短絀去年本處  
歉收又值哈密復失糧道阻塞巴城每石小麥  
需價銀三十餘兩巴哈兩城兵勇枵腹堪虞本  
年荒旱不雨播種不及十分之二臣前經奏請

在於敦煌縣指撥倉糧一萬五千石懇

恩飭下陝甘督

臣

速催該縣解運巴城以濟急需並請  
飭催成祿剋日赴哈相機進剿奏入

上命軍機大臣傳諭穆圖善楊岳斌成祿何瑄曰前據  
伊勒屯奏查明伯錫爾被害情形已將該郡王照札  
薩克親王例賜卹不日諒可接奉前旨何瑄現派孔  
才等所部分駐瞭墩等處其餘兵勇駐紮哈城哈密

境內漸次肅清卽著該總兵會商伊勒屯等妥籌鎮  
撫一面仍將竄匪相機進剿迅殄逆氛巴里坤哈密  
兩城米糧萬分缺乏又兼本年荒旱難望收成兵勇  
枵腹堪虞亟應速籌接濟何瑄前經奏請於敦煌縣  
指撥倉糧一萬五千石著穆圖善楊岳斌嚴飭該縣  
趕緊採辦解運巴城以濟眉急成祿著懍遵疊次諭  
旨迅將肅城攻拔振旅出關毋再遷延干咎





固應清還若如楊岳斌所請將已報起程者皆作舊  
餉豈穆圖善帶兵赴省皆可枵腹從事乎所有該署  
督未到任以前已報起程協餉著仍飭糧臺通融妥  
辦如楚軍釀成別故惟楊岳斌是問穆圖善於到任  
後斟酌情形妥籌支發毋稍偏袒

同日喬松年奏言前奉

諭旨令將撫回事宜與督臣左宗棠籌辦等因查辦回

之法非撫不能戡事非先勦則撫不能施非籌  
給安插之地資生之費則雖撫亦不能善其後  
回雖變亂而對人自明心迹必曰但雪讎怨非  
叛

國家且擄得陝人則殺之擄得別省人則釋之是  
猶有反正之機但能悔罪洗心

朝廷廣予包容回民仍得安居無恐新疆回衆亦

必聞風效順所謂非撫不能蕝事也惟其中良  
莠不齊良回多爲莠回所脅是必先加誅勦俾  
知官兵之不可抗然後開一面之網予自新之  
路其莠者懾服而不敢動其良者乃傾向而無  
所疑所謂非先勦則撫不能施也陝中漢回積  
恨太深實有固結莫解之勢陝民一聞撫回之  
語痛心疾首非文告口舌所能挽回回民之屋

宇爲漢民所毀墳墓爲漢民所平回民之田亦  
悉爲漢民所有其勢兩不相容斷難雜處安插  
之法除已撫甘回本係土著其陝回必須於北  
山一帶擇空曠之地可以開墾者計畝授田資  
以牛種課以農耕編以保甲方可冀其相安無  
事所謂非籌給安插之地資生之費雖撫亦不  
能善其後也 臣初到陝時亦有招撫陝回之意

今熟加體察實屬窒礙難行若勉強置於故地  
前隙未銷後怨更結不終日卽又械鬪而多變  
故矣惟和衆尤賴豐財必有款可動乃能議安  
插之方給牛種之費陝省瘠敝已極似此鉅款  
實屬無從籌辦計左宗棠五月內必可到陝  
臣  
惟有恪遵

諭旨與之悉心籌畫以期仰慰

宸廡奏入

上命軍機大臣傳諭左宗棠喬松年曰喬松年奏覆辦理撫回情形一摺頗爲有見著俟左宗棠到陝後妥商籌辦

喬松年又奏言據甘泉縣知縣陳澤農稟稱三月二十八日回匪攻撲縣城遊擊李允芳與戰受傷賊遂入城陳澤農被救出城旋與李允芳

整兵擊退踞賊將城收復印信業已失去等語  
查該縣失守城池雖卽行克復惟有無逃匿情  
事仍須確查李允芳救援不力亦難辭咎應請  
旨將甘泉縣知縣陳澤農延綏鎮標右營遊擊李允芳  
一併革職奏入

上從之

同日烏里雅蘇台參贊大臣榮全奏言本年三



月杪協領三音布等派前鋒訥勤圖烏仁泰至  
烏城稟稱上年十二月初三日由喀帕兒解餉  
經歷俄境終日風雪交集正月開始抵斜米俄  
官必庫那圖爾因鄭重餉銀恐途次或有疏失  
不令前進欲俟接到總理衙門覆示再令解往  
又據稟稱有索倫營副總管博清阿與該協領  
等清字信函內稱博清阿於上年九月閒攜眷

至圖爾根所屬俄羅斯行營就近駐紮正在招  
集西四旗官兵十二月二十二日夜間忽有纏  
頭回匪數百逼令圖爾根移居薩瑪勒先行搶  
奪牲畜物件漸至戕害人命逃出男婦老幼尙  
有千餘名之多懇向喀帕兒辦事官派兵護解  
逃出人等收至庫車烏蘇喀帕兒等處撫養等  
語查該索倫等續行逃出之一千餘人不知此

時均在何處至餉銀已抵斜米 臣不日往俄國  
清理事件俟行抵該處後查明此項餉銀或未  
經起運或業已起行除覈算扣留若干帶往辦  
理一切其餘銀兩均令解交烏里雅蘇台以資  
應用

榮全又奏言此次前鋒訥勤圖烏仁泰由斜米  
行至烏垣計程數千里正值塞外嚴寒烏克山

嶺之路雪壅難行該前鋒等徒步越嶺辛苦備  
嘗可嘉可憫可否將訥勤圖烏仁泰均

賞加六品頂戴以示激勵出自

天恩奏入

上命軍機大臣傳諭榮全曰喀帕兒所解餉銀俄官阻  
止前進亦係慎重之見此時是否解到抑應扣留起  
解均著榮全酌量辦理續行逃出索倫男婦尙有千

餘名之多在俄境逗留聞之深爲軫念索倫勁旅從前效力最多豈可令其流離失所著榮至於赴俄國商辦事宜時將前次逃出及此次續行逃赴俄國之索倫男婦厚給川資設法護送至烏科兩城妥爲撫恤斷不可吝惜小費致令再受困苦此事朝廷夙夜在念若不趁此積雪融化之時趕緊接出則此後更難行走諒榮全定能仰體辦理也前鋒請勤圖烏仁

泰由斜米赴烏垣正值嚴寒之際跋涉越嶺深堪嘉  
尙均著賞加六品頂戴以昭激勸

初八日庚申楊岳斌奏言署理陝甘總督穆圖善

於四月十三日到省十五日接印查現駐甘省

各軍歸臣調遣者曹克忠所部十居其七臣部

楚軍不過十之二三自應併歸穆圖善接統臣

已通飭各營造具清冊齎交穆圖善點收贖存

軍火等件亦全數移交穆圖善收用惟各軍從  
征邊隴困苦異常往往終日不見一糧數月不  
獲一餉此等情形實爲用兵省分所未有查原  
協楚軍餉銀各省欠解甚多惟有仰懇

天恩准 臣前奏 臣未交卸以前各省報解協餉仍截清

款目

飭令穆圖善悉數發交楚軍糧臺找發欠餉庶勇丁不

致缺望奏入得

旨所請將各省協甘餉銀截清款目發交楚軍糧臺一節昨已有旨令穆圖善於到任後斟酌情形妥籌支發矣

初九日 辛酉 富明阿富爾孫奏言前奉

諭旨招募礮手現已募一千二百餘名仍飭承辦官員趕緊添募並教練技勇營規不得虛應故事惟



募到之勇逐日口食之需及各城請領口糧銀兩需用甚鉅前奉部文已由協甘項下撥解吉林餉銀七萬兩仰懇

天恩飭催順天府迅速解到以備支發口食及辦理軍械之需奏入

上命軍機大臣傳諭萬青藜胡肇智都興阿富明阿富爾琿曰此項銀兩已據戶部發交順天府轉解而吉

林又待用孔殷著萬青藜胡肇智迅委妥員悉數起  
解並著都興阿卽日派員迎提於餉銀到日迅爲轉  
解毋稍遷延富明阿富爾蓀務將此項礙手趕緊訓  
練催集成軍一俟餉銀解到卽行置辦軍械分飭起  
程以資攻勦

十五日 丁卯 庫克吉泰喬松年奏言正紅旗漢軍

副都統塔爾巴哈台參贊大臣幫辦軍務德興

阿前丁母憂經臣等奏改署任現軍務稍鬆擬  
奏懇

天恩給假穿孝乃於五月初四日突感時疫至初五日  
因病出缺查德興阿南北馳驅身經百戰同治  
元二年閒與多隆阿同勦逆回疊著勲績此次  
帶兵入陝報

國之志愈堅而積勞已久宿疾甚深猶屢次扶病

在咸陽咸甯等處親身督戰以少勝衆疊挫兇  
鋒軍務漸有起色猝然溘逝悼惜同深該大臣  
在營僅一老僕隨身其長子富慶次子富亮均  
未相隨身後查點行裝蕭條布被一無長物合  
營兵將無不痛哭流涕實屬忠勇性成可否籲

懇

皇上格外鴻慈優予恩卹之處伏候

聖裁奏八

上諭內閣曰幫辦新疆北路軍務正紅旗漢軍副都統  
塔爾巴哈台參贊大臣德興阿於咸豐年間督辦江  
北軍務屢著戰功因事革職同治初年朝廷棄瑕錄  
用在陝西勦辦回匪復著勞績本年帶兵出關行抵  
陝境適遇搶匪肆擾疊次督隊接仗力挫兇鋒方冀  
長資倚畀克竟全功茲聞在營病故殊深悼惜德興

阿著加恩照都統軍營病故例議卹任內一切處分  
悉予開復靈柩回旗著沿途地方官妥爲照料伊子  
候補協領富慶候選知州福亮均著俟百日孝滿後  
由該旗帶領引見

喬松年又奏言據提督劉厚基稟報率軍擊剿  
鄜州張村驛回逆連獲勝仗賊始回竄又聞洛  
川中部兩境有賊蹤分擾當卽馳往援剿將賊

擊退其另股竄至延安之賊擾及安定延川一  
帶適穆圖善所派總兵胡世英帶兵馳擊大挫  
兇鋒臣令該總兵暫紮延安而檄延綏鎮總兵  
陶茂林率兵馳往綏德一帶會剿復有零股竄  
近韓城臣飛調副將鄭春元一軍從同官星馳  
堵擊甘回飄忽往來竄陝者絡繹不絕陝省祇  
此兵力惟有酌度緩急悉力防剿以清腹地奏

入報

聞

十七日己巳成祿奏言自同治四年十月起截至

本年三月底止計共收各處協餉銀八萬一千

兩臣所部十四營每月需餉五萬兩所入尙不

敷兩月之需各營困苦情形不堪言狀百計拊  
循幸免譁潰儻出關後餉項仍前支絀恐無以



固結軍心近准部咨僅留四川湖北陝西三處  
作爲臣未出關以前軍餉其餘歸併新疆協餉  
解交烏城由李雲麟分撥轉解臣軍得餉更少  
提餉愈艱合無仰懇

天恩飭部酌議於新疆協餉項下由歸化城總局每月  
分撥銀數萬兩作爲臣軍餉需逕由歸化城迎  
提較烏城道路略近以免往返周折奏入得

旨戶部速議具奏

十八日

庚午

富明阿富爾孫奏言內外各城募到

礮勇前後統計約二千名

臣

等會同統領營哨

等官一俟餉銀解到先行支發軍裝及養家路

費等項即將勇一千五百名分作三起起程赴

京候調其餘續募之勇俟選募足數續行起程

奏入報

聞

同日成祿奏言據報安西州踞逆於二月中旬  
盡載輜重傾巢而出聲稱先取安玉入援肅州  
二十五日巴里坤撥來兵勇四千名乘虛入城  
收復查此股逆回旣已計無復之勢必仍返故  
穴現安玉一帶絕無賊蹤惟雙井子以西井泉  
悉被堵塞巴里坤軍聲旣振又調集張和孔才

等團勇數千兵力愈厚堪保無虞近日肅州賊  
勢更形窮蹙惟堅城仰攻師勞功半 臣商令王  
仁和一軍移紮近城西南一帶與各營聯絡庶  
合圍周而肅逆可以坐困奏入得

旨肅州賊勢旣蹙著與王仁和一軍迅籌圍攻毋得日  
久淹滯

欽定平定陝甘新疆回匪方略卷一百五十七

丁卯年

五月十九日辛未左宗棠奏言臣查此次陝西漢

回讐殺事起細微因平時積釁過深成此浩劫  
此時如專言剿無論誅不勝誅後患仍無了日  
如專言撫而概予曲赦則良莠不分從前被害  
之數百萬漢民冤痛未伸何以服輿情而弭後  
患竊維辦理之法仍宜恪遵

論旨不論漢回祇分良莠以期釋怨解紛其肇釁滋事  
之奸回率皆無業回民與土匪游勇無異不但  
漢民警之卽良回亦未必甘心傾附如責令良  
回縛獻軍前懲辦或帶引官兵尋蹤勦捕藉此  
區分良匪在回民自解有詞在漢民亦可少蠲  
夙忿庶事理兩得其平惟回民思歸故土目前  
求其安插周妥固已爲難後此冀其耦俱無猜

尤非易事 臣擬於入秦後體察地方情形徐爲  
籌辦目前宜加以兵威先將逆回痛予剿洗然  
後察其乞撫之誠僞別圖所以處之事前雖不  
拒其乞撫之情亦不欲率允安插原地致後此  
窒礙難行反損威信也奏入

上命軍機大臣傳諭左宗棠喬松年曰左宗棠奏覆陳  
剿撫回匪事宜與喬松年前奏大略相同回民亦係

朝廷赤子斷無盡行誅戮之理惟其中積悍匪徒必先勦盡始可將良回分別招撫尤須另籌曠土妥爲安插勿令與漢民構釁方可久安所稱責令良回縛獻逆回並令其導引官兵尋蹤勦捕俾漢民少蠲夙忿之處辦理頗合機宜著俟入關時與喬松年妥商籌辦

二十三日  
乙亥  
穆圖善奏言甘省自軍興以來諸



事掣肘而尤以餉項支絀爲急務查甘省地方  
瘠苦額徵地丁無多兵燹之後滿目瘡痍現值  
大兵雲集凡支發鹽折採辦米糧全賴各省協  
濟而頻年餉源不繼支絀萬分雖由各省未能  
按數協撥實由陝西糧臺任意截留以致甘省  
數萬飢卒枵腹荷戈羣情渙散若不設法變通  
其患有不堪設想者查各省每月協撥楊岳斌

軍餉江甯應解銀二萬兩江蘇江海關應解銀  
一萬兩浙江應解銀五萬兩湖北應解銀三萬  
五千兩湖南應解銀一萬兩江西應解銀二萬  
兩廣東應解銀一萬兩每月共應解銀十五萬  
五千兩由湖北後路糧臺彙解陝西糧臺轉運  
秦州解省分撥各營道路修阻節節轉輸縱按  
月至數解甘已不免多需時日乃陝西糧臺不

顧大局輒以抵還欠款爲詞任意截留自本年正月以前截留至四十餘萬兩之多致甘省各營勇丁嗷嗷待哺設有變端誰執其咎惟有籲

懇

天恩飭下江甯等省各督撫按月籌解源源接濟並

飭林壽圖不得再行截留所有本年三月以前及續解

餉銀仍照楊岳斌前奏由鄂徑解漢中交道員

陳丕業經收轉解秦安糧臺候臣分撥又疊經

奉

旨指撥之山西山東河南三省協餉三十萬兩四川協

餉三十三萬兩及河東道應解慶陽協餉十二

萬兩均係徑解陝西糧臺究竟解過若干甘省

無案可稽河東乙丑綱應解蘭州協餉銀二十

萬兩將次報解完竣未見分毫到蘭丙寅綱應

解蘭州協餉迄今尙未報解似此有名無實何以資防剿而持危局應請

旨飭下各督撫並轉飭河東道迅速撥解照前奏補足

欠解之款其山西山東河南三省及河東道協

餉逕解甯夏糧臺由臣酌量分撥並在歸化城

包頭鎮一帶委員採買米糧俾供軍食四川省

協餉徑解漢中糧臺仍由臣隨時委員赴各省

催提以期迅速至陝軍在甘剿賊應歸甘省籌撥餉銀甘軍在陝剿賊應歸陝省籌撥餉銀如此劃清界限庶不至互相推諉亦免兩省重複牽混猝難清釐仍請

飭下陝西巡撫及藩司遵照辦理奏入得

旨允行

穆圖善又奏言臣於四月間遵

旨馳抵甘肅省城接署督篆將地方軍務情形詳加體  
察始知甘省兵單餉絀有岌岌不可終日之勢  
各營將官勢分相埒統屬無人州縣懸缺揀補  
乏員種種棘手殊費周章查蘭州爲西陲重鎮  
控制全隴毗連陝疆數載以來賊氛肆擾慶陽  
涇州鞏昌西甯甘州肅州等處無不疊遭蹂躪  
河狄洮州附近省城尤爲心腹之患安定靖遠

甫經收復滿目瘡痍葦爾省垣勢成孤注雖現  
有一百餘營而分防分勦如省東省南之慶涇  
馬營張家川蓮花城秦州省西省北之河州狄  
道甘州涼州肅州平番碾伯米拉溝附省之七  
里河柳溝阿干鎮等處並防守省城各營由東  
而西袤延二千餘里或擇要分紮或相機進勦  
賊匪則出沒靡常官軍則顧此失彼蓋兵以分



而見緇地以廣而難防加以餉需奇絀各省協撥之款解到寥寥杯水車薪燃眉莫濟近省產糧之地如秦王川一帶額徵糧石稍供軍食乃上年秋閒被旱地畝荒蕪糧價昂貴現在農田雖已補種而邊塞地寒刈穫較晚五六兩月仍須設法接濟以瘠苦之區當兵燹之後民力已竭無計輸將而數萬飢軍嗷嗷待哺譁潰堪虞

臣惟有設法拊循力籌補救以固兵心

穆圖善又奏言查護理甯夏將軍副都統金順

隨多隆阿暨臣軍營身經百戰膽識兼優爲將

領中不可多得之員前經臣奏請隨營勦賊未

蒙

允准何敢再事瀆陳惟刻下甯靈地方靜謐漢回相安

該副都統以有用之才置之無用之地殊爲可

惜合無籲懇

天恩派員署理甯夏將軍印務抑或交副都統豐紳暫  
行護理仍

飭金順來 臣軍營襄辦一切藉資臂助

穆圖善又奏言前督 臣楊岳斌所部諸軍分紮  
各路曾經該督奏明歸 臣節制調遣惟 臣甫經  
到任人地生疏將弁之賢否勇丁之強弱一時

無由深知現在糧餉奇絀軍務喫緊非有威望  
素著之員統領各營不足以資鎮撫查有統帶  
安字營署蘭州道蔣凝學沈毅明幹公正精詳  
與各營將弁情誼相孚兵勇亦皆欽服近來帶  
兵各員中實未多覲 臣愚昧之見除雷正綰曹  
克忠舊部外其楊岳斌所部各營皆歸該道總  
統仍令在任襄辦一切以資臂助於軍務不無

裨益奏八

上命軍機大臣傳諭穆圖善曰甘肅瘠苦情形久縈廡  
念穆圖善現署督篆務當悉心經理營官旣無統領  
州縣懸缺不補軍務地方何由整頓該署督任楊岳  
斌久病之後當取其長而矯其失不存成見方能  
有益金順素能辦事著准其調赴省垣所有甯夏將軍  
篆務卽著豐紳護理豐紳所署副都統並著三壽署

理道員蔣凝學久歷戎行素爲楊岳斌所任用穆圖善派令總統諸軍惟才是用必可使屬員悅服現在左宗棠到任需時穆圖善務宜振刷精神竭力整飭以副委任

穆圖善又奏言安定縣城於四月初六日被逆回龔陷河州鎮總兵李助發帶隊入城分路截殺斃賊數百名賊勢不支隨卽逃竄登時收復

署安定縣知縣多齡署守備秦兆祥把總孫光  
典教諭藍毓秀委員陶壘均於城陷之時力戰  
陣亡懇

恩飭部後優議卹奏入得

旨多齡等均著交部從優議卹

二十六日  
戊寅富明阿富爾孫德英奏言左宗棠

所募賊勇二千五百名現已如數募齊所需長

夫一千名現飭該勇丁自行選募正副統領營  
總參領等官以及百長十長等經 臣 德英按名  
指派均係曾歷戎行習騎耐勞不敢遷就所有  
派出各員責令分隊管理申明紀律沿途妥爲  
約束一俟抵京領有馬匹立即管帶前進此項  
弁勇每名給發五十日鹽糧銀兩恐尙不敷應  
用請



旨飭下沿途各督撫轉飭地方官一律接濟奏入

上命軍機大臣傳諭左宗棠都興阿額勒和布恩錫富  
明阿富爾蓀劉長佑趙長齡曰左宗棠所募礮手二  
千五百名現已據富明阿等奏稱如數募齊並勇丁  
自募長夫剋日起程每名雖給付五十日鹽糧而受  
募遠征亟應體恤著都興阿額勒和布恩錫劉長佑  
趙長齡飭令經過地方官量加接濟以利遄行

二十八日

庚辰

穆圖善奏言據延安府知府銓儒

總兵胡世英靖邊縣知縣曹德元先後稟稱甘

泉等縣賊勢猖獗官兵寡不敵衆甘泉縣城於

三月二十八日失守延長縣屬之千谷驛延長

川膚施縣屬之高橋鎮鮑家灣等處均被賊匪

竄擾保安西南花沙子地方之堡子山有賊會

袁炳等糾衆萬餘屯紮山上時出焚掠其分股

賊首董幅祥等糾衆數千占踞距該縣九十里  
之藍家跳靖邊縣屬之劉家峁等處旋竄入懷  
遠州之冷窰子地方又准金順咨稱甯條梁有  
馬步賊千餘名竄至安定縣屬之瓦窰堡復竄  
往邱家坪盤踞查甘泉毗連延鄜地當要隘保  
安靖邊一帶爲大營運解糧餉軍火衝途瓦窰  
堡係產糧之區後路採買所資關繫非淺

臣  
卽

飛檄胡世英督率所部十營相機進剿復飭總  
兵程興烈赴援保安至甯條梁爲山陝門戶界  
連花定臣飛飭副都統敦奇祥阿參將徐祥林  
帶領馬步勇隊分投堵禦以遏賊氛惟臣後路  
只此十餘營左支右絀防不勝防應請

旨飭下陝西撫臣迅速撥兵赴援並查明甘泉縣文武

下落詳晰馳陳奏入

上命軍機大臣傳諭穆圖善庫克吉泰桂成喬松年曰  
陝西北山一帶年來尙屬安堵何以逆蹤麕聚遂至  
萬餘喬松年於所轄地方賊勢猖獗何以並無奏報  
該處地當衝要且爲甘省運解糧餉軍火衝途著穆  
圖善迅卽飭令總兵胡世英督帶所部十營進紮延  
安將甘泉縣城力圖克復庫克吉泰喬松年著卽速  
撥兵勇會合甘省所派之程興烈各營痛加勦洗迅

珍逆氛甯條梁爲山陝門戶穆圖善飭令副都統敦  
奇祥阿等嚴密設防著添派勁旅妥籌堵禦勿稍大  
意甯夏甫經安輯如賊蹤竄近又形喫重前請調金  
順進省之處著穆圖善再行妥酌以重邊防並著桂  
成將綏遠城與陝省毗連地方迅籌豫備以防彼勦  
此竄甘泉文武下落及此股竄撲之匪究係何股賊  
首何人均著喬松年查明具奏

六月初三日乙酉喬松年奏言陝省西面自北而

南處處與甘肅接壤長亘千有餘里甘回竄陝  
無地不可關入雷正綰一軍駐紮秦昌鎮原爲  
陝省屏蔽而兵少力單尙不能解慶陽之圍更  
何能遏賊之入陝自楊岳斌將黃友才四營調  
往甘省陝邊益見空虛甘省李助發等軍屢經  
敗挫賊更恣行無忌前後紛至沓來有數十股

之多分擾各屬臣當派劉厚基譚玉龍秦國輔  
劉效忠等帶兵分路堵剿四月閒劉厚基敗賊  
於鄜州獲其頭目馬阿渾譚玉龍會合雷正綰  
所派之軍敗賊於長武殲斃不少惟賊數太多  
見官兵堵剿甚力不能南竄退踞於宜君洛川  
之閒且分竄延安榆林等處延安所屬之保安  
縣據報失守此外安定安塞靖邊綏德一帶皆



有賊蹤宜君洛川之賊又分擾韓城等處陝省  
只此兵力若分赴延榆則鄜邠後路空虛回逆  
自西來者方接蹤屬至必斷我後路附省各屬  
更遭其害惟有嚴飭劉厚基一軍先勦宜君洛  
川之賊譚玉龍一軍力扼邠州賊竄之路秦國  
輔力守要隘劉效忠一軍往來游擊鄭春元一  
軍急援韓城邠陽以杜賊之偷渡黃河現飭延

綏鎮總兵陶茂森派隊相機追剿該鎮兵力太  
單正在躊躇適穆圖善派總兵胡世英統帶十  
營往援慶陽已至延安臣卽飭其先將該處附  
近賊蹤節節掃蕩延安添此一軍尙可得手頃  
據探報回逆又有大股從甘肅靈臺直竄鳳翔  
實屬無兵可派惟有仍調劉效忠一軍馳往截  
擊聞劉典已帶十五營自樊城拔隊月內可抵

陝境增此新軍或敷堵剿之用現在惟有酌度  
緩急竭力支持

喬松年又奏言甘肅回匪由靈臺分股竄陝者  
絡繹不絕並有後股萬餘人陸續而來皆因甘  
省亢旱無糧可攜勢將盡趨陝境又探聞秦昌  
一帶大股回逆分擾雷正綰等軍後路意欲阻  
截糧道鳳翔回匪已竄近咸陽游騎距省不遠

極爲剽疾其爲與捻逆勾結無疑臣與庫克吉  
泰一面整頓城防一面飛致劉松山郭寶昌兼  
顧後路勿爲賊乘

喬松年又奏言穆圖善軍餉原有陝省協撥之  
款茲據該將軍咨催趕解查陝省自用兵以來  
各省協餉久未報解督臣左宗棠前奏籌餉摺  
內亦謂陝豫兩省爲賊匪竄聚之處自顧不遑

應請停其協解係屬實在情形在陝省餉項艱  
窘尙待乞濟於鄰封何能顧及甘省且穆圖善  
營餉尙有四川湖北山東山西及兩淮河東運  
庫協撥均係有著之款惟有據實陳明籲懇

天恩准將陝西應協該營月餉暫行緩解至總兵程興  
烈一軍派防金湯地屬陝西其餉仍當設法接  
濟斷不敢稍存膜視奏入

上命軍機大臣傳諭左宗棠庫克吉泰喬松年曰甘回  
分路竄陝絡繹不絕秦昌一帶復有大股回逆分擾  
雷正綰等軍後路圖截糧道鳳翔之回竄近咸陽遊  
騎已近省城著庫克吉泰喬松年迅將省防布置嚴  
密不可少涉疏懈並著檄飭劉厚基等軍分路進剿  
迅殄逆氛毋令掄回勾結致辦理愈形棘手甘省異  
常瘠苦陝省應協穆圖善月餉仍著喬松年勉籌接

濟俟左宗棠到陝後再行酌量辦理左宗棠此時計  
可行抵潼關著卽趕緊前進將該省軍情餉糈統籌  
全局妥爲調度

初五日 丁亥 林壽圖奏言查西安糧臺非徒接濟

蘭州兼須保護涇慶向所賴輓輸不輟者以有  
東南各省協餉也迨前督 臣 楊岳斌改解漢中  
半年以來僅據鄂臺解到銀三十萬三千餘兩

撫臣飭提楊岳斌前借陝庫銀三萬兩臣撥運

秦安轉解蘭州銀九萬七千餘兩按月仍爲督

臣洋礮局製造處酌發經費其雷正綰張在山

等五十餘營月需餉銀十五萬餘兩悉以委臣

出款浩繁如此僅恃河東涓滴來源杯水車薪

已屬不敷周轉茲復欽奉

諭旨飭臣籌解甘餉臣於河東新到餉內撥銀二萬兩



委員管解帶同軍火等項繞道赴秦安糧臺交  
納深知爲數不敷然此外無可設法查得鄂臺  
咨報江甯協餉由漢口票號匯運銀一萬五千  
八百餘兩訂期六月兌支臣不得已向陝省票  
號商貼免費提前抵收卽將此項銀兩儘數運  
甘藉資接濟此後東南協餉復經奉

旨由湖北運至漢中分局轉解甘省旣不經臣勻撥糧

臺已同虛設似可裁撤惟慶涇等軍五十餘營  
餉無可指設有飢譁咎將誰執大局所關額懇  
聖明俯賜裁奪關隴幸甚奏入

上命軍機大臣傳諭左宗棠穆圖善喬松年林壽圖曰  
甘省軍餉前據穆圖善奏請將本年三月以前各省  
餉銀仍由湖北徑解漢中交陳丕業經收轉解林壽  
圖不得擅行截留當經降諭允行茲據該藩司奏稱

慶涇等軍月需餉銀爲數尙鉅糧餉不繼恐致譁潰  
等語此時左宗棠計可入關著於到省時與喬松年  
通盤籌畫於應解漢中餉銀酌提若干交西安糧臺  
仍責成林壽圖設法轉運該處糧臺毋庸裁撤穆圖  
善亦當於漢中糧臺收到之款先行酌撥慶涇分贍  
各軍不得專顧蘭省

初七日 己丑 何瑄奏言自去年六月閒克復哈密

後委員疊次赴肅請催大兵詎意五月之久不  
惟無兵且無一大員到哈鎮撫駐哈兵勇無多  
賊匪大至一時瓦解以致城池復陷回王遭害  
地方糜爛已極巴城隔絕糧道阻塞今春臣復  
整頓兵勇力圖恢復上託

國家洪福下賴士卒用命一鼓而復哈城然必須  
重兵屯紮方可爲進攻退守之資今巴城雖有

兵勇三千餘名擇要防堵無如兵力過單且糧  
餉缺乏諸多棘手萬一猝不及防哈城再失巴  
城齒寒不能不長慮卻顧惟有顛懇

天恩嚴飭成祿迅速帶兵出關料理西征文麟景廉剋  
期赴任鎮撫地方並辦理善後各事宜實於軍  
務有裨奏入

上命軍機大臣傳諭穆圖善成祿何瑄曰哈密雖經收

復地方糜爛不堪而巴城糧道又復阻塞非有大兵  
出關不足以資鎮撫成祿一軍屢經諭令西行何以  
疊報勝捷而收復無期未免意存觀望著卽迅復肅  
城以便剋期出關文麟景廉均有地方之責並著穆  
圖善嚴催起程毋得再事遷延致干咎戾哈密地方  
應辦各事何瑄隨時辦理以副委任

欽定平定陝甘新疆回匪方略卷一百五十八 丁卯年

六月十二日甲午文麟奏言 臣於三月二十四日

行至高臺整頓營伍催辦裹糧以期早日出關  
前赴哈密奈籌畫一切驟難應手以致輾轉需  
時昨據安西州王秉鏞稟報哈密城池業於二  
月二十五日經巴里坤兵勇收復並悉哈密回  
王伯錫爾業經殉難該處蹂躪不堪加以吐魯

番大股之賊來往靡常必須厚集兵力方足制  
勝臣所部威儀營僅一千二百餘員名實屬兵  
力太單不特出關以後不足以禦狂寇卽到哈  
密亦難分布現經陸續招募俾成一軍料理出  
關至行糧坐糧尤不可缺計自高臺至安西十  
餘站出關之後由安西至哈密又十餘站肅州  
一帶無處供支現在祇千餘人日需口糧已形



掣肘若再續增人數所需更鉅難保無停兵待  
食之虞合無仰懇

天恩迅飭陝甘總督嚴飭甘涼安肅所屬各地方官妥  
籌協濟供支車輛駝隻糧草俾利軍行再 臣現  
已飛咨麟興李雲麟先於新疆協餉內提撥銀  
四五萬兩以濟急需由 臣派員前往領運奏入

上命軍機大臣傳諭穆圖善成祿文麟曰哈密城池業

經收復亟須大員帶兵前往鎮撫文麟身任該城大  
臣責無旁貸疊次諭令出關爲日已久尙復逗留高  
臺實屬遷延觀望現在軍裝業已齊備著卽趕緊起  
程統帶所部馳赴哈密新任儻再藉詞延玩恐不能  
當此重咎也懍之所需車輛駝隻糧草等項卽著穆  
圖善嚴檄沿途地方各官妥速協濟毋誤供支並著  
文麟咨催麟興李雲麟於新疆協餉內提撥銀四五

萬兩交現派往之委員領歸該營以顧急需成祿圍  
攻肅州久未蕲事疲玩殊甚著迅拔堅城續行出關  
爲文麟後路聲援毋再遲延干咎

十三日 乙未 桂成奏言 臣 欽奉

諭旨嚴防邊界旋據伊克昭盟長貝子巴達爾琥呈報  
陝西靖邊一帶四月閒有賊匪竄擾該盟防兵  
均在花定一帶駐紮現在東南邊界又形喫重

復由各札薩克旗添調官兵三百名前往沿邊  
擇要防堵 臣仍檄飭貝子札拉格爾第督率在  
防官兵務與新撥官兵聲氣聯絡實力堵遏並  
據大同鎮總兵馬陞報稱刻下賊匪已竄綏米  
一帶及懷遠葭州境內並探得榆林府拏獲冒  
充官弁之奸匪二十餘人正法查此股賊匪既  
在綏米一帶滋擾邊防益形喫緊當卽檄行烏

蘭察布伊克昭兩盟長及滿蒙旗綠各營帶兵  
官一體出巡草地查閱河干實力防堵勿使逆  
匪偷渡並因奸細往往假冒官弁到處勾結復  
飛咨穆圖善金順嗣後如有採買馬匹等項務  
將派委何員前往何處採買若干先期咨照並  
轉飭各屬如有商販出口務令該地方官詳查  
明確再給執照以杜奸謀而固邊圉臣惟有妥

籌豫備嚴密布置不敢稍涉疏懈奏入

上命軍機大臣傳諭穆圖善庫克吉泰喬松年桂成趙長齡曰前據穆圖善奏稱陝西甘泉失守延長等處均有賊蹤當經諭令穆圖善庫克吉泰喬松年派兵進剿並諭令桂成嚴防邊界茲據桂成奏稱籌備沿邊及沿河情形此股賊匪現已擾及綏米及懷遠葭州境內定邊一帶亦有賊蹤難保不竄出榆林邊境

由草地東行桂成務當督飭防邊駐紮官兵嚴密遏  
截並飭歸化城所屬各廳文武豫籌防堵沿河一帶  
尤關緊要並著趙長齡添撥兵勇加意巡防不可稍  
涉大意穆圖善庫克吉泰喬松年尤當慎遵前諭迅  
速添派勁旅合力會剿務將此股賊匪就地殲除毋  
任竄出邊境致滋蔓延甯條梁一帶並著穆圖善添  
兵堵禦以固山陝門戶現在北山一帶防剿情形如

何卽著喬松年迅速馳奏以慰塵系甯夏軍營赴歸  
化城採買馬匹委員穆圖善當豫行備文知照桂成  
以免奸匪混跡綏遠城所屬各廳商販出口亦著趙  
長齡飭令該地方官詳細查明給發執照毋任奸宄  
勾結

十四日  
丙申 喬松年奏言欽奉

諭旨以甘泉縣城失守延郡喫緊



飭

臣

據實查奏並會同庫克吉泰派兵往剿伏查此次甘泉失守係甘省匪徒董幅祥勾結本地土匪將該城攻陷旋經該縣知縣陳澤農齊集兵團收復董幅祥仍竄回甘境臣訪聞土匪頭目以董幅祥爲最著回匪頭目以海大北李得倉崔三爲最著其由甘省竄擾陝省者鄜州甘泉係董幅祥一股保安安塞係蘇阿紅馬辣子等股

靖邊一帶係袁炳曾等股又有張具祥馬元帥  
各股回匪多馬姓故稱爲馬元帥馬阿渾尤多  
皆因甘省無所得食紛竄入陝爲鄜州劉厚基  
一軍所阻不能南窺省垣卽在北山一帶擄掠  
陝甘疆界毗連凡甘省近陝之處賊蹤徧地兵  
力無多惟有酌度情形擇要進剿此時防堵北  
路門戶者僅恃劉厚基一軍若調往延榆則土

回大股又將由鄜州全竄腹地該軍萬難移動  
是以臣於胡世英抵延郡後卽函囑該鎮迅速  
督勦現在延郡已鬆惟保安靖邊一帶喫重臣  
已催胡世英迅由安塞保安靖邊一帶前進與  
程興烈會合擊勦當可奮力掃蕩臣又飭陶茂  
森挑選兵丁分防綏德等處以杜回逆偷渡黃  
河至庫克吉泰所統各軍方在渭北與擒逆縱

橫馳逐事機正緊實屬無兵可撥所幸左宗棠  
於月內即可抵陝統籌督勦但使先清捻逆自  
可以全力勦辦回匪奏入得

旨著卽督飭胡世英等實力進勦並懷遵前旨嚴防綏  
德等處以杜回匪偷渡黃河毋稍鬆懈

喬松年又奏言前因回逆分擾韓城邵陽經臣  
飛調統帶鎮西營參將鄭春元帶兵赴援回逆

聞官兵將到卽行折回遇於白水鄭春元猝不  
及防奮勇猛擊力戰陣亡仰懇

天恩飭部從優議卹以慰忠魂奏入得

旨鄭春元著交部從優議卹

十五日丁酉穆圖善奏言臣到任月餘體察地方

軍務情形糜爛已極亟應設法整頓以支危局  
謹就管見所及約有數端一在籌糧餉以固軍

心一在簡軍實以節糜費一在審機宜以弭亂  
原一在修堡寨以資捍衛一在重牧令以蘇民  
困一在實營伍以固藩籬以上各條皆目前切  
要之圖 臣渥受

深恩畀以兼圻重任自當殫竭血誠逐事講求以期補  
救於萬一奏入得

旨覽奏各條均悉該署督務當加意拊循實力整頓以

期日有起色毋得徒託空言

十九日<sub>辛丑</sub>伊勒屯奏言 臣蒙

恩簡授領隊大臣欽奉

諭旨飭 臣盡心防守以固疆圉 臣自應殫竭愚忱力圖  
報稱惟查現在巴城兵勇大半戍守哈密該城  
兵力益單誠恐大股賊匪復行東竄巴哈二城  
首尾實難兼顧惟有籲懇

天恩嚴催成祿分兵數千迅赴哈密俾兩城聲勢聯絡  
不至有唇亡齒寒之慮奏入得

旨覽奏均悉成祿尙在肅州文麟現抵高臺已疊諭該  
員等迅速出關矣

二十日 壬寅 成祿奏言前因王仁和之軍駐紮老

鶴堡離城較遠未能得力 臣 商令移紮附城西  
南一帶期與我軍聲勢聯絡四月二十六日王



仁和親率馬隊相度地勢詎肅逆於要路設伏  
王仁和兵到陷入重圍身受重傷將弁亦有傷  
亡六月初七日賊復率大股由北門出猛撲王  
仁和等營壘我軍出隊邀擊鏖戰數時斃賊四  
五百名把總劉玉江陣斬賊酋賊始敗潰入城  
逆氛稍斂現擬俟王仁和傷愈迅卽移營進攻  
茲欽奉

諭旨以楊岳斌奏請將王仁和六營改調回省以固本

根臣維楊岳斌所奏係省城二三月閒軍情現

在楊岳斌交卸穆圖善任事自必另有布置肅

郡當攻剿喫緊之時添一營未見助威撤一營

便覺鬆勁查王仁和所部合以黎獻移交勇丁

六旗雖有十餘營其隨帶來肅不過五營卽令

回省亦不足以壯軍容且王仁和戰傷未愈亦

難統兵前進除咨商督 臣暫留王仁和一軍用  
助攻取外相應請

旨飭遵抑 臣更有陳者王仁和黃祖淦二軍皆由楊岳  
斌先後派出而兩人畛域太分名爲脣齒之依  
難效指臂之助自楊岳斌卸篆之後軍無統宗  
勢不相下合營將士恐有散渙之虞擬請

飭令該兩軍統歸 臣節制以一事權而利攻取一經歸

併不特肅城可以克復卽關外哈密各處亦可  
先抽數營以便兼顧庶軍務可望起色矣

成祿又奏言接准伊勒屯何瑄來咨商請撥兵  
防守哈密查文麟所部威儀營馬步共五百餘  
名軍裝粗皆完備正可剋期出關且近日安西  
敦煌玉門一帶並無賊蹤何以尙駐高臺遲遲  
不進臣已恭錄

諭旨轉行咨催至 臣遵

旨督催敦煌縣撥運巴里坤倉糧一萬五千石現在口  
外各州縣疲玩成習若俟轉行藩司飭催驛傳  
往返又須兩月不特緩不濟急且恐仍託空言  
臣已專弁馳赴敦煌查看該縣倉儲實存若干  
飭令迅卽照數撥運奏入

上命軍機大臣傳諭穆圖善成祿文麟曰成祿奏肅州

賊匪屢次出撲官軍營盤經把總劉玉江陣斬首逆  
賊氣大索該提督正可乘此機會督軍進攻迅圖克  
復堅城毋再遷延貽誤王仁和所部六營前經楊岳  
斌改調回省現在肅城攻勦喫緊著穆圖善卽飭令  
該軍仍紮肅州助勦所有黃祖淦王仁和兩軍均著  
歸成祿節制以一事權兩軍旣如所請歸併節制之  
後所稱哈密各處尙可分營兼顧自當實力籌撥不

准徒託空言文麟久駐高臺屢經降旨嚴催尙復逗  
留不進殊堪痛恨著懷遵疊諭剋日馳赴新任儻再  
藉詞觀望自問當得何罪敦煌縣倉穀著穆圖善成  
祿迅飭該地方官運赴巴里坤以資接濟

成祿又奏言 臣軍營餉需自正月至今已及半  
載僅收過甘省撥解銀四千兩其餘各處協餉  
迄未報解值此青黃不接之時窘迫情形殊難

言狀請

旨飭下四川湖北等省各督撫將應協 臣營餉銀迅爲  
籌解至前經奉

旨准撥甘涼安肅等處倉糧十萬石詎甘涼兩屬倉儲  
均爲楊岳斌提運進省屢次咨催僅准藩司指  
撥安西敦煌玉門倉糧三萬石迄今尙未解到  
惟有再懇



天恩令陝甘督 臣飭司嚴催其未派之七萬石務於本年秋收項下在甘涼兩屬就近各州縣分撥以救眉急奏入

上命軍機大臣傳諭左宗棠駱秉章穆圖善李鴻章曾國荃喬松年成祿曰成祿軍餉經戶部議定之後疊經諭令四川等省照數撥解現在成祿肅州軍務正在喫緊並整頓出關需餉尤亟四川欠解成祿軍餉

爲數甚鉅著駱秉章遵照疊次諭旨迅速籌款趕解  
肅州軍營以濟急需不可遲延湖北應解月餉著李  
鴻章曾國荃設法籌解其陝西應解之餉雖經喬松  
年奏請暫緩起解但肅州軍餉支絀仍著喬松年審  
度情形酌量接濟其李雲麟分撥之款俟成祿出關  
時再行咨明李雲麟均勻分撥至所稱撥解倉糧僅  
准甘省藩司指撥安敦玉三萬石半載有餘尙未解

到著穆圖善督飭藩司迅速催撥其未派之七萬石  
能否於本年秋收項下在甘涼兩屬就近各州縣分  
撥之處並著穆圖善斟酌辦理左宗棠計可入關務  
將各軍餉需詳確妥籌毋使匱乏

二十一日 癸卯 穆圖善奏言據肅州統領總兵黃

祖淦稟稱探聞哈密逆回東竄安西州及玉門  
赤金惠回各堡肅州踞匪時有馬隊馳往接應

當派兵前往嘉峪關駐守斷賊歸路三月二十四日突有賊騎數百由邊牆迤南入關經各營官帶隊截勦斃賊百餘名又據總兵王仁和稟稱四月十七日肅州回匪馬步三千餘人在城外西北角潛修營壘王仁和督軍分路攻擊平毀賊壘斃匪甚多該匪力不能支敗竄入城又於十九二十九五月初一等日逆回疊次出巢

均經王仁和等堵截追剿賊匪死傷甚衆惟米  
拉溝回匪出沒無常糧路時虞梗阻楊岳斌原  
派提督梅開泰統軍專剿此股並派護理甘肅  
提督鄧全忠在碾伯一帶籌辦甘軍糧餉梅開  
泰等親帶勇丁直搗逆巢至距米拉溝五里之  
松樹莊溝該逆糾率大隊直撲我軍梅開泰等  
派隊痛剿該逆竄回老巢五月初四日突有悍

賊八千餘衆分路圍撲營盤梅開泰統率馬步  
各營奮勇向前殲斃賊匪三百餘名大獲全勝

臣查肅州回逆久踞堅城抗我官軍實爲罪大  
惡極米拉溝一股約有數萬西路受害尤深此  
次雖未大受懲創而逆燄業已漸衰 臣當飭令  
各統領迅圖攻取分別勦撫不敢稍存成見貽

誤戎機

穆圖善又奏言據署平涼府知府李超羣等報稱四月初八日有馬賊數百名馳至華亭縣城下守城兵民猝不及防賊遂爬上城垣喊聲四起闔城鼎沸知縣張衍福署典史哈慶雲督率民勇與賊巷戰同時力竭陣亡賊匪於初九日全數東竄臣查華亭縣在省東八百餘里楊岳斌曾經咨商雷正綰就近兼顧不意雷正綰在

甯州等處爲賊牽掣而游賊突至城遂被陷 臣  
已檄飭提督張在山於涇州防所酌派兵勇馳  
往剿辦此次陣亡之知縣張衍福等應請

旨飭部從優議卹以慰忠魂奏入

上命軍機大臣傳諭穆圖善曰哈密回逆東竄並肅城  
踞匪均爲官軍擊敗疊據成祿奏報昨已諭令將黃  
祖淦王仁和兩軍歸成祿節制以一事權矣米拉溝



回匪素稱強悍動輒滋事此次官軍雖經獲勝尙未能擣穴擒渠穆圖善當俟其窮蹙悔罪時再行議撫不可豫設招降之見草率了事華亭縣城失守已據喬松年奏稱克復該縣爲赴陝孔道甘回屢由此路竄陝穆圖善當速籌添兵馳往扼守嚴密堵截不可以鄰爲壑華亭縣知縣張衍福署典史哈慶雲力戰捐軀均著交部從優議卹

二十二日辰甲辰喬松年奏言回匪由咸陽竄近省

城經各軍擊敗後與捻匪合股其鄜州劉厚基  
一軍自擊退甘泉賊匪後卽乘勝進攻府村賊  
巢大獲勝仗而甘泉秦昌一帶逆回仍盤踞未  
動頃接雷正綰來咨以慶陽賊匪益熾擬移軍  
往援而調涇州張在山之軍接防秦昌臣查慶  
陽固屬喫緊而秦昌地屬甯州係陝甘門戶尤

關緊要此時甯州爲悍回老巢必須有重兵彈  
壓方免疏虞雷正綰似未可遽行移動穆圖善  
原係奉

旨解慶陽之圍雷正綰張在山等軍亦均歸其節制自  
應由穆圖善權衡緩急辦理臣已飛咨穆圖善  
酌度情形妥爲調派並咨明左宗棠統籌兼辦  
總期力遏賊氛東竄以固邊陲奏入報

聞

七月初三日 甲寅 喬松年奏言前因桂成奏報籌

備沿邊情形欽奉

諭旨飭 臣 會同穆圖善等速派勁旅合剿並將北山情

形馳奏查前次賊竄北山 臣 業將籌辦各情據

實覆奏桂成所稱綏德米脂葭州懷遠之賊卽

係前次由安定安塞一帶分竄各股 臣 自派陶

茂森帶兵駐綏德一帶防勦力顧河防此時綏  
德情形已鬆劉厚基一軍復將府村賊壘攻克  
賊蹤游於安塞所屬之橋扶峪一帶近日派胡  
世英一軍先掃清橋扶峪之賊卽可由保安直  
赴定邊該總兵所部十營聲勢尙壯臣已飭令  
專辦安塞保安定邊一路與程興烈一軍合勦  
以顧陝境西北陶茂森所部延綏之兵專防綏

德一路以顧陝境東北其劉厚基一軍則仍紮  
鄜州專顧鄜州甘泉一路以扼賊蹤南竄至腹  
地賊匪若果東竄必須先窺黃河此時各軍掎  
角防堵該逆決難搶渡若由草地竄越從甘肅  
可直達歸化城然野無所掠該逆現亦乏食斷  
不能裹糧遠出是歸化城一帶目前亦可無虞  
至庫克吉泰所部馬隊現正追擊搶逆勢難分

撥 臣 仍俟面晤左宗棠妥籌商辦如左宗棠大  
軍能將捻逆合力兜圍卽可再騰一軍前往北  
路與北山各軍合擊奏入得

旨覽奏已悉歸化城一帶目前雖可無虞惟賊蹤肆竄  
靡定仍當督飭胡世英等及早殲勦以杜旁逸並與  
左宗棠隨時妥籌毋稍大意

山陰縣志卷之八

四



欽定平定陝甘新疆回匪方略卷一百五十九 丁卯年

七月初五日

丙辰

裕瑞桂成奏言陝省回逆現已

分股肆擾並有另股竄入甯條梁地方查甯條  
梁爲山陝門戶而鄂爾多斯七旗毗連陝甘邊  
界綿亙千里處處有旁抄捷徑兼之大河形勢  
自內地出邊正當下流口岸林立旣無一定之  
渡亦無必由之衝沿邊沿河雖有防兵四千餘

名擇要駐守仍屬不敷分布 臣等現飭伊克昭  
盟長貝子巴達爾琥將前報派定之蒙兵三百  
名催令先行赴防並飭該盟長再由各旗挑派  
蒙兵二百名一律配齊軍裝剋日起程前往榆  
林所屬之神木縣邊界擇要駐紮統交副盟長  
貝子札那格爾第調遣務與前駐邊界之蒙兵  
聯絡堵截統計該盟前後調派蒙兵駐防邊界

者居多而距沿河較遠聲勢恐難相通擬將防守邊界之烏蘭察布盟蒙兵五百名遷調渡河扼守南岸會同駐紮昭君墳渡口之伊克昭盟蒙兵一百五十名合力駐守以資援應而固河防查前調察哈爾蒙兵四百名係駐紮包頭後路地處偏僻擬調駐歸薩適中之地藉資鎮攝且可兼顧其沿河一帶駐紮旗綠官兵緩急尙

爲可恃其托清薩三廳所屬河干地方雖皆設有防兵當此回逆四出勾結盤詰巡防均關緊要而地廣兵單難期周密 臣等已咨山西撫 臣由內地派撥兵勇千名揀員統帶剋日來綏由 臣等相機分布協力防堵奏入

上命軍機大臣傳諭左宗棠庫克吉泰裕瑞喬松年趙長齡桂成曰陝省北邊回逆肆擾歸綏毗連邊隘在

在應防裕瑞等現添調伊克昭盟兵五百名前赴榆  
林屬之神木縣邊界駐紮與前駐邊界之蒙兵聯絡  
堵截移烏蘭察布蒙兵於黃河南岸駐守察哈爾兵  
調往歸薩適中處所以籌兼顧布置尙妥著飭管帶  
蒙兵之貝子札那格爾第隨時嚴密偵探妥籌策應  
毋稍疏虞至所稱咨調山西兵勇千名之處該省河  
防喫重掄氛尙逼能否酌撥尙不可知惟托清薩三

屬河干地廣兵單深虞竄入左宗棠庫克吉泰喬松  
年趙長齡等均當嚴固北路兼顧統籌使賊不得沿  
邊竄逸方爲妥善甯條梁爲山陝門戶現有另股滋  
擾著左宗棠喬松年等迅飭帶兵員弁就地殲除毋  
令竄入晉疆並將該處防務嚴密布置務臻妥協

初六日丁巳趙長齡奏言臣前因陝省回捻勢欲

東趨奏請將韓城縣屬之砂仁溝船隻移泊東

岸至今沿河一帶防範尙嚴惟河流綿亙甚長  
迤北地勢尤形遼闊歸綏等處均與甘蒙接壤  
近聞時有西域回民或假扮客商或口稱避難  
結隊過渡或由蒙古烏蘭察布地面經過或由  
河路至三公旗地界乘隙登岸有在包頭附近  
村莊寄住者有由包頭鎮繞越後山前赴歸化  
者私出重價購買騾馬軍裝並有冒充官弁攜

帶僞造文書護照情事 臣疊經飭屬嚴密稽查

以防奸宄查包頭鎮各渡現有大同鎮總兵馬  
陞帶兵防堵附近之南海子等處渡口亦有官  
兵駐守盤詰並將船隻提泊東岸惟迤西百餘  
里大小渡口並無防兵巡查聞該回民大半由  
西口過渡遇便上岸潛赴內地且包頭鎮係屬  
腹地要路西通甯夏人煙稠密年來回漢商民



沓來紛至該處隘口紛歧似此商回混雜在在  
堪虞相應請

旨飭下甯夏將軍綏遠城將軍歸化城副都統凡甘蒙  
毗連晉界及阿拉善西公旗蒙古地段之沿河  
一帶渡口多派旗綠兵丁逐段防守嚴禁渡河  
並不准船隻停泊該處所轄各營地一切兵民  
商販私自賣買馬匹軍裝應卽嚴行禁止其甯

夏與晉境往來貿易之地並請

飭令該將軍體察情形嚴定章程毋令奸回混入奏入  
上命軍機大臣傳諭穆圖善裕瑞桂成趙長齡曰山西  
歸綏等處均與甘肅蒙古接壤近有回民假扮客商  
或由蒙古烏蘭察布經過或由河路至三公旗登岸  
寄住包頭繞赴歸化購買馬匹軍裝偽造文書護照  
形迹種種可疑若任聽其往來奸宄必多溷跡滋生

事端包頭鎮南海子各渡口晉省雖有防兵駐紮盤  
詰並將船隻提泊東岸而迤西百餘里皆係蒙古西  
公旗地段大小渡口並無防兵回民多由此過渡潛  
赴內地包頭鎮西通甯夏商回亦時往來隘口紛歧  
行人混雜均屬可虞著穆圖善知照現署甯夏將軍  
並著裕瑞桂成一體防範凡甘蒙毗連晉界及阿拉  
善西公旗蒙古地段沿河一帶渡口多派兵丁逐段

防守認真巡查奸宄不准有船停泊該處所轄各營地如有兵民商販私自賣買馬匹軍裝均著嚴行禁止至甯夏與山西貿易往來地界亦應嚴防奸回混入並著穆圖善知照現署甯夏將軍體察情形嚴定章程知會趙長齡辦理庶思患豫防益臻周密趙長齡仍當飭令馬陞等將沿河地方隨時稽察毋稍大意

初八日己未穆圖善奏言臣前因陝西甘泉失守

延安郡城戒嚴飭總兵胡世英拔營進紮現據  
胡世英稟稱五月初閒探悉回首馬士元糾衆  
萬餘意圖撲犯延安胡世英卽帶兵前往攻其  
不備殺斃賊黨二百餘名奪獲羸馬器械無算  
該逆紛紛逃竄臣查胡世英甫經到防卽能大  
挫兇鋒實屬奮勇可嘉現仍飭令穩慎進取毋

稍疏懈五品花翎營官馬明起單身匹馬衝鋒  
陷陣掩殺甚多尤爲異常出力可否仰懇

天恩將馬明起從優獎勵之處出自

逾格鴻施再胡世英一軍現在進剿喫緊日需口糧若  
由遠路輓輸深恐緩不濟急並懇

飭下陝西撫臣札飭延安府知府在附近地方設法籌  
撥糧石源源接濟以固軍心而利攻剿奏入

上命軍機大臣傳諭左宗棠穆圖善喬松年曰陝西甘泉縣收復後該匪糾集大股逼近延安郡城經總兵胡世英督隊進剿斃匪多名惟賊勢正熾未經大受懲創仍著穆圖善督飭胡世英勉力進取以保郡城毋稍疏懈五品花翎馬明起衝鋒陷陣尙屬出力著以都司補用先換頂戴前據喬松年奏派胡世英辦安塞保安定邊一路與程興烈合剿專顧陝境西北

胡世英現紮延安雖與安塞一帶毘連深恐地廣兵單不敷勦辦著左宗棠喬松年斟酌情形妥籌兼顧陝省北邊逆氛徧地竄越堪虞該大臣等仍須慎遵前旨設法籌辦不得任賊竄逸晉疆胡世英一軍進勦正在喫緊口糧仍恐不繼著喬松年飭令延安府知府在於附近地方設法籌撥糧石源源接濟以備軍食



十九日庚午裕瑞桂成奏言欽奉

諭旨飭令臣等嚴禁渡口逐段防守伏查伊克昭盟七  
旗地居沿邊均與陝甘毗連而烏蘭察布盟所  
屬烏拉特西公旗游牧與阿拉善接壤以黃河  
磴口爲界磴口迤東爲烏拉特游牧迤西爲阿  
拉善王游牧沿邊一帶西自花定東至榆屬之  
神木綿亙千餘里現有伊克昭盟貝子札那格

爾第督帶蒙兵分路防守其水路要隘磴口爲  
西路總匯包頭爲東路門戶有烏拉特公黃蘇  
隆相布帶兵防守現因伊克昭盟防務喫重 臣  
等已將貝子阿育爾佈呢所帶烏蘭察布盟蒙  
兵五百名遷調渡河在昭君墳渡口駐紮並由  
伊克昭盟添調蒙兵前往神木邊界駐紮庶邊  
防河防聲勢聯絡益臻周密至包頭迤西河勢

延長千里未及設兵該處係蒙古游牧若調內地兵勇前往駐紮頗不相宜仍須由兩盟派兵方期得力臣等現已檄飭兩盟長轉飭各札薩克等諭以河路固應防守而游牧亦當保衛務按所屬地方各就現有兵力擇要防守並咨阿拉善王貢桑珠爾默特派兵嚴防磴口至蒙古地方向無商船惟鄂爾多斯七旗地居兩岸近

設官船二隻原爲往來辦公之用應令提泊北岸不准私渡民人亦不准他船停泊如有潛行過渡形迹可疑者立即拏究並繳飭歸綏道督飭各廳力行保甲認真稽查以杜奸匪溷跡奏  
入報

聞

二十二日

癸酉

穆圖善奏言據提督梅開泰稟稱

五月初六日米拉溝一帶有回匪萬餘人直撲我軍營壘當經派令撫標等營分路迎擊殲斃悍黨七百餘名生擒二十七名奪獲馬匹槍矛等件無算該逆連日糾集援賊愈聚愈衆梅開泰所部僅止十二營衆寡不敵遂於六月初二日與提督鄧全忠等督率將士分東中西三路進剿該逆仍敢列隊迎拒我軍一鼓直前乘勢

進攻當將大小逆壘二十餘座一律踏平計斃  
賊三千餘名並擒獲賊目多名訊明正法初三  
日梅開泰親率馬步隊伍行抵巴州溝又有悍  
賊前來抗拒我軍縱橫盪決餘匪漫山四散現  
在米拉巴州松樹莊等三溝逆賊房屋均經燒  
燬附近一帶已無賊蹤等語 臣查甘省米拉溝  
爲西路河運必經之地該處回族衆多百餘年

來頑梗不化外路匪徒靡不以該處爲逋逃藪  
此次梅開泰督率將士設法攻取聚而殲旃實  
足以快人心而褫賊膽提督梅開泰可否懇

恩特加賞賚在事文武各員相應開列奏懇

恩施以昭激勸奏入

上諭內閣曰官軍攻克甘肅米拉溝賊巢並勦淨附近  
賊蹤辦理尙屬得手所有在事文武各員自應量予

恩施以昭激勸提督梅開泰疊摧悍逆奮勇可嘉著  
交部從優議敘總兵饒得勝著交軍機處記名遇有  
提督缺出請旨簡放姜秀雲石紹文均著賞加提督  
銜副將周淮潮等四員均著賞加總兵銜白萬明著  
交軍機處記名遇有總兵缺出請旨簡放並賞給佩  
勇巴圖魯名號參將王光富車紹棠均著免補參將  
以副將儘先補用羅啟祥著免補參將以副將儘先



卽補副將趙秉鑑著交軍機處記名遇有總兵缺出  
請旨簡放從九品劉家相著免選從九品以縣丞不  
論雙單月遇缺前先選用並賞加鹽提舉銜提督鄧  
全忠著交部從優議敘

穆圖善又奏言副將范銘一軍圍攻洮州賊堡  
指日可期得手該軍每日應需糧食曾派西固  
州同隴西縣丞合力供支乃屢次嚴催延不籌

解勇丁枵腹荷戈軍事不免鬆勁關繫大局實  
非淺鮮相應請

旨將署西固州同朱鏡清署隴西縣丞龍有光一併暫  
行革職留任以觀後效奏入得

旨朱鏡清龍有光均著暫行革職留任儻再不知愧奮  
卽著嚴叅懲辦

二十五日  
丙子成祿奏言肅州回匪自五月閒首

逆陣斃後賊衆負嶠死守臣諭知城中糧缺不  
久坐斃連日督率將士分隊環攻本月初九日  
突有馬賊千餘騎偷越城南往金佛寺一帶大  
肆焚掠馱載糧草臣當派各營前往勦捕追至  
離城七十五里之新墩子灘地方正值賊衆牽  
馱挽運我軍四面圍逼擊斃護糧悍賊數百名  
奪獲糧石駝馬甚多餘衆仍奔回城內現飭各

營日夜嚴防俾免偷越惟城垣廣闊合圍難周  
而王仁和黃祖淦等軍又均不得力軍事棘手  
萬分成功莫必且巴里坤各城皆望兵如歲聞  
李雲麟一軍有名無實文麟所部之隊亦不足  
恃臣頓兵堅城萬難兼顧肅州一日不能克復  
則大兵一日不能出關老師糜餉惶悚徒深惟  
有籲懇

天恩飭令穆圖善酌撥勁旅數營迅速西來助剿俾肅  
城早下得以振旅出關大局幸甚奏入

上命軍機大臣傳諭穆圖善成祿曰肅城賊匪偷越城  
南金佛寺一帶擄掠糧草成祿所派各營於新墩子  
灘地方將護糧悍賊數百擊斃奪獲賊糧甚夥該逆  
食盡援絕機有可乘正當實力圍攻以圖迅拔著成  
祿親督各營剋期進逼不准再有稽延所請飭穆圖

善酌撥數營助勦之處著穆圖善酌量妥籌成祿亦  
不得藉詞延待該提督圍攻肅州爲日已久前請將  
王仁和黃祖淦兩軍統歸節制可將肅城圍困周而  
並稱關外及哈密各處均可兼顧此時又以合圍成  
功莫必兩軍皆難得力等詞曉曉推諉是何居心朝  
廷洞見肺肝豈能任該提督一意反覆貽誤軍事耶  
若再不振刷精神徒以頓兵堅城爲延緩出關之計

國法具在不能再爲該提督曲從末減也懷之

八月初四日甲申左宗棠庫克吉泰喬松年劉典

奏言七月初三至十四等日回匪分路竄擾一  
股由甘肅華亭縣竄至陝西隴州等處一股由  
甯州竄至三水縣之土橋等處一股由合水縣  
竄至甘泉縣之道左鋪等處均經提督譚玉龍  
劉厚基各軍隨時堵剿該逆未得逞其兇燄匪

首馬長順呂得彥擁衆萬餘以董志原黃龍山  
爲巢穴竄擾朝邑縣境搬運木植赴夏陽一帶  
樹柵作巢卽爲結筏渡河計臣宗棠立飭總兵  
楊和貴等率馬步各營由三河口渡渭剿之比  
抵朝邑賊已聞風鼠竄遁歸黃龍山老巢臣等  
伏思該逆此次四出竄擾均未得志難保其不  
糾衆復來現已飭令譚玉龍劉厚基各軍於宜



君甘泉一帶加意防範以遏賊蹤

左宗棠庫克吉泰喬松年劉典又奏言查延榆綏兩府一州地處荒遠爲回匪出沒之所署督

臣穆圖善前調記名提督胡世英統帶十營駐紮延安以備隨時調撥該提督於保安安塞告急府縣稟請救援時輒改藉詞推諉不發一兵聲稱應候穆圖善調遣而穆圖善前次奏稱賊

撰延安郡城官兵追勦獲勝 臣等細查並無其事不知胡世英如何朦稟致穆圖善據以上陳殊堪詫異相應請

旨飭下穆圖善嚴飭胡世英就近相機馳勦毋得藉詞  
誘延嗣後呈報軍情應並呈報 臣等俾得互相  
稽核庶免朦蔽貽誤奏入

上命軍機大臣傳諭左宗棠庫克吉泰穆圖善喬松年

曰陝省回逆乘隙肆擾實以撓亂官軍著檄飭譚玉  
龍劉厚基各軍於宜君甘泉等處加意防範毋得稍  
涉疏虞延榆綏各屬爲回匪出沒之所防務實關緊  
要前據穆圖善奏賊撲延安郡城經總兵胡世英督  
隊進剿斃匪甚多茲據左宗棠奏稱保安安塞告急  
時胡世英並未派兵往援等語是前次勝仗該總兵  
顯有捏報情事著穆圖善按照左宗棠所奏據實查

明奏叅毋許瞻徇以後該處軍情該署督等務須互相知照以杜弊端

初五日乙酉玉通奏言據貴德營遊擊武緯等稟

報二月十六日夜閒貴德廳城內回民聚眾起釁劫出監犯同知承順被戕並將闔署人口殺斃軍庫衙署焚掠一空現在盤踞城池居民紛紛逃散請兵勦辦等語臣查該回眾逆欲鷓張

若不迅加勦洗勢將勾串外匪滋蔓難圖第值  
此辦撫之時一旦興師動衆不惟撫局難成且  
恐各回蠢動臣惟有相機籌辦以靖地方

玉通又奏言近聞護理甘肅提督鄧全忠前來  
西甯與提督梅開泰合力攻勦米拉溝等處回  
匪以致此間回民頓生驚疑乘間竊發實屬有  
礙撫局刻下郡城岌岌可危臣惟有督率文武

嚴密防範一面設法解散使之就撫奏入

上命軍機大臣傳諭左宗棠穆圖善玉通曰本年三月二十五日據楊岳斌奏稱貴德廳回匪叛亂將同知承順及家屬戕害踞守廳城逼脅官民書寫官逼民變等詞捏稟玉通已飭鄧全忠等督勇率團設法進剿於四月二十七日奏到當卽諭令楊岳斌卽飭鄧全忠等迅將貴德廳城攻拔玉通亦當嚴密防守毋

再輕信奸回致爲所誤本日接閱玉通四月十一日  
奏報回衆變亂戕官劫庫等情與楊岳斌前次所奏  
尙屬相同是回匪之甘心爲逆萬難寬貸玉通一意  
主撫已誤於前此時尙不省悟又稱鄧全忠等來甯  
進剿有礙撫局實屬偏執已見就日前情形而論鄧  
全忠等旣經收復米拉三溝能否督率所部先抵西  
甯入城鎮撫再將貴德廳城相機攻取著穆圖善妥

籌辦理回逆聚衆擾亂固不可不備以兵威但兵勇  
進剿之時往往妄行殺戮乘機搶擄致良回無以自  
存朝廷辦理回務只分良莠並不使其玉石俱焚左  
宗棠穆圖善務當飭令帶兵各員隨時約束兵勇毋  
得濫及無辜良回旣安辦理自易爲力西甯地方緊  
要玉通仍當懷遵前旨悉心籌辦勿爲奸回所給貽  
誤戎事甘省回勢蔓延必須安撫良回毋使驚疑剿



除逆回以鋤稂莠舍此別無良策左宗棠如有所見  
卽商同穆圖善迅籌布置用靖邊陲所有殉難之署  
貴德廳同知承順及其家屬人等並著左宗棠等詳  
查分別奏請旌卹以慰忠魂



欽定平定陝甘新疆回匪方略卷一百六十 丁卯年

八月十七日 丁酉 伊勒屯何瑄奏言五六月閒奇

台古城一帶陸續拏獲奸細二十餘名訊據供稱烏魯木齊逆回與伊犁等處潰散兵勇打仗數次該逆疊次失利勢甚式微若此時大兵進剿不難勢如破竹等情 臣查此時賊勢衰弱文麟威儀營頭起馬步軍一千八百名已於六月

二十二日行抵玉門縣正可整旅前進請

旨飭催文麟剋日前赴哈密並請

飭成祿迅速出關乘此機會進剿則數年之寇必能指  
日掃除儻官兵遷延不進該逆復行得志其勢  
又難圖矣

伊勒屯何瑄又奏言上年十一月閒哈密復陷  
巴城危急當經臣等催調李雲麟迅率所部赴

巴里坤應援旋據覆稱蒙兵潰散北路無兵可  
催迨至本年正月閒探得哈密賊勢稍分臣等  
商議復整兵勇力圖恢復以通糧道因兵力單  
薄飛調孔才一營剋日赴坤助勦該勇未到之  
先巴里坤官軍已抵哈城擊退賊匪立將城池  
收復孔才之勇旋即到坤臣等派令該員帶領  
所部勇丁前往瞭墩駐紮防守迄今數月該員

頗知奮勉近因糧餉缺乏勇丁枵腹

臣

等咨請

李雲麟籌撥餉銀以資接濟嗣准李雲麟咨稱  
孔才之勇前在北路搶奪蒙古官廠牲畜罪惡  
重大決不能代籌糧餉等語查前在北路搶奪  
蒙古牲畜係李雲麟裁撤之勇與孔才現部之  
勇無涉刻下大兵尙無出關信息該營防守扼  
要困苦異常若不早爲接濟萬一詳潰於軍務

大有關礙合無仰懇

天恩飭令麟興李雲麟於新疆軍餉項下自本年三月

起每月撥給孔才餉銀五百兩以資軍食而衛

地方奏入

上命軍機大臣傳諭李雲麟麟興榮全錦丕勒多爾濟  
成祿文麟伊勒屯何瑄曰烏魯木齊逆回與伊犁等  
處潰散兵勇打仗該逆疊次失利如此時大兵前進

勤辦較易得手文麟威儀營頭起馬步軍一千八百  
名業已行抵玉門卽著文麟統率所部剋日赴哈相  
機進剿成祿一軍疊經嚴催迅速出關現在關外需  
兵甚亟著成祿懍遵疊次諭旨迅將肅城攻克統帶  
兵勇趕緊出關毋再遲延干咎孔才一營旣在巴城  
異常出力自難令其枵腹從事著李雲麟麟興榮全  
錦丕勒多爾濟於新疆軍餉內自本年三月起每月



撥給餉銀五百兩以拯飢軍

十八日 戊戌 李雲麟奏言據土爾扈特罕巴顏額

爾墜圖旗下蘇木張蓋羅會稟稱該罕曾於同

治三年五六月間三次派兵救援喀喇沙爾四

年七月派兵救援伊犁殺賊數千已至城邊因

賊衆兵單以致失利旗下丁壯傷損甚多五年

七月該罕親率兵丁救援伊犁其時伊城已失

被回逆層層圍困糧援俱絕遂至敗退今避處  
朱勒土斯山內四面皆賊懇請發兵救援等語  
查土爾扈特罕巴顏額爾墜圖上年親身救援  
伊犁臣訪問伊犁現存官兵僉稱實有其事維  
時該罕年僅十七歲竟能奮不顧身實屬忠勇  
可嘉爲蒙古罕王中僅見之人現居羣賊之中  
誓死固守尤爲可憫奈此時大兵未到無法救

援惟有設法聯絡以維外藩之心當卽面諭羅  
曾令其轉達該罕臣到烏城後就近與該將軍  
籌商俟續有餉銀解到卽將該罕按年應支俸  
銀酌量撥解若干以資接濟奏入得

旨巴顏額爾墜圖忠勇可嘉著李雲麟傳旨褒獎並卽  
會同麟興酌給該罕應支俸銀以示體卹

二十八日戊申裕瑞桂成奏言靖邊縣屬之甯條

梁鎮於八月初三日被賊攻陷並探聞南路另  
股賊匪圍攻米脂縣城勢甚猖獗臣等查該逆  
四出滋擾意圖乘虛紛竄歸綏毗連邊隘在在  
喫重自應嚴密布置扼要堵截以免闖入晉疆  
當卽飛飭管帶伊克昭盟蒙兵貝子札那格爾  
第親帶官兵一千名星速前往甯條梁邊界分  
投扼要駐紮相機堵禦並就近飛調土默特蒙

古官兵五百名及大同鎮屬官兵一千名備齊  
軍械派員管帶剋期來綏聽候 臣等相機分布  
並請

飭下山西巡撫趙長齡迅卽催令前調該省兵勇一千  
名並此次調撥大同官兵一千名星速出口其  
應需鹽菜口糧等銀均由該撫籌款撥解以資  
供給奏入

上命軍機大臣傳諭左宗棠庫克吉泰穆圖善裕瑞桂  
成喬松年趙長齡曰陝省回逆屢次肆擾甯條梁一  
帶八月初三日賊匪將甯條梁攻陷另股復圍攻米  
脂歸綏邊防甚形喫重雖經裕瑞等派撥伊克昭盟  
蒙兵分投扼紮並調土默特蒙兵五百及大同鎮屬  
官兵二千名前赴歸綏相機防堵惟地段遼闊兵力  
尙單前諭趙長齡派撥協防兵勇一千名卽著催令

星速出口裕瑞等此次調撥之大同鎮兵一千名著  
趙長齡一併飭催趕緊出口裕瑞等當就現有兵力  
嚴密堵剿毋令賊匪闖入所有山西協防官兵及續  
調大同鎮兵並土默特蒙兵應需鹽菜口糧等銀均  
著趙長齡籌款撥解以資供給此股賊匪在陝甘山  
西毗連境界滋擾關繫三省邊防及各蒙古地界若  
不及早撲滅勢將更肆蔓延著穆圖善派隊前往剿

辦將甯條梁剋期收復左宗棠庫克吉泰喬松年迅  
卽撥兵力解米脂城圍會合穆圖善派出之兵分路  
兜擊以靖邊圉

九月初二日

壬子

左宗棠庫克吉泰喬松年劉典

奏言陝省回逆勾結土匪竄擾安塞縣屬之橋  
扶峪新莊口等處並招納叛勇謀攻延安府城  
七月十二至二十五等日提督劉厚基於府村



道左鋪地方督率隊伍將該逆擊退復襲破王家坪下寺灣等處賊巢沿途斬獲甚多回土各匪復以大股來援經劉厚基設伏進剿追斬賊目一名生擒逆黨二百餘名立將橋扶峪老巢踏毀連破賊壘多處又馬家莊踞賊開竅向官兵轟擊經遊擊田玉廣等首先陷陣連砍紅巾賊數名劉聲集等分路抄襲奮勇兜擊賊勢不

支官軍一齊擁入當將馬家莊攻克檢獲悍逆  
及叛勇多名此次尤爲出力之提督劉聲集等  
及陣亡參將賀羣其等相應開列籲懇

### 天恩分別獎卹

左宗棠庫克吉泰喬松年劉典又奏言此次劉  
厚基進兵勦賊裹糧無多幸署甘泉縣知縣魯  
學浩越境饋運絡繹接濟乃得懸軍深入疊克

堅巢陝甘軍務糧餉難籌該員力濟軍糧深入  
賊巢實屬異常出力合無仰懇

天恩將署甘泉縣知縣湖北試用通判魯學浩破格獎  
勵以昭激勸又該縣汛弁把總康應選本係甘  
泉失守案內應行擬罪之員此次帶團深入中  
伏被害應請

飭部議卹奏入

上諭內閣曰官軍攻克安塞縣屬橋扶峪等處賊巢殲  
擒要逆勦辦甚屬得手所有在事出力之文武員弁  
自應量予恩施以昭激勸記名提督劉聲集著賞給  
該員父母一品封典副將黃超羣戴貴品朱楚文均  
著賞加總兵銜黃超羣並賞給捷勇巴圖魯名號戴  
貴品並賞給勝勇巴圖魯名號參將劉厚填著以副  
將仍留四川補用並賞給猛勇巴圖魯名號遊擊田

玉廣李作福均著以副將儘先補用王賢俊等三員  
均著以參將儘先補用內梁得勝鄴登科並賞換花  
翎都司張正喜等二員均著賞加遊擊銜並賞換花  
翎千總甘彰輝著以都司補用並賞換花翎把總梁  
德華等三名均著以守備儘先補用梁德華焦玉琴  
並賞戴藍翎許嘉陞並賞換花翎軍功梁肇榮等二  
名均著以千總儘先拔補並賞戴藍翎州同鄧鍾衡

著免選本班以知州留於陝西儘先補用俟補缺後以應升之缺升用縣丞馬樑臣著以知縣仍留陝西儘先補用並免交分發銀兩府經歷梁以恭著以知縣儘先選用並賞戴藍翎從九品袁文炳著以縣丞儘先選用並賞戴藍翎陣亡之參將賀羣其千總張文彥李興藻把總黃良弼外委王佐均著交部照例議卹以慰忠魂署陝西甘泉縣知縣湖北試用通判

魯學浩力濟軍糧並深入賊巢尙能不分畛域魯學  
浩著免補本班以同知仍留湖北遇缺卽補並賞戴  
藍翎此係破格獎勵他省不得援以爲例把總康應  
選本係甘泉縣失守案內應行擬罪之員此次帶團  
勦賊中伏被戕情殊可憫著交部照把總例議卹

左宗棠又奏言陝甘地勢遼闊賊類紛繁軍務  
甚爲棘手必須有得力統將方足以資調度查

有因病回籍之前甘肅提督曹克忠其才足以  
獨當一面懇

恩飭下直隸總督催令速赴陝甘仍統舊部庶  
臣得收  
指臂之助奏入

上命軍機大臣傳諭劉長佑曰曹克忠前在甘省勦賊  
素稱得力因病回天津本籍現在諒已就痊著劉長  
佑傳知該提督先行來京陛見後卽馳赴左宗棠軍



營統帶舊部隨同勦賊

左宗棠又奏言記名提督劉厚基因母病危篤請假回籍省親據情代陳奏入

上諭內閣曰日前陝西軍務喫緊劉厚基樸勇著名現值攻勦甘泉安塞等處賊巢甚屬得手未可遽令離營劉厚基著毋庸給假加恩賞給伊母人蔭四兩由左宗棠發交該提督祇領以示體恤

三才圖會卷之四十二  
三  
九月初七日丁巳穆圖善奏言據河狄城鄉八工

各堡及西甯府屬蘇家堡並皋蘭縣屬逃赴河  
狄各回目暨米拉溝馬營等處撒拉先後專人  
到省稟懇投誠河州城內及狄道州屬之沙泥  
站漢民亦繕具公稟求撫回衆情詞極爲懇切  
臣查甘省各路回民聚族而居糾黨變亂實有  
誅不勝誅之勢而河狄回匪爲尤衆若拒而不

納適以阻其向化之機且該處與省城切近欲  
辦撫局必先自河狄始因酌定條規刊刻告示  
責令剋日獻城呈繳馬匹軍械歸還擄掠漢民  
子女及田地房屋並縛獻首惡一面派委文武  
大員督同紳士前往查辦其西甯米拉溝等處  
招撫事宜現已飛咨西甯辦事大臣玉通等相  
機辦理茲據各該回目稟稱願遵條約反正歸

順臣仍諄飭該員紳等詳加體察如果該回目  
真心向化不致再有反側自當予以自新免其  
誅戮若河狄辦有成效則西甯等處不難迎刃  
而解一面密飭諸將加意防範以備不虞如該  
回衆立意不堅以乞降爲緩兵之計臣惟有調  
集各軍大張撻伐萬不敢稍事姑息貽害地方  
穆圖善又奏言上年冬閒有靜甯州回目李得

倉鹽關營回日何士秀赴提督王得勝軍營具稟投誠並呈戶口清冊由該提督轉稟前督臣楊岳斌覈辦惟時楊岳斌以該回日所部人數過多若非安插得宜難期帖服當飭甘涼道張瑞珍會同王得勝前往靜甯州相機收撫現據張瑞珍稟稱南八營李得倉等股降回共計十六萬有零臣查此起回衆多係秦州等處土著

當令其各歸原籍以免流而爲匪奈清水秦安  
等縣紳民紛紛具稟阻止雖經曉諭再三終懷  
疑懼惟有另行擇地妥爲安插茲查有蕭河城  
附近之地北連鹽茶南接靜甯其中彌望無邊  
荒僻無人卽令該回衆前往開墾以資餬口俟  
一二年後如果安分再行分起遣歸原籍查該  
回衆受撫以來半年有餘未聞蠢動則其乞降

出自真心尙屬可信但人數過衆防範不易  
臣仍飭該道妥爲安置設法籌糧毋使失所並勒  
令將軍械馬匹悉數呈繳復飭王得勝親統數  
營扼紮靜甯州以備緩急而資鎮撫

穆圖善又奏言據署定邊縣知縣李廷獻等稟  
稱六月十五日靖邊縣城池被賊攻陷並竄擾  
甯條梁等處勢甚披猖副都統敦奇祥阿等各

帶所部前往進剿行抵鎮靖堡北山我軍排列  
隊伍槍礮齊發該堡踞逆突由北門衝出意圖  
抗拒我軍奮力迎擊該逆畏避不前堡內賊匪  
亦卽驚惶無措副將李得勝親督官兵直抵堡  
下陣斬馬賊二十餘名該堡賊黨由南門奔逃  
復經官軍堵扼要路截殺悍逆五六十名當將  
堡城克復堡內藏匿餘匪揆殺淨盡生擒賊目



馬凌雲周萬有二名訊明就地正法奪獲軍械  
牲畜無數臣查此股賊匪往來游弋於延安府  
屬各縣察其詭計不僅蹂躪陝邊並將圖竄甘  
境現在各路隘口尤以甯條梁爲最要亦距安  
邊定邊爲最近此匪一日不滅甘省北路之隱  
患一日難消臣現復分飭敦奇祥阿胡世英等  
會同陝西官軍迅將靖邊縣城克復一面將此

股竄逃合力兜剿務期殄滅無遺庶餉道疏通  
陝甘邊境可期綏靖奏入

上命軍機大臣傳諭穆圖善曰甘肅河狄二州回衆最  
爲强悍近因米拉溝等處之捷該回衆震懾軍威具  
稟求撫而西甯洮州等處均有可乘之機穆圖善擬  
派員先赴河狄責以獻城繳械各條刻示曉諭再行  
分咨西甯辦事大臣等將米拉溝等處相機辦理惟



瑞珍前往妥辦諭知該回衆繳清軍械馬匹以消亂  
萌靜甯州一帶並著檄飭王得勝督率數營嚴爲控  
馭陝西甯條梁地方突經回匪竄踞實爲陝甘巨患  
該署督當懷遵前次諭旨嚴飭敦奇祥阿等會同陝  
省各軍迅圖收復毋任蔓延

穆圖善又奏言此次官軍進剿鎮靖堡賊匪立  
將堡城克復查有副將李得勝身先士卒斃賊

甚多洵屬異常出力惟該員前因管帶隊伍約束不嚴經臣奏叅暫行革職留營以觀後效茲派往東路會剿踴躍立功尙知愧奮合無仰懇天恩將李得勝開復原叅處分以示鼓勵奏入

上從之

穆圖善又奏言據代理慶陽府知府高光偉稟稱五月初十日突有大股賊匪直撲環縣城垣

勢甚兇猛城內存兵無多衆寡不敵當經該縣知縣翟棟樑飛移統兵駐紮板橋之知府雷聲遠帶隊援剿援兵未至以前該縣城垣已於十三日午刻被賊攻陷知縣翟棟樑率領家丁巷戰身受刀傷數處十八日雷聲遠督隊行至距城五十里之本鉢地方突遇馬步賊匪二千餘人我軍奮勇直前槍礮齊施立斃騎馬悍逆數

十名該匪紛紛敗潰我軍乘勝追剿復斃賊多名十九日黎明我軍直抵城下翟棟梁亦率領四鄉民團馳至與雷聲遠合隊環攻二十日巳刻雷聲遠翟棟梁各率兵團攀援齊上將城內踞匪痛加剿洗殺斃無算餘賊啟門而逸當將縣城收復臣查慶陽所屬州縣原由提督雷正綰張在山分兵布置先因合水地方喫緊將駐

防環縣營勇調往而賊匪遂乘虛直攻環縣實  
屬詭詐已極幸兵團同時趕到隨卽收復尙足  
以寒賊膽而振軍威惟城內文武官弁有無下  
落未據高光偉明晰聲敘知縣翟棟梁巷戰受  
傷出城召團隨軍收復有無捏飾亦難遽信容  
臣查實覈辦並咨行雷正綰張在山仍分撥兵  
勇妥爲防範奏入得



旨著卽詳細查實分別辦理

十一日辛酉棍噶札拉叅奏言臣於七月初三日

統帶蒙古官兵二千名由布魯滾河西進並挑帶旗綠索倫錫伯等營官兵五十員名分隊起行二十六日行至烏蘭布拉地方突有哈薩克馬隊千餘直撲我軍臣督隊迎擊槍礮兼施該逆隨卽敗散官兵乘勝追殺斃賊數十名生擒

四名時已薄暮未便窮追暫行收隊二十七日  
黎明整隊前進行至吐木爾綽爾胡地方遇賊  
接仗該逆拚死抗拒官兵分隊包抄賊衆敗潰  
斬馘三百餘名生擒十七名奪獲軍械馬匹無  
算隨將擒獲之賊訊明正法現在賊已遠颺  
仍當隨時防範遇賊便勦不敢疏懈

棍噶札拉叅又奏言據土爾扈特郡王貝勒貝

子差派驍騎校巴賴等來營面稱本年四月間  
伊犁錫伯綠營回子協同防剿殲斃回匪多名  
現在挑選能打仗者三四百人在精河防堵等  
語臣當卽檄飭綠營回子奮勇殺賊如能續立  
戰功自當據實陳奏籲懇

## 恩施

棍噶札拉叅又奏言臣於七月十八日統帶官

兵行抵和伯克賽里地方據土爾扈特親王策  
林拉布坦札薩克台吉拉特那巴咱爾各捐羊  
一千隻圖布新克西克捐羊三百隻解赴臣營  
以助軍食策林拉布坦備兵七百名拉特那巴  
咱爾備兵六百名均自行管帶圖布新克西克  
備兵二百名遣伊弟四等台吉車登巴拉管帶  
前來助剿臣於二十六七等日行至烏蘭布拉

吐木爾綽爾胡等處遇賊接仗獲勝敗竄之匪  
經策林拉布坦等帶兵截擊陣斬多名並奪獲  
駝馬牛羊甚多 臣查策林拉布坦拉特那巴咱  
爾前因兵潰奉

旨革去爵職嗣因接仗出力經理藩院奏准暫行開復  
今續著戰功可否仰懇

天恩量加獎勵圖布新克西克打仗勇往並請一併獎

勵再本年四月間由塔爾巴哈台等處逃出兵  
民一千餘名口臣恐驅逐生變現於厄魯特兵  
丁鹽菜銀內撥給養贍並揀派能打仗者五百  
名歸入營伍奏入

上命軍機大臣傳諭李雲麟麟興曰棍噶札拉叅奏帶  
兵西進勦逆獲勝並土爾扈特等勦賊請獎各摺片  
綠營回子等既能出力殺賊著卽傳知棍噶札拉叅

督率該回子奮勉圖報如能續行立功不妨隨時鼓勵惟該差官等所稱緣營回子出力勦賊其事是否真實其心迹是否相符亦不可不詳細審度總以不誤事機爲要策林拉布坦拉特那巴咱爾均著加恩卽行開復其圖布新克西克從前兵潰時如該員有應得之罪著李雲麟等查明奏請開復如無應得之罪仍著另行請獎





欽定平定陝甘新疆回匪方略卷一百六十一

丁卯年

十月初七日 丙戌 左宗棠喬松年奏言八月初二

初三等日有馬賊二千餘人步賊七八百人蜂

擁而來直撲甯條梁遊擊蕭明發督隊轟擊馬

賊從東南巷衝入焚殺慘槍副都統敦奇祥阿

不能抵禦蕭明發所部受傷甚多遣人求援於

敦奇祥阿該副都統並不往救幸副都統薩斌

欽定平定陝甘新疆回匪方略卷一百六十一

圖率領馬步各隊馳來接應蕭明發與之合隊  
衝擊賊始敗退初四日該逆復來撲營蕭明發  
率勇抵禦正接仗閒駐紮安邊之參領托雲布  
聞警馳來同薩斌圖各率馬隊併力截擊殲賊  
多名追殺十餘里始行收隊初七八等日復有  
另股賊匪竄擾米脂龐家山一帶並攻撲榆林  
縣城知縣張守基督團守禦賊知有備未敢進

通初九至十五等日該匪疊次來撲經遊擊楊樹棠等帶兵會剿逆衆敗逃竄至懷遠縣境適已革遊擊李元芳帶隊行抵魚阿堡與該縣知縣劉昌蕃督率鄉勇將賊匪擊退二十七日有賊千餘竄至石雲坪等處經團紳劉方軌等率領團勇前後夾擊斃賊數百奪獲牲畜器械無算臣查攻撲米脂榆林之賊均由甘肅而來蹤

迹飄忽幸皆無甚伎倆地方文武若能憑城固  
守將弁盡力勦截不難就地殲除甯條梁之變  
亦係土匪潰勇勾通回匪僅止劫掠並未盤踞  
旋即擊退該處地方現有官軍鎮壓當無他虞  
左宗棠喬松年又奏言記名提督劉厚基於八  
月二十四二十五等日在中湖觜等處大挫逆  
回擒斬甚衆訊據生擒回匪供稱此次由甘肅

甯州竄來回逆共有兩股其由中部縣境渡河竄擾之賊係馮正剛爲首已被官軍擊敗另股孫阿渾所帶現由楊家店等處竄犯宜君劉厚基訊明後卽拔隊進援宜君二十六日行至中途聞宜君縣城已於二十五日被賊闖入知縣張杰遇害該逆偵知官軍將至旋即退回甯州老巢劉厚基於二十七日馳抵縣城查詢失陷

之故實因大雨兼旬城垣坍塌多處勇首郭大  
順暗通回逆由缺口引賊入城搜掠財物旋即  
遁走劉厚基派撥營勇駐守縣城並捕治叛勇  
臣查此次宜君縣城失守知縣張杰死事慘烈  
仰懇

天恩飭部照例議卹著宜君營參將都司秀順嬰城固  
守身受刀矛重傷二十餘處比劉厚基馳至該

員尙在北門城樓實與尋常營員失守迥異應

請

旨革職暫留署任奏入

上命軍機大臣傳諭左宗棠喬松年曰甯條梁被賊攻  
撲闌入街巷敦奇祥阿不能抵禦蕭明發請援時又  
不能救經薩斌圖等奮力衝擊賊始敗退米脂榆林  
撲城之賊雖經陝省兵勇擊退惟北路餘匪尙未殄

盡左宗棠等當督飭地方文武實力殲除不可稍存  
大意宜君城垣於失守後經劉厚基馳往收復惟陷  
城之賊並未被勦先期遁歸甯州難保不去而復來  
著左宗棠喬松年分派兵勇於鄜延交界一帶嚴密  
扼截毋任回竄宜君縣知縣張杰臨難捐軀殊堪憫  
惻著交部議卹都司秀順被傷甚重著革職留營免  
其議罪



同日穆圖善奏言八月十五至十八等日河州東鄉回匪糾集悍黨由東崗山梁焦家灣阿干鎮等處分路攻撲省垣臣當卽飛調提督彭忠國彭楚漢等各領所部星夜前來以資夾擊臣親率副都統善山保等所部馬隊及督標等營官兵出城堵剿乃東崗山梁股匪膽敢迎戰勢甚兇猛提督周保和奮勇直前手刃騎馬悍賊

十餘名不意賊騎過多被其包裹力竭捐軀參  
將常泰護遊擊守備呂松堯千總徐茂春武舉  
蔣潤往來衝突格鬪多時亦先後受傷陣亡兵  
勇拚死力戰槍礮並施擊斃悍賊百餘名賊勢  
稍退而焦家灣阿干鎮等處之賊又復漫山徧  
野而來直撲南關節經安字右營營官雷震雲  
等督飭勇丁奮力迎擊逆屍枕藉總兵彭文林

因西南四墩地方緊逼西關爲該逆所占急欲奪此險隘遂率勇由頭二墩節節爬越猝中賊槍受傷甚重猶復裏創追殺急呼士卒先登詎該匪回身轉戰將彭文林亂矛攢刺登時陣亡遊擊戴得勝都司何正笏守備王義春千總羅桂枝均歿於陣我軍幾至挫敗幸河州鎮左營營官胡克勝等率勇合力堵擊斬殺甚衆匪始

敗回十九二十等日該匪復糾集死黨分股圍  
攻東南兩門營官胡克勝等督勇在南園教場  
一帶屢次接仗獲勝殲賊不下二千餘名生擒  
十餘名淹斃者不計其數賊勢窮蹙卽於二十  
日夜開潛由南山遁逃我軍尾追數十里沿途  
斬殺甚多省城之圍立解查此次該逆猝臨城  
下兇燄披猖幸賴文武各官協力同心危城得



不可不先事妥籌臣昨將駐紮甯安堡等營調

令進省而鹽茶固原花馬池以及甯靈一帶不

免空虛臣所部馬隊數本無多實屬不敷攻剿

查西安將軍庫克吉泰現已到任其部下馬隊

一千餘名素稱驍捷臣擬將該將軍馬隊派員

帶由陝西北山會同派赴延安之總兵胡世英

直達甯安堡以厚兵力合無仰懇

天恩飭下庫克吉泰喬松年卽將馬隊催令來甘交臣

調遣一俟甘省軍務稍鬆卽以此起馬隊移歸

成祿統帶出關抑臣更有請者固原提督雷正

綰前奉

命幫辦軍務卓著戰功嗣因事未順手經劉蓉楊岳斌  
等交章彈劾自此權分力薄遇事不無掣肘之

虞臣與雷正綰前在多隆阿軍營共事之時見

其智勇兼優爲士卒所敬服擬將雷正綰咨調  
來省面爲察看如果始終振作似不妨稍假事  
權俾得及時自奮

穆圖善又奏言據參將范銘稟稱洮州舊城並  
千家寨太平寨長喇嘛川等處回目震懾軍威  
具稟乞撫由該參將取具甘結開造戶口清冊  
齎呈覈辦前來 臣 檢閱各該回目原稟情詞懇



摯尙非詭言乞撫冊內丁口總計不過三千餘  
人婦女幼孩居其大半且器械馬匹均已呈繳  
並縛獻首惡丁扎扎一名似可信其真心投誠  
惟回弁丁永安係奉

旨拏辦之犯茲據范銘稟稱該弁尙無爲逆實迹且保  
全漢民甚多是否屬實臣仍當確切查明秉公  
覈辦並批飭范銘將城內漢回妥爲彈壓嚴防

外寇煽惑一面密拏逆首馬芳等訊明正法至  
范銘一軍自入洮州以來攻城奪堡擊退大衆  
悍逆先後擒斬甚多戰功卓著此次收撫各處  
降回辦理亦甚妥速合無仰懇

天恩將副將銜儘先參將范銘免補參將以副將儘先  
補用並

賞加總兵銜以示鼓勵

穆圖善又奏言甘肅蘭州道豫師上年在靜甯  
州籌辦軍糧頗資得力自委赴秦安辦理楚軍  
行營糧臺勤慎從公於收發一切毫無貽誤洵  
屬力顧大局自未便沒其微勞其前署平慶涇  
道任內所屬隆德平涼失守該道督勇派團隨  
軍攻克功過亦足相抵可否仰懇

天恩將該員應得處分免其查議並

賞加布政使銜又甘涼道張瑞珍前在鞏秦階道任內  
因所屬鞏昌府失陷經吏部議以降調 臣查該  
員才具練達辦事素稱認真此次參將范銘帶  
兵赴洮該員調兵集團隨同助戰代製軍械俾  
利進攻現在委辦安插李得倉等股降回收撫  
十餘萬之衆諸臻妥協覈其歷次勞績似未便  
因過掩功可否仰懇

天恩將該員開復降調處分仍以道員留於甘肅補用  
奏八

上命軍機大臣傳諭穆圖善曰河州東鄉回匪膽敢糾  
衆撲犯省垣經穆圖善督飭文武各員將賊擊退該  
匪勢尙熾張亟須厚集兵力早日翦除方免心腹之  
患現在穆圖善抽調各營分路進取著卽妥速調度  
迅殄逆氛陣亡之記名總兵彭文林記名提督周保

和均著交部照提督陣亡例從優議卹參將常泰護  
遊擊守備呂松堯千總徐茂春武舉蔣潤遊擊戴得  
勝都司何正笏守備王義春千總羅桂枝均著交部  
分別從優議卹其彭楚漢等各員著暫行存記俟續  
立功績再行奏請獎勵甘省匪熾兵單自係實在情  
形惟陝省勦辦擒逆正須馬隊與之角逐勢難分撥  
來甘東北重地不可空虛著嚴檄延安一帶防軍就

現有兵力認真防剿不可大意胡世英是否可恃並  
著查明妥籌調遣毋得稍涉遷就甯州賊匪竄陷陝  
省宜君等處經陝軍擊退回巢著穆圖善飭令甘軍  
盡力勦洗毋令再竄陝境雷正綰現調來省卽著留  
心察看如果堪備任使再行奏明請旨洮州回民投  
誠若非詭詞乞撫自不妨予以自新穆圖善當確切  
查辦不可隨其術中參將范銘著暫行存記俟辦有

成效再行請獎回弁丁永安曾否爲逆仍著穆圖善  
確切查明秉公覈辦道員豫師應得處分著免其查  
議毋庸再加布政使銜張瑞珍著開復降調處分仍  
以道員留於甘肅補用本日據左宗棠等奏賊擾甯  
條梁副都統敦奇祥阿不肯分兵禦賊經薩斌圖與  
蕭明發合隊始行擊退著穆圖善將該員等功過覈  
實確查分別奏明辦理



穆圖善又奏言此次賊匪撲犯省垣 臣 遴派已  
革河州鎮總兵李助發專管礮位自十六至二  
十日每遇賊匪撲城該革員卽開礮轟擊斃賊  
極多追賊匪宵遁李助發復隨同大軍追殺悍  
逆數名查該革員從前帶兵勦賊疊著戰功嗣  
在紅土窰地方接仗失利經楊岳斌叅奏奉

旨革職永不敘用此次守城擊賊著有勳勞且該革員

年力正強亟思勉贖前愆力圖報稱合無仰懇  
天恩俯准將李助發撤銷永不敘用字樣仍革職留營  
以觀後效奏入

上從之

穆圖善又奏言同治二年八月間平涼府城失  
陷教諭王汝揆投緘自盡業經前任陝甘總督  
楊岳斌具奏部 臣 照殉難例議卹 臣 查該教諭

死事情節實非尋常殉難可比當陝賊未至之時豫料賊所必由之路上書平慶涇道請扼險堵擊及賊已入境復面稟平涼府知府請盡拆附近民房被圍既久又請督勇夜出俱爲異議所阻旣而賊果由該故員所料之路竄入就城外民房掘空地道郡城之陷卒由於此平涼士民僉謂早從其言此城必不至破當賊匪圍城

之時該故員躬率生徒晝夜登陴城陷之日自  
縊於大成殿鐘架上闔家同時殉節 臣查教諭  
王汝揆矢志禦賊力竭捐軀臨難從容忠烈出  
於至性若僅照尋常殉難議卹似不足以示旌  
表已故平涼縣教諭王汝揆可否仰懇

天恩飭部改照陣亡例從優議卹之處出自

逾格鴻慈奏入

上從之

穆圖善又奏言已革總兵陳義前因勇丁潰散  
該員未能彈壓經前督臣楊岳斌奏叅革職被  
叅之後深自愧奮隨同勦辦華亭等處竄賊並  
解鎮原城圍收復平涼府縣城池攻毀洪河一  
帶賊巢摧堅陷銳每戰必先嗣因進攻焦村等  
處賊卡身受重傷且於糧餉奇絀之時設法撫

慰飢卒奮勉圖功實屬異常出力合無仰懇

天恩將已革提督銜記名總兵晉勇巴圖魯陳義開復

原官原銜勇號以昭激勸奏入得

旨陳義著開復總兵原官其提督銜勇號俟再有勞績

時請旨

二十日己亥伊勒屯奏言哈密現無大員鎮撫一

切事宜無所統屬而文麟仍無抵哈確信合再

請

旨嚴催文麟迅卽赴任以專責成奏入

上命軍機大臣傳諭穆圖善成祿文麟景廉曰文麟自  
簡放以來催令赴任不啻至再至三乃竟百端藉口  
堅不肯前不知是何居心著卽尅期進發不准片刻  
逗留儻敢仍前玩忽必治以應得之罪並著成祿查  
明文麟行抵何處飛速咨催若再遷延卽著奏聞懲

辦成祿圍攻肅州愈久愈疲似此泄沓從事何日是  
出關之期著趕緊整頓士馬迅將肅城攻拔振旅出  
關與文麟聯絡以壯聲勢景廉是否啟行前經諭令  
穆圖善飭赴新任著景廉迅卽赴哈密接印任事以  
重職守毋得遲延干咎穆圖善亦不准藉端奏留再  
行瀆請

伊勒屯又奏言巴城滿營官員數年以來並未



支領俸銀各官員等鞍馬衣履之費均屬不敷  
臣不得已從軍餉內提出銀一千三百餘兩藉  
資散放內除 臣暫借一年俸銀一百五十五兩  
外其餘同城各官按照每年應領俸銀發給一  
半下餘銀兩皆接濟兵丁及歸還商鋪借款現  
在並無庫存銀兩節交冬令兵丁飢寒交迫前  
奉

諭旨飭撥巴城月餉仍未解到 臣 一面備文咨催綏遠

城將軍一面派員赴烏里雅蘇台請領若此時  
巴城月餉銀兩尙未解到烏城懇

恩飭下麟興李雲麟無論何款先籌一二萬兩撥給巴  
城藉資接濟奏入

上命軍機大臣傳諭麟興李雲麟曰巴里坤餉需久缺  
現在節屆冬季兵丁飢寒交迫待餉尤殷著麟興李

雲麟將應撥該城月餉源源趕解如此時尙未撥到  
卽著麟興等無論何款先行撥給銀一二萬兩以濟  
急需

二十三日 壬寅 成祿奏言王仁和一軍進紮北岸

頭地方黃祖淦所部各營向東移紮聲勢卽可  
聯絡合圍亦漸周而七月二十一日 臣 令黃祖  
淦挑選一營扼紮水磨溝距北門僅一里爲逆

衆東北出入咽喉該逆見我軍紮營悉衆出巢  
鏖戰我軍營壘旣成該逆計無可施紛紛敗退  
入城該逆見東北兩面我軍布置周而己無出  
路勢將坐困屢次出城峰擁來撲幸我軍日夜  
防維尙無失挫王仁和黃祖淦兩軍自歸併移  
亦各協力同心計自六月望後至八月初旬大  
小不下二十餘戰共斃賊二千餘名我軍先後

陣亡弁勇二十餘人受槍礮傷者二百餘名惟是臣軍自正月迄今僅收到四川餉銀一萬四千兩各營兵勇月餉無款給發仰懇

天恩飭催四川督臣將前撥之十萬兩趕爲撥解以濟飢軍陣亡之擬保參將都司匡茂通等應請飭部從優議卹用慰忠魂奏入

上命軍機大臣傳諭穆圖善成祿曰新疆到處糜爛急

盼大枝勁旅早日出關爲各路聲援疊次催令成祿  
攻拔肅州剋日出關乃該提督忽稱合圍忽稱兵單  
糧絀百端藉口希圖宕延此次又稱合圍周而王仁  
和黃祖淦等軍同心殺賊果如所奏肅州可有克復  
之機著卽嚴督各將士銳意進取迅速攻拔整頓出  
關儻再事遷延定將成祿等重治其罪前諭四川先  
籌銀十萬兩限兩月解到成祿軍營現在解到之銀

爲數甚屬寥寥著該部嚴催駱秉章趕爲撥解以濟  
飢軍先後陣亡之擬保參將都司匡茂通擬保千總  
五品軍功梁鼎吉把總趙雲青陳魁均著交部從優

議卹

成祿又奏言 臣於八月閒挑選二營派已革哈  
密協副將凌祥帶領出關徑赴哈密會同駐防  
哈密之千總芮林等先將漢回兩城防守事宜

趕爲布置以防西路回逆竄犯文麟統帶馬步  
六營於八月初間由金塔繞道花海子出關已  
抵玉門料理裹帶車駝等項不日即可西進至  
敦煌縣應撥巴城糧石現據該縣稟報業經撥  
過六千石交巴城守催委員陸續起運其未撥  
之九千石現值秋禾登場應由 臣 嚴催該縣趕  
緊撥運



成祿又奏言據參領雙興來營稟稱奉調隨帶  
弁兵十九員名運解炸子火箭等件行抵甘省  
安定縣洪銅窩地方因回匪肆擾不能前進適  
督臣楊岳斌行抵安定該參領謁稟情形當奉  
楊岳斌面諭將火箭炸子分交安定隴西兩縣  
寄存飭令該參領帶領弁兵就近赴秦州設局  
製造火藥該參領當派札普善布雙保在彼看

守及隴西安定兩縣先後失守火箭炸子遺失  
無存札普善布雙保二人至今尙無下落稟請  
嚴叅治罪等情竊思此項軍火係奉

旨撥解之件該參領擅聽楊岳斌之言徑赴秦州造藥  
以致全行遺失實屬罪無可追應請

旨飭部嚴加議處以昭炯戒奏入均報

欽定平定陝甘新疆回匪方略卷一百六十二 丁卯年

十月二十四日

癸卯

穆圖善奏言准左宗棠咨稱

陝西徧地賊蹤餉需無措藩司林之望於甘省  
軍情賊勢兵勇數目及征兵駐紮處所地方實  
在情形並無一字稟報徒欲與陝西爭餉現在  
入關伊始陝事孔棘前催甘餉甫經陳丕業轉  
解二十餘萬甘省得此鉅款當可敷衍且俟陝

省軍務稍有頭緒再爲籌畫等語查陳丕業轉解之二十餘萬兩早已支銷罄盡今左宗棠必待陝西軍務稍有頭緒再爲籌畫是以後之撥解遙遙無期甘軍竟成缺望現歸甘省發餉者實有一百四十餘營統計每月共需餉銀四十餘萬兩加以督標舊存新募之兵月需糧餉及製辦各項軍火所費尤屬不貲 臣所部餉銀本

有專款然數月之久各處報解寥寥蘭州糧臺  
每日供支原恃西路徵糧及漢中磴口等處採  
買之糧以資敷衍乃西路及漢中軍米除撥濟  
省外各軍省城分潤無幾而磴口採買之糧又  
因費絀路遙車馱缺乏必至二十餘日或月餘  
始到一次不得已卽在省城採買濟急每倉石  
需銀二十七八兩不等省臺自臣到任之日起

截至九月十五日止僅收到湖北四川等省銀  
十一萬餘兩秦臺尙未據稟報其數大約相埒  
卽全數散給勇丁尙不及一月之數甘省回族  
之繁巢穴之多非他省之匪可以合力兜剿者  
比往往顧東則西警擊此則彼援現如彭楚漢  
分駐平番等處之六營所以堵剿河狄及西甯  
之賊出擾西路糧運也分駐金縣等處之七營

亦所以杜八省緊要隘口也鄧全忠梅開泰之  
十營甫經盪平米拉溝巨巢應防其回竄兼杜  
西甯股匪竊發陶世貴之十二營則因甘涼南  
山時有寇警一經滋蔓西道爲之不通且圍勦  
肅州諸軍亦有後路之虞故設防不得不密王  
仁和黃祖淦二十七營會同成祿圍攻肅州未  
下兵力尙單至彭忠國之紮安定傅先宗之紮

鞏昌甯遠陳德隆之禁通渭皆通狄河要徑其  
餘駐軍地方皆因賊蹤出沒無常不能不以堵  
爲勦以期逐漸進逼但因糧餉未裕不敢遽行  
深入至甘省額賦銀糧自回逆倡亂徵收萬難  
足數地丁則盡歸各屬支應軍需絲毫不能解  
司糧則除發本省各營弁兵外分潤客軍不及  
十分之一歲入釐金以路途時通時梗商賈未



能暢行報收寥寥所入如此所出如彼其短絀  
何啻萬萬左宗棠駐師關內距甘尙遠於甘省  
軍務細情似尙知之未深若將甘省向有指望  
之餉日久停解是絕甘軍之生路必至將士解  
體回氛益熾且恐各軍因飢致潰益難收拾左  
宗棠異時來甘亦無從著手且陝甘唇齒相依  
甘事決裂而欲陝省遠臻綏靖其勢不能合無

仰懇

天恩飭下左宗棠將甘省現駐營勇數目及一切軍用  
通盤籌畫迅速撥解餉銀來甘俾固軍心而維  
全局並請

飭催該大臣趕緊赴任以一事權奏入

上命軍機大臣傳諭左宗棠穆圖善曰甘肅現駐各軍  
應歸該省發餉者共有一百四十餘營之多所需糧

石旣難就地採辦應需餉銀本省亦無從籌款省臺  
及秦臺所收川湖等省解到之款杯水車薪計尙不  
敷一月支放之數現據該署督臚陳兵勇並應需糧  
餉數目及缺餉危迫情形所奏自非虛飾甘省餉缺  
已久飢軍譁潰堪虞若再不速籌接濟其勢將不可  
收拾著左宗棠按照穆圖善摺內所陳各情量籌接  
濟並著迅速撥銀前往以維大局左宗棠身任甘督

自應及早赴任未便久任陝省著將陝省擒匪速行  
殄滅俟軍務辦有頭緒卽行馳赴甘境

穆圖善又奏雪前陝甘總督楊岳斌浙江提督

鮑超在南省統率諸軍臣前隨多隆阿時久服

其謀勇兼備卓著聲威迨楊岳斌督任陝甘因  
人地不甚相宜兼之糧餉支絀焦急萬分因病  
解任頃聞浙江提督鮑超亦引疾求退奉

旨准其開缺回籍調理該二臣正當年富力強若聽其  
久臥林泉深爲可惜合無仰懇

天恩飭下湖南四川督撫隨時察看楊岳斌鮑超如病  
勢就痊卽奏請

特旨錄用假以事權實於天下全局大有裨益奏入

上命軍機大臣傳諭駱秉章劉崑曰前任陝甘總督楊  
岳斌前任浙江提督鮑超從前辦理軍務素著功績

均因患病開缺調理國家需才孔亟如該二臣者若  
令投閒置散殊爲可惜著駱秉章劉岷察看楊岳斌  
鮑超會否調治就痊如果病體已愈卽著迅速奏聞

二十五日

甲辰

文麟奏言六月初九日由高臺先

派副將蕭青雲管帶三營前赴玉門臣於八月

初二日自高臺起行聞肅逆分竄玉門金塔一  
帶意在截臣進兵之路幸先事豫防該逆未敢

直撲十五日行抵玉門器械鍋帳亟須製辦而  
烏里雅蘇台軍餉數月之久尙未解到相應請  
旨迅飭麟興李雲麟將前項指撥軍餉趕緊如數交迎  
提委員妥解來營以濟要需至軍裝皮襖後路  
糧運及目前餉糈等項最關緊要哈密疊遭蹂  
躪無處徵收採辦惟有指望安西敦煌玉門三  
處就地籌畫協濟查關內節節阻滯遇事咨商

陝甘督臣必至貽誤且恐官民藉詞推諉可否  
將安敦玉三處暫歸臣節制以期呼應較靈俟  
軍務稍鬆卽行改歸舊制再查臣由高臺拜發  
摺件係由蒙古臺站馳遞至今未奉

批回請

旨飭下兵部烏里雅蘇台將軍嗣後臣摺報公文卽由  
北路蒙古臺站巴里坤一帶往來接遞或不致



有遲誤

文麟又奏言八月二十七日突有大股肅逆竄擾玉門所屬之紅柳灣一帶勢甚猖獗臣當卽親率衛隊登城嚴防派營官張忻等管帶馬步隊前往迎擊行至距城十餘里陡遇馬賊數百騎我軍奮力衝殺斃賊數十名張忻手刃數賊並生擒李小娃子等二名正法該逆竄至城北

十餘里之川北鎮一帶張忻添帶馬步各隊直  
至川北鎮該逆聞風逃竄我軍跟蹤追擊斬獲  
甚多二十八日該逆竄至城東北焚掠臣卽派  
魏忠義張忻帶隊往勦槍礮齊施轟斃馬賊極  
多生擒王開良等四名正法二十九日該逆糾  
集大股直撲城下當派李東陽等列隊堵勦該  
逆擁撲前來經李東陽等奮勇迎敵斃賊無數

魏忠義用大車礮轟斃馬賊數十名李東陽身  
先士卒手刃數賊身帶十餘傷力竭陣亡該逆  
分襲我軍之後突撲東關臣督飭城上槍礮連  
轟斃賊無算逆首墜馬該逆紛紛敗退連夜由  
紅柳灣東竄共計陣亡官兵三十餘員名帶傷  
者四十餘員名參將白世泰調隊無方臨陣不  
力請

旨暫行革職以觀後效所有此次戰守出力文武員弁  
兵勇未便混其微勞仰懇

天恩逾格獎勵以昭激勸五品軍功營官李東陽等久  
著戰功此次陣歿情形最爲慘烈懇

恩交部分別從優議卹

文麟又奏言副將蕭青雲前於五月閒稟請投  
效當飭該副將管帶三營出關及臣抵玉門訪

查該副將擾民侵餉險詐妄爲未便稍事遷就  
請

旨將該副將卽行革職戴罪自効如果怙惡不悛請卽  
在軍前正法以明紀律至 臣營辦事文武人員  
一經指調半屬推諉不前若不嚴定章程必至  
紛紛效尤應請

旨飭部嗣後如有指調出關人員藉詞規避者明定處

分以杜取巧奏入

上命軍機大臣傳諭穆圖善李雲麟麟興榮全錦丕勒  
多爾濟成祿文麟伊勒屯曰文麟於八月初二日督  
率後起馬步自高臺起行十五日已抵玉門著卽激  
勵將弁相機前進惟軍餉萬分缺乏器械鍋帳均須  
添製待用尤迫而烏里雅蘇台所撥之餉迄今數月  
尙未解到著麟興榮全錦丕勒多爾濟李雲麟將從

前指撥餉銀趕緊如數籌措交迎提委員迅解文麟  
軍營以濟眉急文麟應辦軍裝皮襖後路糧運及日  
前餉糈等項既難在哈密就地設措而遇事咨商陝  
甘總督又恐緩不濟急文麟擬請將安西敦煌玉門  
三處暫歸該大臣節制以期呼應較靈自不得不從  
權辦理卽著照所請行穆圖善務當飭令該州縣於  
文麟應辦一切事宜認真經理毋得遲延推諉致誤

戎機一俟軍務稍鬆仍復舊章以示限制文麟由蒙古臺站馳遞摺報等件屢有遲誤著卽照所請由北路蒙古臺站巴里坤一帶往來接遞麟興榮全錦丕勒多爾濟伊勒屯務飭各臺站遵照辦理以期迅速肅州逆匪分竄玉門等處意在阻截文麟進兵之路著成祿慎遵疊次諭旨迅克肅城疏通道路俾利師行副將蕭青雲擾民侵餉險詐妄爲著卽行革職仍



責令戴罪自効如再怙惡不悛卽在軍前正法以肅  
軍律近日文武各員皆以新疆爲畏途一經指調率  
皆推諉不前嗣後遇有指調出關人員儻有藉詞規  
避應如何議定處分以杜取巧之處著吏部兵部妥  
議章程具奏景廉現在行抵何處著穆圖善等催令  
趲程前進迅赴新任

上諭內閣曰甘肅肅州逆匪竄擾玉門縣境經文麟派

令營官張忻等在紅柳灣地方疊次將賊擊敗該逆  
復糾集大股直撲城關官軍槍礮齊施斃賊無算立  
解城圍勦辦尙爲出力營官魏忠義著以守備補用  
並賞加都司銜賞戴花翎張忻著以千總補用並賞  
加守備銜賞戴藍翎都司張翰池著賞加遊擊銜通  
判恆齡著以直隸州知州不論雙單月卽選並賞戴  
花翎從九品張勳著免選本班以縣丞不論雙單月

遇缺儘先卽選並賞戴五品藍翎防禦葉普懇著以  
佐領卽補並賞加協領銜守備馮吉鼇著以都司補  
用韓進祿著賞戴藍翎千總張大倫著以守備補用  
代理玉門縣知縣湯銘著賞戴六品藍翎玉門縣典  
史陸爲樗著賞戴藍翎領催奎喜等二名均著以驍  
騎校卽補並賞給五品頂戴軍功徐常鎬等二名均  
著以從九品不論雙單月遇缺卽選並賞戴藍翎前

鋒校富勒銘額著免補驍騎校以防禦升用委筆帖式富森布著以部缺筆帖式卽補並賞給五品頂戴吉恆著以驍騎校卽補並賞加防禦銜筆帖式毓椿著賞給五品頂戴驍騎校富尼善著以防禦卽補巡檢趙國楨著賞戴藍翎直隸州知州彭煦著賞加運同銜軍功高林等二名均著以千總補用並賞給五品頂戴陳永壽等二名均著以千總補用並賞戴藍

翎書識潘炳榮等二名均著以未入流不論雙單月  
卽選軍功樊庫等十七名均著以把總補用生員李  
懷珍著以訓導選用勇丁趙德鈺等七名均著以外  
委拔補恆泰著遇本旗驍騎校缺出卽行補用以示  
獎勵其臨陣不力之參將白世泰著暫行革職儻再  
不知愧奮卽著據實叅奏陣亡之五品軍功李東陽  
六品軍功王世福仲登祿圖攬奇本李功義等均著

交部分別從優議卹

三十日酉己左宗棠庫克吉泰喬松年劉典奏言

准陝西提督雷正綰咨稱回逆於八月二十二日突至甘肅甯州西南關外攻撲甚急營卽帶勇一千人星馳赴援行抵清華堡派都司李廣珠率二百人越澗潛伏伺閒入城爲內外夾擊之計親率隊伍由南原下南川誘回逆至清華

堡時已初更城中礮聲震地該逆飛奔回顧我軍乘勢躡追直抵城邊李廣珠自城中殺出該逆腹背受敵紛紛狂竄我軍乘勢追擊先後斃賊二百餘名遂解甯州之圍其駐紮甘肅涇州之記名提督張在山一軍因逆回馮均幅禹得彥等窺伺涇州南北兩原屢派遊擊馮秀章等於羅漢洞毛家堡等處率隊勦擊疊有斬擒二

十九日張在山力疾督隊會合雷正綰派赴涇州助剿之遊擊趙金彪馬隊馳赴涇河川十月  
初一日抵荔家堡一鼓直前陣斬回逆數十名  
餘賊向蒲河川奔逸初三日張在山勒兵進剿  
直薄賊壘毀其巢穴餘逆向蕭金鎮竄逸初六  
日甯州龍灣里回逆竄入正甯縣城經該縣知  
縣黃紹薪隨同雷正綰所派援兵於初九日收



復先是 臣 宗棠因正甯失守檄駐紮陝西邠州  
之已革提督譚玉龍一軍兼顧三水十一日譚  
玉龍率所部馳赴職田鎮先選精銳百餘名由  
間道入城協守卽分三路進剿回匪逞兇搏戰  
譚玉龍令軍士佯退俟其逼近用礮排擊斃賊  
無數逆騎返奔自相蹴踏我軍乘勝掩殺又斃  
賊數百名奪獲羸馬二百餘匹長矛二百餘桿

生擒逆回十一名正法又有另股回逆由甘肅竄入陝西隴汧境內於十一日突陷寶雞縣城經臣宗棠檄令記名總兵楊和貴後路五營總兵周金品馬隊由咸陽西上會同勦辦並飭道員黃鼎赴邠之軍改赴鳳翔以壯西路聲援該逆旋於十六日遁去臣等竊惟秦隴辦賊之局先擒後回近因擒入北山回逆意我腹地兵單

輒敢乘虛內犯自應分兵西路兼遏回氛 臣宗  
棠仍檄楊和貴等由寶雞西進以資防剿並於  
三水一帶酌撥數營與邠州涇陽等處防軍互  
相聯絡並催雷正綰張在山合兵進擣回巢以  
期一鼓殲除奏入

上命軍機大臣傳諭左宗棠庫克吉泰喬松年劉典曰  
甘肅回逆攻撲甯州州城都司李廣珠出奇擊賊追

斃多名甯州得以解圍涇州一帶踞回復經張在山  
分勦獲勝正甯寶雞兩城失陷譚玉龍楊和貴等先  
後分道援勦旋經收復此次回匪疊爲官軍摧挫其  
燄漸衰著左宗棠等飭知雷正綰張在山等分督各  
軍相機進勦以期早靖逆氛

十一月初一日

庚戌

裕瑞桂成奏言據貝子札那

格爾第呈稱十月初二日協理台吉綽克圖恭

乃帶兵在巴達爾德爾蘇圖地方與賊接仗殺斃回匪三十餘名奪獲器械馬匹牲畜多件已將回匪擊退惟訊據獲匪供稱現在該逆馬步二千餘名沿途裹脅甚衆防兵不足堵禦請另添得力官弁協防復據大同鎮總兵馬陞呈報探得鄜州回匪共有十餘萬人現分兩股一股已經離巢意欲入晉搶掠祁縣太谷一股定於

封河時由草地直來包頭鎮歸化城等語查口  
外清托薩包俱與甘蒙接壤一望沙漠無險可  
恃西自花定東至榆林只有蒙兵一千七百餘  
名甯條梁一帶回匪屢次圖由草地竄越若令  
蒙兵專截西路回逆則東路榆林一帶勢必空  
虛若令西路蒙兵將榆林邊外兼顧又恐西路  
逆回乘虛而入是以沿邊蒙兵無可調撥包頭

鎮係西路衝要防範不可不嚴擬請由宣化城外屯紮兵內調撥一千名派委得力將弁管帶出口並由察哈爾右翼距綏遠城較近之西四旗內揀派精壯一千名令參領轍德恩圖都布巴札爾畢都爾業副參領布音吉爾噶勒管帶取道草地來城聽候分撥協防遏賊旁竄前因口外防餉積欠甚鉅奏請由山西撥解餉銀數

萬兩現據歸綏道興奎呈報解到餉銀三萬兩  
覈計防兵每月需銀二萬餘兩一經散放所贖  
無幾今復添調官兵二千名通盤覈算每月需  
餉三萬餘兩擬請

飭下山西巡撫務須按月源源籌解以期力保完區奏  
八

上命軍機大臣傳諭裕瑞桂成杜嘎爾趙長齡曰甘省



回匪有分股竄晉搶掠並於封河時由草地來包頭  
鎮歸化城之說該匪旣衆且悍亟宜嚴防以杜紛竄  
沿邊一帶地廣兵單實有防不勝防之慮宣化一軍  
正在直省勦辦梟匪無可抽撥其察哈爾右翼距綏  
遠城較近之西四旗內著杜嘎爾棟選精壯兵丁一  
千名派令參領轍德恩圖都布巴札爾畢都爾業副  
參領布音吉爾噶勒管帶取道草地迅赴綏遠城聽

三國志卷之三十三  
三十三  
侯裕瑞等分撥協防以厚兵力口外防餉積欠甚鉅  
值此防勦喫緊之際豈容稍有拖欠著趙長齡按月  
源源籌解毋令缺乏晉省防務經趙長齡督飭陳澐  
分籌堵禦尙稱完密天寒冰結處處宜防現在兵勇  
漸集仍著該撫檄令該臬司嚴督將士堵勦兼施以  
固邊防

欽定平定陝甘新疆回匪方略卷一百六十三 丁卯年

十一月初七日

丙辰

左宗棠奏言總兵李祥和所

部和厚兩營由洛川追剿十月十九日行至中部縣太賢村地方山路險峻突遇回逆數百騎竄至李祥和卽率親軍衝擊賊騎愈聚愈衆力不能支李祥和身被十創復被賊矛中喉遂歿於陣提督劉芳桂率領親軍衝圍直入面被賊

三原縣志卷之三十一  
一  
刃砍傷身受矛傷多處正危急聞提督郭寶昌  
馳至揮軍奮擊立斃悍賊數十名賊勢稍卻而  
提督黃萬友亦至與郭寶昌分路並擊賊敗向  
東北龍安鎮竄走計陣亡弁勇八十八人受傷  
三十八人劉松山將抵洛川縣城聞報回軍尋  
蹤追勦賊已遠遁查總兵李祥和猝遇回逆力  
戰陣亡深堪悼惜該總兵爲羅澤南舊部轉戰

數省屢立奇功入秦後戰績尤爲卓著應請

旨飭部照提督陣亡例議卹懇

恩予諡附祀羅澤南湖南專祠以慰忠魂奏入

上命軍機大臣傳諭左宗棠庫克吉泰裕瑞喬松年趙長齡桂成劉典曰李祥和所部和厚兩營由洛川行至太賢村地方猝遇回逆衝突李祥和力戰陣亡此次官軍遇回失利傷損將弁多人雖經劉松山等尋

縱追擊而該逆業已遠颺著左宗棠庫克吉泰喬松  
年檄催劉松山等軍分途抄截就地殲除劉典亦當  
督飭將士嚴扼洛川宜君一帶以遏逆蹤紛竄前據  
裕瑞等有回匪欲於封河時由草地竄至包頭歸化  
城之奏已令裕瑞等撥兵分防惟歸綏一帶兵力尙  
單著趙長齡迅催前調之太原大同兩鎮兵二千名  
趕緊前赴裕瑞軍營以資厚集裕瑞桂成務當於包

頭等鎮要隘處所力籌堵禦毋任回衆乘閒內犯以致防勦益難

上諭內閣曰總兵李祥和統帶和厚兩營於太賢村突  
遇回逆數百騎馳至李祥和率親軍衝擊身受十創  
復被賊矛中喉遂歿於陣記名提督安徽壽春鎮總  
兵李祥和爲羅澤南舊部此次猝遇回逆力戰捐軀  
殊堪憫惜著交部照提督陣亡例議卹加恩予諡並

附祀羅澤南湖南專祠以慰忠魂

左宗棠又奏言准劉松山續報十月十九日之役記名提督劉芳桂身受重傷旋於二十三日身故伏查劉芳桂直入重圍裹創血戰經郭寶昌救出甫越四日因傷殞命實與陣亡無異應請

飭部照提督陣亡例議卹以慰忠魂奏入得



旨允行

十一日 庚申 左宗棠奏言疊奉

諭旨令 臣 查明甘肅餉事並通籌陝甘全局 臣 查甘肅  
地方荒瘠承平之日專恃各省協撥軍興以來  
餉絀兵增遂致困敝不可收拾陝甘歸督 臣 統  
轄甘有事則陝受其害陝無事則甘蒙其利安  
陝乃能固甘實有唇齒相依之勢前督 臣 楊岳

斌設甘肅後路糧臺於西安以陝西布政使林壽圖領其事支應平固慶涇各軍初制甚善迨甘事日棘楊岳斌令道員陳丕業於漢中改設糧臺轉餉徑解秦安不由西安經過遂致餉道時形梗阻是楊岳斌亦未盡得改道之利也上

年九月臣承

恩命調任陝甘力籌西征的餉兼催各省協餉入秦後

芻糧騰貴饋運奇難費益不貲若以甘餉全界  
甘省甘軍能辦賊與否 臣不敢知而 臣軍且立  
困於中道此 臣動用甘餉緣由不得不直陳於

君父之前者也查甘軍餉項自六月閒 臣入秦後共撥

銀三十八萬兩併陳丕業林壽圖前後所解綜

計約六十餘萬兩 臣猶思竭力籌畫擬再撥銀

五萬兩飭林壽圖委員迅解秦安轉解蘭州以

應甘省年終之用一面飛咨四川督臣於前次

代辦軍米內先由署督臣酌提濟用將來米捐

如能起色亦就近於四川捐局隨時酌撥濟甘

雖事有先後緩急亦斷不敢膜視甘軍惟署督

臣穆圖善現飭林壽圖撤西安糧臺悉將餉事

歸秦安糧臺又分撥山西河東協餉歸雷正綰

委員守催而令曹克忠舊部張在山涇州一軍

仰給於雷正綰恐涇軍先存疑慮在署督臣恐  
林壽圖截留餉銀因併西安糧臺撤去正與楊  
岳斌漢中轉餉事出一轍而以涇軍餉事寄之  
雷正綰使涇軍解體實覺非宜若令慶涇各軍  
概取給於秦安糧臺又鞭長莫及慶涇防軍皆  
將渙散陝省卽有剝膚之災自古用兵西北必  
多籌運道以備不虞似此專注漢中設秦安一

路或有梗阻必致貽誤且自西安至甘十六站  
自漢中至甘二十七站遠近攸殊於漢中設分  
局轉運四川銀米則可若轉運各省甘餉於道  
里軍情兩無所取此後臣軍入甘亦必仍於西  
安設陝甘總糧臺則西安之甘肅後路糧臺豈  
有可撤之理林壽圖雖再四懇請裁撤臣未允  
行誠以事勢了然無煩再計督臣總制陝甘當

籌兩省全局甘省此時之患在兵多而不能戰  
陝甘西北各路已大受甘軍之累卽如胡世英  
一軍十營經署督臣撤到延安逃勇從賊曾爲  
提督劉厚基所撿斬胡世英來陝日久坐視回  
土各逆剽掠曾無一矢相加欲撤之使去則欠  
餉已鉅欲督之使戰則挫衄無疑卽此類推甘  
軍大略可想臣今日在陝固不能視甘肅爲遐

荒異日入甘亦仍必以陝西爲根本可否

飭下署督臣穆圖善將甘軍屢經譁潰有名無實各營

覈實察驗綜計每日樽節支用約實需餉糧若

干咨臣商辦然後立兩省分總糧臺酌量緩急

分別撥濟乃爲正辦至於議撫議勦必俟臣軍

入甘始可辦理甘肅改設之臺祇宜責令就近

轉輸川湖餉米陝省現設之甘肅後路糧臺仍



留以司協餉之總匯不可因遷就目前自誤大局

左宗棠又奏言頃奉

諭旨穆圖善奏甘省協餉久缺令臣兼籌接濟臣查各

省協甘的餉不及二十萬兩而甘軍除涇慶等軍由西安糧臺發餉外其在甘肅各臺支餉者每月額餉尙需四十餘萬兩楊岳斌入甘時於

後路未暇深慮迨身入重地顧此失彼後路時  
梗乃不得已而思增兵益餉勉強支持已爲失  
計聞其去甘之先所部各軍已多不戰而潰或  
相率潛逃存營人數實已減少穆圖善接署督  
篆後甘省各營勇丁又或潰散爲匪或私入秦  
楚軍中充勇是甘軍雖有一百四十營之多計  
現在存勇斷不及半傳聞穆圖善於八月十六

日勒兵出郭受河狄逆回之降倉卒被賺陣亡  
提鎮參遊弁勇多名回逆遂圍甘肅省城幸彭  
楚漢至始得解圍臣自入關以來未接穆圖善  
緘商兵餉進止機宜八月十四日曾致信穆圖  
善婉陳一切竊謂甘回非盡不可撫必痛加懲  
創使逆回有所畏設法安插使良回有所歸而  
後撫局可成甘軍非盡不可戰必簡汰疲乏覈

併虛浮以所搏節之餉勻加精銳有制之軍使  
一軍有一軍之餉一軍得一軍之力而後戰事  
可恃若不早爲變計指望不可必得之協餉遠  
瞻飢軍聽各統領營官按月索取其虛勇旣挂  
名餉籍概成積欠其實勇不敷日食未免擾害  
民間臣身任陝甘總督不能早清陝境八甘任  
事夙夜疚心此時穆圖善所辦之事節臣異日

接辦之事心有所知豈敢置之不顧臣俟勦擒  
事竣自當先勦陝甘交界之回節節埽盪而西  
惟不敢冒昧從事急趨蘭州致蹈楊岳斌故轍  
亦不敢久曠職守而以危苦之事累人擬請

飭下穆圖善俟臣軍行抵甘境卽將陝甘總督關防派  
員齎送臣卽當接篆任事穆圖善縱不奏催臣  
亦擬屆時請

旨區區微忱斷不敢有所趨避致負平生也

左宗棠又奏言陝西巡撫喬松年接到西甯鎮  
總兵黃武賢函稱西甯回匪前經受撫現復焚  
掠漢民村莊肆意蹂躪郡城無兵無餉文武各  
官被匪挾制束手無策似撫局已有不能敷衍  
之勢等語臣既有所見不敢壅於

上聞奏入

上命軍機大臣傳諭左宗棠穆圖善曰左宗棠所籌深  
中窾要現設西安之甘肅後路糧臺卽著左宗棠飭  
令林壽圖妥爲辦理毋庸遽議裁撤其甘肅改設之  
臺卽責令就近轉輸川湖餉米以資撥運穆圖善務  
將甘軍覈實察驗樽節支用綜計每月約實需餉糧  
若干咨明左宗棠商辦左宗棠亦當彼此兼顧源源  
接濟俾免譁潰之虞甘軍雖有一百四十營之多據

左宗棠奏稱楊岳斌去甘之先多已逃潰現在存勇  
斷不及半著穆圖善切實查覈毋任各營官按籍索  
餉致涉虛冒各營兵丁缺額暫時毋庸添募以節餉  
需左宗棠速將擒逆勦除並陝甘交界之回節節掃  
盪馳赴甘境將該省兵餉勦撫各事宜實心籌辦以  
副委任並著穆圖善俟左宗棠入甘後卽將總督關  
防派員齎送該督軍營八月十六日河狄回逆叛圍



蘭省情形著穆圖善據實查奏仍隨時與左宗棠函商妥辦左宗棠奏喬松年接據總兵黃武賢函稱西甯危殆情形撫局已有不能敷衍之勢著穆圖善查明據實具奏仍一面咨照玉通會籌辦法以遏亂萌

十四日

癸亥

左宗棠奏言捻逆潛勾回逆以圖牽

掣官軍十月十五十六等日經劉典高連升督隊痛勦該回逆由北山遁入甘肅慶陽甯州等

處同時竄擾陝境自汧陽徑撲鳳翔府城總兵  
孫立士督所部馬步三營縱橫血戰力竭陣亡  
弁勇傷亡甚多二十八日適總兵楊和貴周金  
品帶領馬步各隊行至扶風聞鳳翔被圍二十  
九日卽由扶風赴援行過岐山縣西二十餘里  
橫水鎮騎賊從空堡衝出楊和貴排礮車擊之  
賊卽敗走楊和貴周金品仍復結隊徐行二鼓

後始抵郡城東門連夜趕築營壘三十日黎明  
賊衆蜂擁而來由東西兩路直撲城壘楊和貴  
周金品各率馬步隊分布東西兩門橫排並進  
槍礮齊施立斃衝鋒悍賊四十餘人賊遂奔潰  
城圍立解追至三義鋪而還是日復有另股賊  
匪紛竄岐山扶風兩縣之間至本月初一初二  
等日騎賊愈增岐山勢殊岌岌當調防渭各營

西趨扼之而鄜州境內回逆又向洛川白水竄  
入澄城縣境圖犯韓城郃陽渭南又急現飛調  
臣部中路五營之在宜君者速回 臣擬親率西  
行鳳翔縣盤獲逆回據供甘肅狄河回逆已由  
清水張家川而來是卽甘肅招撫未成旋撲省  
城之悍賊 臣前飭道員黃鼎率所部八營由郃  
州赴鳳翔據報三十日可抵汧陽計已相機夾

擊矣俟續報到日再行奏

閩奏八

上命軍機大臣傳諭左宗棠曰鳳隴等處回氛猖獗甘肅回匪乘機竄擾意在與捻匪相結牽掣官軍著左宗棠嚴飭楊和貴等與黃鼎等軍合力夾擊並將鳳翔及洛川白水等股迅籌剿滅毋任蔓延爲患致難辦更難得手

二十八日 丁丑 左宗棠庫克吉泰喬松年劉典奏

言陝西逆回崔三勾結甘肅河州狄道悍回米  
賈張非合股竄犯勢甚猖岐山扶風汧陽隴  
州同時告急道員黃鼎一軍適由靈臺前赴汧  
陽聞河狄逆回張非一股竄撲汧陽縣城經該  
縣知縣鄒常泰擊退賊踞城東二十里之黃里  
鋪黃鼎遂於初二日五鼓帶領官兵星馳進剿

該逆列步賊於楊家原上而以騎賊分布汧川  
直撲官軍黃鼎督隊轟擊雖疊斃悍賊而該逆  
愈撲愈近參將徐占彪等馳至四面圍殺斃賊  
數百名餘賊潰逃徐占彪等率馬隊疾追直抵  
黃里鋪賊悉遁入村中官軍乘勢掩入回衆大  
亂首逆張非中矛墜馬陣斬回逆千餘名賊悉  
奔上高原拚死抗拒復分千餘騎繞道截我後

路黃鼎飛調參將劉竹田等迎頭截擊斃賊千餘並調都司龍常總兵趙雲鳳各營分擊五里坡之賊大獲勝仗共斃悍賊約三千名生擒八十餘名奪獲羸馬三千有奇旗械輜糧甚夥張非一股受創後餘賊與米賈崔三兩股合併初一初二等日大股竄至岐山攻城甚急總兵楊和貴等率所部登陴堅守屢次擊退悍賊城圍



始解初四日賊騎竄至城西里許副將吳禧德等開礮擊之賊卽奔逸是日楊和貴等出擊鳳翔柳林鋪東竄之賊賊見官軍後無策應初五日夜間糾集岐山扶風賊衆圍攻鳳郡村堡意圖誘我出擊從後包抄楊和貴列隊出禦周金品率馬隊分列兩旁將抵郡東桃源堡賊匪佯退比官軍前進伏賊突起楊和貴等率精壯直

擣中堅縱橫截殺一面嚴飭各營結陣徐行鏖  
戰多時賊屍枕藉該逆猶拚死搏鬪官軍愈戰  
愈奮共斃悍賊二千餘名維時黃鼎一軍適亦  
馳抵鳳郡出隊分路策應兩面夾擊賊遂大敗  
悉向鳳翔東北川口入山繞道遁去臣等查黃  
鼎楊和貴以寡禦衆出奇制勝戰績昭彰仰懇  
天恩優加獎勵黃鼎所部之總兵趙雲鳳等先行開列

額懇

恩施陣亡各員請

旨飭部從優議卹楊和貴等所部尤爲出力各員及其  
餘在事出力各員弁容臣等查明保獎奏入

上諭內閣曰陝西回匪崔三糾合甘肅回匪米賈張非  
等股紛竄汧陽鳳翔等處道員黃鼎等率軍截擊張  
非股匪十一月初二日在汧川黃里鋪五里坡等處

疊次接仗共斃賊約三千餘名生擒八十餘名奪獲  
羸馬三千有奇旗械輜糧甚多該匪被創後與崔三  
米賈合竄鳳翔扶風等境總兵楊和貴等分兵堅守  
岐山擊退撲城賊匪縣城解圍初四五六等日出擊  
鳳翔竄賊無戰不勝共斃悍賊二千餘名黃鼎一軍  
復馳至策應兩面夾擊斃賊尤多該逆等遂向鳳翔  
東北川口繞道竄走此次官軍以少破衆大挫賊鋒

洵屬異常出力在事員弁自應量予恩施以昭激勸  
總兵楊和貴著以提督記名請旨簡放並賞換瑚松  
額巴圖魯名號周金品著賞給鋒勇巴圖魯名號道  
員黃鼎著以陝甘道員用並賞加二品頂戴黃鼎所  
部尤爲出力之總兵趙雲鳳著交部從優議敘副將  
邱國良著賞給壯勇巴圖魯名號王其發著以總兵  
儘先補用參將徐占彪等三員均著以副將儘先補

用徐占彪並賞給堅勇巴圖魯名號劉竹田著賞加副將銜遊擊劉德良著賞加參將銜都司楊朝元等二員均著以遊擊儘先補用千總朱蘭亭著以守備儘先補用並賞換花翎把總周廷楨著以千總儘先補用並賞戴藍翎知縣王時邁著賞加同知銜縣丞雷炯著俟選缺後以知縣儘先補用教諭侯肇封著俟選缺後以知縣不論雙單月遇缺卽選陣亡縣丞

楊作舟著照知縣陣亡例從優議卹外委楊國昌著照把總陣亡例從優議卹楊和貴等所部尤爲出力各員及其餘出力各員弁並著左宗棠等覈實奏請獎勵

左宗棠庫克吉泰喬松年劉典又奏言陝甘回逆分股竄擾邠州等處經臣等分飭各軍堵剿已革提督譚玉龍一軍於十月三十日剿賊邠

州之紅崖堡等處殲斃多名參將張得林守備  
郭榮陞千總張玉林皆歿於陣初四日賊騎紛  
竄三水臣劉典飭總兵陳集賢等禦之賊分三  
股來撲我軍分路迎勦轟斃騎賊甚多初六日  
回逆五千餘人由甘肅正甯一帶直犯邠境譚  
玉龍由永樂鎮迎擊賊殊死鬪復有另股麇至  
我軍直前奮殺賊卽敗北初七日另股回逆七



八千人四路入犯譚玉龍分撥隊伍馳往策應  
並親督兵勇截擊彭家川股匪槍礮齊施立斃  
悍賊三四百名

臣

劉典駐紮金鎖關自初一日

起疊次出隊襲擊逆衆望風卽遁初十日該逆  
馬步數千人圖襲宜君縣城總兵李大有等乘  
大股未至擊之賊旋敗遁其甘肅提督高連陞  
一軍

臣

左宗棠檄令由鄜州宜君進發初七日

高連陞馳抵洛川縣境回逆數千圍攻村寨遊  
擊吳國富率隊掩至高連陞督率將士向前衝  
殺斃賊多名寨圍立解乘勝追過前山斃賊二  
百餘名墜崖落澗無數圍攻鄜州之回匪亦相  
繼解圍遁走鄜宜之路漸通所有力戰捐軀各  
員懇

恩飭部照陣亡例議卹奏入

上命軍機大臣傳諭左宗棠庫克吉泰喬松年劉典曰  
回逆竄擾邠州三水宜君中部洛川一帶經譚玉龍  
等軍由邠州之紅崖堡等處分路進剿由正甯犯邠  
之甘回及另股回匪均經擊敗著左宗棠檄飭譚玉  
龍等軍乘勝進攻務將邠州等處之匪節節掃蕩以  
期漸次廓清宜君洛川之匪經劉典等軍進剿亦有  
斬馘賊俱敗遁邠宜之路漸通著左宗棠會商劉典

激勵將弁合力兜擊毋令該逆闖入晉疆擾及完善  
之區陝甘毗境賊勢臨張庫克吉泰會否帶兵出省  
著卽懍遵前旨實力勦辦毋再遷延干咎左宗棠喬  
松年務當悉心籌商妥爲布置迅殄逆氛此次力戰  
捐軀之參將張得林守備郭榮陞千總張玉林均著  
交部各照陣亡例議卹以慰忠魂

左宗棠庫克吉泰喬松年劉典又奏言十月二

十八日大股回逆自汧陽徑撲鳳翔府城總兵  
孫立士督隊鏖戰因賊衆兵單力竭捐軀其同  
時陣亡之都司孫芳彥孫仲曾孫佩珩遊擊孫  
永富守備陳敬思李恆太千總張德榮孫繼祥  
羅鳳鳴王玉保等均擬請

旨飭部照陣亡例議卹奏入得

旨允行

十二月初三日壬午成祿奏言十一月初一日以

後王仁和黃祖淦等各率所部圍攻肅州踞逆  
十一日黃祖淦因疊次仰攻未能得手復由北  
大河灣挑挖長壕爲久困之計十七日該逆由  
北門衝出三千餘人直撲我軍黃祖淦當卽帶  
領親兵往來策應鏖戰多時黃祖淦右脅已受  
彈傷仍復裹創血戰將逆衆壓至城下守城逆

匪見賊隊敗回城上槍礮齊施黃祖淦頭面又  
受礮傷登時殞命迨臣整隊繼進逆衆始遁入  
城查我軍自去夏合圍以來因該逆槍礮過多  
未能得手此次黃祖淦又復中礮陣亡實堪髮  
指惟有激勵將士迅圖力拔堅城一面移營扼  
紮俾三軍聲勢聯絡以杜紛竄總兵黃祖淦力  
戰捐軀籲懇

天恩飭部照提督陣亡例從優議卹其先後陣亡各員

並請

旨一併交部從優議卹至黃祖淦所部九營已派總兵

馬天祥接統臣當飭該總兵實力整頓俾成勁

旅

同日文麟奏言九月二十三日肅州踞逆糾合

大股竄至玉門所屬地方臣當卽督率員弁兵



勇登城固守並飭各營加意嚴防一面撥隊就  
近截擊飛飭安西州知州迅派兵勇防堵要隘  
如果玉門喫緊星速應援二十四日該逆蜂擁  
攻城經我軍擊退十月初一日該逆拚死直撲  
潛空關廂營牆我軍四面轟擊伏兵衝突該逆  
紛紛敗遁斬獲甚多初二日該逆竄回肅城刻  
下安西敦煌玉門一帶亦甚喫緊

臣

俟玉門應

三原縣志卷之三十一 三十一  
二二〇

辦事宜布置妥協擬卽前往安西力籌兼顧一  
經辦理就緒迅卽馳赴哈密接印任事均奏入

上命軍機大臣傳諭成祿文麟曰成祿勦辦肅州踞逆  
日久未下此次一經接仗卽損一武職大員不知平  
日布置者在總兵黃祖淦中礮陣亡殊堪憫惻著  
交部照提督陣亡例從優議卹其先後陣亡之遊擊  
錢魁元守備楊玉堂把總單萬鎰外委秦承恩均著

交部從優議卹官軍失挫後賊勢愈張成祿若再不  
知激發天良勉力進攻何時是滅賊出關之期著卽  
激勵各將士迅圖攻拔肅城毋得任意遲延致干重  
咎黃祖淦所部旣交馬天祥管帶務當飭令該員認  
眞整頓以作士氣肅城之賊成祿旣稱移營扼紮三  
軍聲勢聯絡何以大股竄出關外若罔聞知其爲形  
同聾聵已可概見現在雖經文麟擊退而該逆紛竄

靡常仍須時加戒備期免疏虞著文麟嚴飭文武員  
弁設法扼剿毋任該逆窺伺以保巖疆安敦玉一帶  
旣形喫緊著將玉門應辦事宜妥籌布置卽往安西  
勉圖兼顧哈密地方最關緊要仍著文麟將關內外  
辦理就緒迅赴該城任事以資鎮撫

文麟又奏言臣所部各軍與總兵張玉春管帶  
之勇約有十營日需口糧草料等項爲數甚鉅

後路糧運最關緊要擬由安西敦煌玉門三處  
各設糧臺並提用倉儲正款以資接濟庶無停  
兵待食之虞奏入報

四ノ丁

三